

Redzuun Rexpejn Dios

Siääd Sprit Dxan xten Dios te cuääzni neñ lastootu

¹ Xamigwä Teófilo, abacuaä lojlu xcuent guiraa recos nani bejn Jesucrist näjza nani baluii Jesucrist, che guslojlini, ² hasta dxejli ni huäjsni xhaguibaa. Gunibexgaani xhini'c gun renani guleni gac xpejñpacni. Sprit Dxan xten Dios baluii Jesucrist xhi guiniini lojreni. ³ Gudejd Jesucrist trabajwduxh, dxejcti gujtni. Dxejc gubansacni lo rebengut, baluilojni lo rexpejñpacni. Tiuu dxej baluilojni loj rexpejñpacni balti huält te gacbeereni agubansacni. Guniizani lojreni xcuent xcälñnibee Dios.

⁴ Che gudejd tiuu dxejga, batojp Jesucrist rexpejñpacni, gunibeeni na'c guiriireni guedx Jerusalén, cuääzreni jiääd Sprit Dxan xten Dios nani aguniipac Dios jiääd. Räjpní:

—Dee abiejn diajgtu guniá lojtu. ⁵ Juan batiobnis con nis, luxh naj guxii dxej cayäädx dxejcru siääd Sprit Dxan xten Dios te cuääzni neñ lastootu. Si'c guirobnistu —räjpní.

Huäjs Jesucrist siini xhaguibaa

⁶ Lagajc dxejc che abidojpreni loj Jesucrist, gunabdiidxreni lojni:

—¿La naj gudedsaclu yälñnibee lo rexpejñ Israel, ä?

⁷ Dxejcti räjpní Jesucrist loj rexpejñpacni:

—Di riäjñ gacbeetu xcuent redxej näjza retieemp nani abasobxgaa Dios con xcälñnibeeni. ⁸ La'tu sica'tu yälñnibee che abiääd Sprit Dxan xten Dios neñ lastootu. Dxejc chatie'chtu xtidxä näjza rextzunä neñ guedx Jerusalén, neñ guiraa reguedx Judea, neñ guiraa reguedx Samaria, näjza neñ guideb guedxliuj —räjpní.

⁹ Gulujxtis gunii Jesucrist rediidxga, luxh lałni cahuii rebejn lojni huąjsni xhaguibaa, sa'csi gurejdx Diosni. Dxejc biąđ te za, biu'ni neņ zaga. Ro'cti diru rebejn nuhuii lojni. ¹⁰ Lałni cadxelodxi rebejn xhaguibaa cadre gunitloj Jesucrist, tiop angl xten Dios ni najcw ladnol suga' gajxh cadre suga'reni. ¹¹ Dxejc rąjp reangl loj rebejn:

—¿Xhi rajctu beņ Galilee? ¿Xhicuent cadxelojtu xhaguibaa? Abahuiitu xho huąjs Jesucrist siini xhaguibaa. Lagajc si'c guibisacni —rąjpreni.

Gulereni Matías ni najc apostcoob

¹² Dxejc birii rebejn yejc dajne' ni laa Dan Oliib, siireni guedx Jerusalén. Dan Oliib suga' gajxh Jerusalén. Gusajrenini si'cni rnii leii sajz sareni dxej ni rusilajzreni. ¹³ Che biu'reni Jerusalén, bidzujņreni ro' yu' cadre rbązlaareni. Yu'ga najc jiaa yejc stee yu'. Ro'c rbązlaa Pedr nąjza Jacoob, Juan, Andrés, Felipe, Tomás, Bartolomé, Mateo, Jacoob xi'n Alfeo, Simón nani laaza Zelote, nąjza Judas bejtz Jacoob. ¹⁴ Ro'c yu' guiraareni nąjza regunaa nąjza Marii xnan Jesucrist nąjza rebetzhuin Jesucrist. Cabejdx, canabreni loj Dios; tejsi najc xhigab xten guiraareni.

¹⁵ Nadxagsa' te gayuu gajł bejn. Dxejcti huisulii Pedr galąiireni, rąjpni loj rebejn:

¹⁶ —Canią lojtu, resa'ą, nanabpac soob xtidx Sprit Dxa xten Dios ni bacuaa toDavid lo guijtzc xcuent Judas, nani bato' Jesucrist loj renani gunaazni. ¹⁷ Gujz Judas sa'nu, bejnzani lagajc dzuun ni biennu. ¹⁸ Cua' Judas meel ni badeedreni lojni che bato'ni Jesucrist. Che gulujx bejnni dzunguijdx ni bejnni, badeedsacni meel lojreni. Gusiireni te la' yuj. Dxejcti lagajc Judas basął duu guejnni, guząbnajłni lo bej, gujtni. Gusaguijni, dxejcti birąjs xque'ni birii guiraa reziini. ¹⁹ Che biejn diajg rebejn Jerusalén si'c,

gulälajreni yujre Acéldama, ni säloj yurejn. ²⁰ Neñ guijtẓ ni laa Salmos abacuaa toDavid rediidxre:

Sujianxteb rolijzni;

na'c cuääzru bejn rolijzni;

näjza:

Suxca'za ste'ca niguii xtzuunni.

²¹ Naj nanab cuenu stee niguii —räjp Pedr—. Nanab gacni tej ni gusanäj nuunu guideb redxej ni guyunäj Jesucrist nuunu, ²² dxejli ni gusloj batiobnis Juan hasta dxej ni huäjs Jesucrist xhaguibaa. Te gacnäj niguiire nuunu gusule'nu diidx gubansacpac Jesucrist lo rebengut.

²³ Dxejc gulääreni tiop niguii lojreni, tejni laa José Barsabás ni rbälajreni Justo, steeni laa Matías. ²⁴ Gurejdx, gunabreni lo Dios, räjpreni:

—Dad, Dios, ni racbee lastoo guiraa rebejn, baluii loonu con ni najc niguii ni agulelu loj guiro'p niguiire, ²⁵ te jiu'ni lo dzuun näjza lo yälapost ni basa'n Judas cheni sääni garenca nejz —räjpreni.

²⁶ Dxejcti gudzujtreni daad te gulereni lo guiro'preni. Che biajb daad, gulereni Matías. Dxejc bigabnäj Matías stzubiteeb reapost te gujcreni tzubitio'p apost.

2

Biääd Sprit Dxan xten Dios

¹ Che bidzujñ dxej ni rajc lanij xten Pentecostés, tre' guiraareni tejsi lajt neñ te yu', ² chela gusloj cayubej xhaguibaa si'c te beroduxh, bachajni guideb neñ yu' cadre suga'reni. ³ Dxejc bahuiireni astoo carechxteb xhidajl bale' casanij rebajlga yejc tejga reni sojb ro'c. ⁴ Biu'ti Sprit Dxan xten Dios neñ lastoo guiragajcreni. Dxejc gusloj caniiireni garen-garen didxsaj si'ctisni badeed Sprit Dxan xten Dios guiniireni.

⁵ Nen redxejga, xhidajl rexpejn Israel ni sasanäjpac xtidx Dios bidzujn guedx Jerusalén. Xhidajl lajt biriireni siädreni. ⁶ Che biejn diajgrena guyubej beduxhga, bidojp reben xhidaalga, bachaag sa'reni. Rdxeloduxh reben xhidaalga sa'csi cayejn diajgrena canii reapost xtidxsajpac cade tejreni. ⁷ Cadxelojreni räjpreni:

—¡Bahulaare! ¿La et ben Galileedi renani canii, ä? ⁸ ¿Xhoxh riejn diajgnu caniireni xtiidxpacnu si'ctis ni rniinu laadxnu, ä? ⁹ Najcnu ben nación Partia, ben nación Media, ben región Elam, ben Mesopotamia, ben Judea, ben estad Capadocia, ben región Ponto, näjza ben Asia. ¹⁰ Najczanu ben distrit Frigia, ben estad Panfilia, ben nación Egipto, näjza bejn ni siäd stelaad Cirene, te estad nen Africa. Loj rebejn ni siäd Roma yu' reni najc xpejn Israel, yu'za reni bazuxhijb lo Dios sa'csi rililajzreni si'cni rililajz rexpejn Israel. ¹¹ Yu'za ben Creta. Yu'za ben nación Arabia. Guiragajcnu riejn diajgnu caniireni xtiidxpacnu si'ctis ni rniinu laadxnu. Caniireni loonu xcuent recosroduxh ni cayujn Dios.

¹² Bidxeloduxh reben xhidaalga, dijejn xhi xhigab gunreni. Räjpreni lo sa'reni:

—¿Xhi säloj dee?

¹³ Dxejcti guyu' rebejn ni baxhiznäjreni, räjpreni:

—Agusojz redee.

Gunii Pedr loj rebejn

¹⁴ Dxejcti gusulii Pedr näjza tzubiteeb sa'ni, guredxa'ni guniini lo reben xhidaalga:

—Guejbtu, rexpejn Israel, nani rbäjz distrit Judea näjza guedx Jerusalén. Colcuadiajg diidx nani guiniä. ¹⁵ Xhet sojzdinu si'cni cayujntu xhigab. Rsilru naj, entis gojl rcagaa. ¹⁶ Dxejc scree gunii Joel che guniini xtidx Dios agujc xchero. ¹⁷ Räjp Dios:

Sidzujn dxej che guxhalä Xsprit Dxañä cuääzni nen lastoo guiraa rebejn.

Rexingaantu näjza rexindxa'ptu sinii xtidxä xcuent recos ni gajd gac.

Rexi'ntu sinixcal,

rextadgoldootu suluiloj bacal recos nani guluiä lojreni.

¹⁸ Guxhalä Xsprit Dxañä loj guiraa reni siädnajl narä.

Siniireni rediidx ni gudedä lojreni xcuent recos nani gajd gac.

¹⁹ Suluiä lojtu balti senro xhaguibaa näjza lo guedxliuj.

Resenro ni gac najc rejn con guiboo, luxh guxh sire' si'c te za.

²⁰ Sicäy loj gubijdx, sajc bäii si'c rejn.

Sajc guiraa recosre,

dxejcru sidzujn dxeduxh che jiälsacä narä, Dios.

²¹ Dxejc guiraa rebejn nani cueedx guiniab gacnäj Diosreni, reni'c siliaa lo dojl.

²² Räjpedr lojreni:

—Rexpejn Israel, colcuadiajg xtidxä. Dios baluii Jesucrist, beñ Nazare't, lojtu por recosro, remilagwr, reseen nani bejni nez lojtu. Lagajc Dios badeed yälrnibee loj Jesucrist te bejni redzunroga. La'tu nancheetu dee.

²³ Galooli ananchee Dios xhi guntu loj Jesucrist Xi'nni. Basaanza Dios bateedtu Jesucrist ladzñaa rebenguidx te bacuaareni Jesucrist lo cruz te bagu'trenini. ²⁴ Baspañsac Dios Jesucrist, baslaa Diosni ladzñaa yälgujt, sa'csi di niajcdi nica' yälgujtni par tejpas, sa'csi laani rnibee lo yälgujt. ²⁵ Che gubañsac Jesucrist, guzojb diidx ni bacuaa David lo guijtzcuent Jesucrist. Räjpedr David lo Dios:

Guira dxej ruhuiä lojlu, Dios.

Suga'lu xladbeä cayacnäjl narä te di guidxejb lastoä.

²⁶ Ni'cni bibalajz lastoä, guniäza lojlu lacti rbaa lazä.

Rbalazä sa'csi suhuiilu narä che guetä.

²⁷ Dizalu gusaan jia'n xaimä neñ baa.

Dizalu gusaan gudx tiejxh xi'nlu nani sanälajzlu.

²⁸ Abaluiilu loä xho guibanä par tejpas.

Sibalazduxhä sa'csi guibanää luj,
si'c räjp David xcuent Jesucrist.

²⁹ Räjp Pedr:

—Guyasi guiniä lojtu agujc xchero gujt David. Aguyutzutzni neñ baa. Sajc guihuiinu baa cadro biga'tz David. ³⁰ Gunii David xtidx Dios. Che nabajñli David bia'n diidx gudeed Dios te xajgni ni guirilaj Crist, luxh laani gacni reii si'cni gujc David. ³¹ Sa'csi baluixгаа Dios recosre lo David, ni'c räjp David sibansac Crist lo rebengut sa'csi di Dios gusaan jia'n xaimni neñ baa, dizani gusaan gudx tiejxhni. ³² Guläs Dios Jesucrist lo rebengut. Nuure bahuiloonuni, najcnu testiigw gubansacni lo rebengut. ³³ Gurejdx Dios Jesucrist. Naj nabajñ Jesucrist xhaguibaa, nabejni xladbee Dios ro'c canibeeni. Badeed Dios Xsprit Dxanni loj Jesucrist si'cni bia'n diidx. Naj abaxhal Jesucrist Sprit Dxan lo guedxliuj. Jesucrist cayujñ guira'ti nani cahuiitu, nani cayejn diajgtu nadxej.

³⁴ Di David nij xhaguibaa, sa'csi lagajc David räjp:

Gunii Dios lo Dad nani rnibee loä: “Gurej xladbeä

³⁵ che guidzujñli dxej gudzugä guiraa reni rdxe'ch lojlu te gacbeereni luj rnibeelu guira'ti.”

³⁶ Rniliápac lojtu —räjp Pedr—. La'tu bacuaatu Jesús lo cruzj. Ni'cni, colgacbee, guiraatu xpeñ Israel, abejn Dios gac Jesúsre Dad nani rnibee loonu.

³⁷ Che biejn diajgreni laareni bacuaareni Jesús lo cruzj, guc-huinuxh lajzreni. Räjpreni lo Pedr näjza lo reapost ni suga' ro'c:

—Aiilu, resa'nu, ¿xhini'c jiennu naj?

³⁸ Dxejcti räjp Pedr lojreni:

—Colgusiech lajztu, colguirobnisza, sa'csi ni'c najc te seen rlaiztu chanajltu Jesucrist, te si'c jia xtojltu. Dxejc suniidx Dios Sprit Dxan cuääz nen lastootu. ³⁹ Si'c rlaiz Dios guniidx Xsprit Dxanni lojtu nájza loj rexi'ntu, nájza lo rebejn ni rbájz zijtru, nájza loj guiragajc rebejn nani cueedxni —si'c gunii Pedr lo rexpejn Israel.

⁴⁰ Dxejcro gunii Pedr xhidajlru diidx, balijdxni rebejn:

—Colguirii loj reben latsiaj ni re' lo guedxliuj naj, te laatu lo dojl.

⁴¹ Xhidajlreni huililajz rediidxga. Dxejcti gurobnisreni sa'csi huililajzreni xtidx Dios. Lagajc dxejga huililajz si'cti chon mil bejn. ⁴² Sanuutis rusoobreni diidx ni baluii reapost, bibalazduxhreni sa'csi bidxaag sa'reni con rexpejn Jesucrist, gudaunäj sa'reni si'c gudaunäj Jesucrist rexpejnpacni, bidojpreni tejsi lajt te guniireni lo Dios.

Xho gubajjn rexpejn Jesucrist galoo

⁴³ Bidxeloduxh guiraa rebejn luxh bejn reapost redzunro, remilagwr. ⁴⁴ Bichaag sa' renani huililajz xtidx Dios. Bachagsa'reni xhixtenreni te tejsi gojpreni guiraa xhixtenreni. ⁴⁵ Bato'reni xhixtenreni, dxejcti badeedreni meel lo sa'reni si'ctis ni caquiin chutis tejreni. ⁴⁶ Guixe-guixee bidojpreni nen guidoro xten Israel. Tejsi najc rexhigabreni. Gudaunäj sa'reni rolijz cadetejreni, guiraaren i bibalaznăd uxh sa'reni. ⁴⁷ Gulă'preni xpala'n Dios. Guiraa rebejn gunii rexpejn Jesucrist najc beńsa'c. Guixe-guixee batie' Dios xhidajlru bejn nani rililajz xtiidxni, badzucajni rextojlreni, dxejc bachaagreni lo rexpejn Jesucrist.

3

Biajc niguui nani racxhuu ni'ni

¹ Guyu' te dxej sää Pedr näjza Juan nez loj guidoro si'cti rcachon gudxej. ² Guyu' te niguii nani racxhuu ni'ni, digacdi sani che gojllini. Guixe-guixee rile'c bejn niguiiga ro' puertroga xten guidoro. Puertroga laa Sacré. Ro'c rbejni rniabni gojn lojreni riu' guidoo. ³ Che bahuiini agojl jiu' Pedr näjza Juan nen guidoroga, gunabni te gojn lojreni. ⁴ Dxejcti bahuii Pedr näjza Juan lojni. Räj p Pedr lojni:

—¡Bahuii loonu!

⁵ Che biejn diajg niguiiga xtidx Pedr, bahuiini lojreni sa'csi naani sudeedreni meel lojni.

⁶ Räj p Pedr lojni:

—Xhetliidi meeldi rapä, nani rapätis sunidxä lojlu. Xcuent xcälrnibee Jesucrist, ben Nazare't, rniä lojlu: ¡Gusulii! ¡Gusaj! —räjpni.

⁷ Dxejcti gunaaz Pedr naani, guläsnini. Biligajc ni'ni, gusutijp ni'ni. ⁸ Huisuyälni, gusajni. Biunäjni Pedr näjza Juan nen guidoro. Rsiajni, rtiäsni, calä'pni xpala'n Dios. ⁹ Bahuii xhidajl bejn lojni nen guidoro, rsiajni, calä'pzani xpala'n Dios. ¹⁰ Biembeereni laa niguii ni rbej ro' puertro xten guidoro, rniabni gojn. Guiraareni bidxeloduxhrene bahuiireni xhi gusajc niguii ni gucxhuu ni'ni.

Bahuii Pedr xtidx Dios nen cordoor xten guidoro

¹¹ Ro' guidoroga yu' te cordoor ni laa Cordoor xten Salomón. Ro'c suga' Pedr näjza Juan, naztzu'tz niguiiga naareni. Ruxun guiraa rebejn bidzujn nen cordoorga. Bidxelojreni sa'csi arsiaj niguii ni gucxhuu ni'ni. ¹² Che bahuii Pedr lo rebejn räjpni lojreni:

—¿Xhicuent rdxeløj guejbtu, rexpejn Israel? Pet naatu nuure basiajcnu ni' niguiire. Xhet nuudire basiajcnu ni'ni. Xcuent xcälrnibee Jesucrist biajc ni' niguiire.

¹³ Xtiooznu, ni najc Xtiooz toxtadgoldoonu Abram, toxtadgoldoonu Isaac, nájza toxtadgoldoonu Jacob, lagajc Diosga abadeed yálrnibee loj Xi'nni Jesús. Niluxh la'tu bateedtuni ladzṇaa reguxhtis. Che rlajz Pila't ni rnibee nusṇaa Jesucrist, ditu nicájb niriini, alga guniyajtuni nez loj Pila't. ¹⁴ Niluxh la'tu baṛo'ntu Xi'n Dxaṇ xten Dios nani rujn ganax dzunsa'c. Alga gunabtu birii te niguii nani bagu't bejn. ¹⁵ Jesucrist rudeed yálnabajn, luxh la'tu gunabtu bacuaareni Jesucrist lo crujz. Gulássac Dios Jesucrist lo rebengut. Bahuiloonu nabajn Jesucrist, najcnu testiigw gubansac Jesucrist lo rebengut. ¹⁶ Cahuiitu loj niguiire nani gucxhuu ni'ni, luxh rumbeetuni. Xcálrnibee Jesucrist abasiajc niguiire, sa'csi huililajzni. Sa'csi huililajznu xtidx Jesucrist, ni'c biajcní te najcni si'cni rhuiituni ṇaj.

¹⁷ 'Rexpejn Israel, narä nanä di'tu niacbee, diza rex-cuxhtistu niacbee laa Xindxan xten Dios ni bacuaatu lo crujz. ¹⁸ Scree gujc te guzobj xtidx Dios ni cuaj lo guijt agujc xchero. Diidxre bacuaa reniguii ni gunii xtidx Dios, Crist xten Dios sidejd trabajwduxh. ¹⁹ Ni'cni colsiechlajztu, colguibi' loj Dios te guibicaj xtojltu. Dxejc susiályuj Dios lastootu, sujnni gac nacoob guira'ti, si'cni bia'n diidx gacni. ²⁰ Lojtu suxhaṇza Dios Jesucrist nani rnibee, nani aguleni galooli. ²¹ Naj nungäj] jia'n Jesucrist xhaguibaa dxejli guscoob Dios guiralii recos si'cni bia'n diidx gac, si'cni gunii Dios lo reniguii nani gunii xtiidxni lo retoxtadgoldootu agujc xchero. ²² Scree gunii toMoisés lo retoxtadgoldoonu, rájpní: “Xtadnu Dios suxhaṇ te niguii sa' narä nani cueni lo resa'tu. Siniini xtidx Dios. Colgusobiajg guiralii diidx nani guiniini lojtu. ²³ Renani di gusoob rextiidxni, sinitlojreni, direni gac rexpejn Dios.”

²⁴ Rájpa Pedr:

—Sigajcza agunii guiralii reniguii nani gunii xtidx Dios. Si'c agunixgaa toSamuel, nájza guiraa reniguii ni siädna-

jl̄ni, xcuent recos ni cayajc nen̄ redxejre. ²⁵ La'tu najc xajg reniguii ni gunii xtidx Dios. La'tu biannäjtu diidx nani gunii Dios loj retoxtadgoldoonu. Bia'n diidx, räjp Dios loj toxtadgoldoonu Abram: “Jiädjiajl̄ te xajglu ni gusalazduxh reben̄ guedxliuj, sa'csi suslaanireni lo dojl̄.” ²⁶ Dxejcti ganiddoo lojtu baxhaļ Dios Jesucrist te guibaa lajztu che gusiejch lajztu, te na'cru guntu dojl̄ —räjp Pedr.

4

Baluu Pedr näj Juan xtidx Dios loj reguxhtis

¹ Laļ̄ ni caniireni lo rebejn̄, ro'c bidzujn̄ rebixhojz xten Israel näjza nani rnibee lo resoldaad xten guidoro näjza resaduceos. ² Bidxe'chduxhrenei sa'csi cagulijdxrenei rebejn̄, cayäjpreni:

—Sibansac rebejn̄ lo rebengut sa'csi gubansac Jesucrist lo rebengut.

³ Gunaaz reguxhtisrenei, biäureni sa'csi agudxej luxh abiäu jusgaad. Nen̄ latzguiib barareni yääl. ⁴ Xhidajļ̄ reni biejn̄ diajg xtiidxrenei huililajz xtidx Dios. Si'cti gaii mil niguii huililajz xtidx Dios.

⁵ Che bara yääl, bachaag sa' guiraa rebengool, renani rnibee guedx Jerusalén, näjza rebejn̄ ni ruluii leii, ⁶ näjza Anás ni rnibee guiraa rebixhojz, näjza xpagojzni ni laa Caifás, näjza Juan, näjza Alejandro, näjza guiraa reniguii ni najc sa' rebixhozro ni rnibee. ⁷ Gunibeerenei biääd Pedr näjza Juan gusuj galäiireni te gunabdiidxrenei lojreni:

—¿Chu xcäl̄rnibee rajptu? ¿Chu laj basä'ttu te basiajctu niguiire?

⁸ Dxejcti sa'csi cayu Pedr diidx ni canii Sprit Dxan xten Dios nen̄ lastooni, räjpni lojreni:

—Caniä lo guejbtu, reguxhtis näjza rebengool xten rex-pejn̄ Israel, ⁹ palga canabdiidxtu xhicuent gucnäjnu niguii nani gucxhuu ni'ni, palga canabdiidxtu xho basiajcnu

niguiiga, ¹⁰ gusule'nu xcuent dee te gacbeetu te gacbeeza guiraa rexpejn Israel. Xtidx Jesucrist najc yäl̄rnibeduxh. Diidxga abasiajc ni' niguiire, xhet rajcdini suga'ni nez lojtu. La'tu abacuaatu Jesucrist lo crujz, niluxh Dios guläsni lo rebengut. ¹¹ Di'tu ninälajz xtidx Jesucrist. Laani najc si'c te guij nani rbäcajtū che runcheetu te yu'. Per Dios abejn najc Jesucrist si'c guij nani maazru nacsac, nani guyu' squiin xte yu'. ¹² Xtebtis Jesucrist ruslaa bejn lo dojl, ruti stee bejn lo guedxliuj nani baxhaļ Dios te guslaani bejn lo dojl —si'c räjp Pedr.

¹³ Che biejn diajgreni xtidx Pedr, bidxelojreni sa'csi di Pedr näjza Juan guidxejb, dizareni guitujy. Dxejcti räjp rebixhojz ni sajcrū lo sa'reni:

—Direni ganduxh guijt, bejntisreni.

Dxejcti gucbeerēni gusanäj redee Jesucrist, lojni bisiee-dreni. ¹⁴ Bahuiiza rebixhojz lo niguii ni abiajc ni'ni, suganäjni guiro'preni. Ro'cti xhetru gujcdi gunii rebixhojz sa'csi laaca bejnreni. ¹⁵ Dxejcti gunibee rebixhojz birii guidxojnreni telaad te bij rebixhojz diidx ensilaareni.

¹⁶ Räjpreni lo sa'reni:

—¿Xhi jiennäanu reniguiire? Guiraa reben Jerusalén anajn xcuent dzunroduxhre ni cayujnreni. Digacdi gucuatzlaaznuni. ¹⁷ Per te di guire'ch xtidx Jesucrist ste'ca guejdx, do'o gulijdxnu guidxojnreni te na'c guiniirēni xtidx Jesucrist ste'ca guejdx.

¹⁸ Huixisac rebixhojzreni. Dxejcti räjpreni lojreni:

—Na'c guluirutu xtidx Jesucrist, na'cru guiniitu xtiidxni.

¹⁹ Dxejc gunii Pedr näjza Juan, räjpreni lojreni:

—¿Colguinii loonu chu xtiidx sajcrū guicuaadiaagnu? ¿Xtiidx la'tu, o xtiidx Dios? ²⁰ Digacdi gusäunu ro'nu. Nanabpac gusule'nu diidx xcuent recos nani abahuiinu näjza rediidx ni abiejn diajgnu.

²¹ Balidxsac rebixhojzreni te na'cru guiniireni xtidx Jesucrist. Dxejc baslaa rebixhojz guiro'preni, sa'csi xhetru niajcdi niujnreni lo Pedr najza Juan, sa'csi canii rebejn bejnreni te dzunsa'c. Xhidajl rebejn gulä'pza xpala'n Dios sa'csi bahuiireni xhini'c gujc ro'c. ²² Sa'csi niguii ni basiajcreni xcuent yälmilagwr agudejdni tiuu ijz.

Guredx-gunab rexpejn Jesucrist lo Dios

²³ Che baslaa rebixhojz guiro'preni, gubi'reni lo sa'reni ni najc rexpejn Jesucrist. Bijreni diidx guiraa ni gunii reguxhtis xten rebixhojz najza rebengool lojreni. ²⁴ Che biejn diajg rexpejn Jesucrist xtiidxreni, tejtis xhigab bejnreni guredx-gunabreni lo Dios, räjpreni:

—Xtadnu Dios, nani benchee xhaguibaa najza guedxliuj najza nisdoo najza guira'ti ni yu' lojreni, nenreni, ²⁵ nani bejn basoob toDavid xtidx Sprit Dxa te bacuaani xtiidxlu, räjpni:

¿Xhicuent guyuduxh reben guedxliuj yärsia'?

¿Xhicuent bejn rexpejn Israel xhigab ni xhet sajcdi?

²⁶ Bidxagsa' rereii lo guedxliuj najza reguxhtis xten reguedx te gudxojnreni xtzun Dios najza xten Dad Crist nani baxhal Dios, si'c gunii toDavid.

²⁷ Aguzojb diidxre, sa'csi lo guejdxre bidxagsa' Herodes najza Poncio Pila't najza rexpejn Israel najza rebenzajt nani di gac xpejn Israel. Bidxehnäjreni Xi'nlu nani najc Crist ni baxhallu. ²⁸ Naj abejnreni dzunguijdx si'cni galooli guniilu gac. ²⁹ Naj Guejblu Xtiosnu, bahuii xho cagusacsíreni nuure, gucnäj nuure te gutiplaaznu, te na'c guidxebnu guiniinu xtiidxlu, sa'csi najcnu rexpejnu. ³⁰ Baniidx xcälrnibeelu loonu te guisiajcnu rebejn, te jienzanu redzunro, remilajgwr con xcälrnibee Xi'ndxa nu Jesucrist.

³¹ Che gulujx gurejdxreni lo Dios, gusloj canibsejz yu' cadro tre'reni, cayac si'c te xu. Dxejcti biääd Sprit Dxa xten Dios basutijpruni lastooreni. Dxejc dirureni nidxejb guniireni xtidx Dios.

Rudeedreni xhixtenreni lo sa'reni

³² Guiraa renani huililajz xtidx Dios, tejsi xhigab bejnreni. Rut chu tejdireni bejn guinibexteb xhixtenni: bachaagreni sa' rehxixtenreni te xca' guiraareni nani rquiinreni. ³³ Gucnäj Dios reapost, gusutzu'tzreni bi-jreni diidx bahuilojreni loj Jesucrist che gubansacni lo rebengut. Gucnäj Dios guiraa rexpejn Jesucrist, luxh gopduhx reben guejdx respe'treni. ³⁴ Ni'cla tejreni di niääd xhixtenni sa'csi renani gojp xyujni, rolijzni, bato'renini, dxejcti biädnäreni xcuentni, ³⁵ badeedreni meelga lo reapost. Dxejcti gudis reapost meelga lo guiraa renani rquiinni. ³⁶ Guyu' te niguii ni laa José. Lajdxni najc Chipre, ni re' lo nisdoo. Najcni sa' rexfamil levita. Reapost gulälajni Bernabé (ni säloj xtiidxreni bejn ni rbecdxi lajz sa'ni). ³⁷ Scree gulälajrenini sa'csi bato'ni te la' yuj xtenni, dxejcti badeedni meel ni cua'ni lo reapost.

5

Ananías näj chäälni rujn dojl

¹ Guyu' stee niguii ni laa Ananías. Chäälni laa Safira. Bato'reni te la' yuj. ² Niguiire biannäjni gala' meel, dxejc sgala' meelga badeedni lo reapost si'c guiraa xcuent yujga luxh chäälni nanchee xhi cayujjni. ³ Dxejcti räjp Pedr lojni:

—Ananías, ¿xhicuent rusooblu xtidx Satanás ni rnibee lo reben dxab, ä? ¿Xhicuent rlajzlu gusgueelu Sprit Dxa xten Dios? Biannäjlu gaii meel ni cua'lu che bato'lu te la' yuj. ⁴ Che gajdlu guto' yujga, xtenluni. Che bato'lu yujga,

¿Ia xhet xtendilu meel ni cua'lu? ¿Xhicuent bejnlu xhigab neñ lastoolu gunlu dee? Loj Dios guniilu didx-xhii, xhet loodinu.

⁵ Che biejn diajg Ananías xtidx Pedr, biajbni lo yuj, gujtni. Bidxebduxh rebejn che biejn diajgreni xhi gusajcni.

⁶ Sas gubig gaii bi'n batejbreni Ananías neñ lajd. Dxejcti sanärenini huicua'tzrenini neñ baa.

⁷ Pet agujc choñ or gujtni chela bidzujñ chääł Ananías. Dini gan agujt chääłni. ⁸ Räjñ Pedr lojni:

—Gunii, ¿Ia bato'tu xyujtu si'cni naj chäällu huijni, ä? Räjñ Safira lojni:

—O'n, si'c huijni.

⁹ Dxejcti räjñ Pedr lojni:

—¿Xhicuent bejnlu tejsi xhigabguijdx con chäällu? ¿Xhicuent rlanjtu gusgheetu Sprit Dxañ xten Dios? Ro lä' siääđ renani huicua'tz chäällu. Naj nájza luj chacua'tzreni neñ baa.

¹⁰ Si'ctis biajb Safira, gutgajczani. Dxejcti bidzujñ rebi'n, bahuiireni agujtni. Dxejcti guläsrenini, biriireni huicuatzgajcnenini cuä' baa cadro biga'tz chääłni.

¹¹ Bidxebduxh guiraa rexpejn Jesucrist, nájza guiraa rebejn nani biejn diajgni recosre.

Bejn reapost xhidajł redzunro, remilagwr

¹² Xhidajł redzunro, remilagwr bejn reapost nez loj rebenguejdx. Nadxaag sa' rexpejn Jesucrist, caguchaagreni diidx neñ cordoor ni laa Salomón. ¹³ Guyu' xhidajł bejn ni di nuchaag lo rexpejn Jesucrist sa'csi bidxebbreni guchaagreni lojreni. Rebenguejdxga guläpduxhreni xpala'n rexpejn Jesucrist. ¹⁴ Neñ redxejga xhidalduxh rebejn huililajz xtidx Jesucrist, niguii sigajc gunaa. ¹⁵ Dxejcti gulääreni lo nezyuj rebejn nani cayacxhuu. Siädñä rebejn beñracxhuu naga' lo da', te gaxäjsi ted xpalañ Pedr yejcreni che ted Pedr ro'c, te si'c jiajcreni. ¹⁶ Guedx Jerusalén bidzujñ

xhidajl rebejn ni siääd ste'ca guejdx. Biädnäreni rebejn ni cayacxhuu näjza balti bejn ni yu' bendxab neñ lastooreni. Con xcälrnibee Jesucrist basiajc reapost reben racxhuu, guläazareni rebendxab neñ lastoo balti bejn.

Gudejd reapost trabajw

¹⁷ Dxejcti bidxechlajz bixhojz ni rnibee, näjza reniguii ni laa saducee, sa'csi calä'p rebenguejdx xpala'n reapost sa'csi basiajcreni reben racxhuu. ¹⁸ Gunaazreni reapost. Basäurenini neñ latzguiib. ¹⁹ Niluxh yäälga, biääd te angl xten Dios, baxhalni ro' latzguiibga. Dxejcti guläani reapost neñ latzguiib. Räjpnij lojreni:

²⁰ —Colchäj guidoro. Ro'c colguinii lo rebejn xho gac guiban näjreni Dios par tejpas.

²¹ Che biejn diajgreni si'c, rsildooru biu'reni neñ guidoro, ro'c baluiireni xtidx Dios lo rebejn.

Dxejc bixhojz nani rnibee, näjza rebengool, bachagsa'reni gurejdxreni guiraa reguxhtis xten guidoo, näjza guiraa reguxhtis xten rexpejn Israel. Dxejcti gunibereeni jädnä reguixhajg reapost nani biäu neñ ladtguiib. ²² Che bidzujn reguixhajg latzguiib, bahuui reguixhajg neñ latzguiibga, niluxh rut yu'di neñ latzguiib. Che gubi'reni biädnäreni diidx, räjpreni loj reguxhtis:

²³ —Che bidzunu latzguiib, niäudzu'tz ro' latzguiib luxh resoldaad ni cayajp ro' latzguiib suga' guiro'p laad. Che baxhalnu ro' latzguiib, rut yu'di neñ latzguiib.

²⁴ Che biejn diajg bixhojz ni rnibee, näjza capitán nani rnibee resoldaad xten guidoro, näjza rebixhojz, ben tio'p lajzreni, räjpnij lo sa'reni:

—¿Xhini'c gujc? ¿Xhoni gac naj? —räjpreni.

²⁵ Dxejcti bidzujn te niguii, räjpnij lojreni:

—Reniguii ni basäutu neñ latzguiib, areni suga' neñ guidoro, luxh caguluiireni rebejn —räjpnij.

²⁶ Dxejcti sanä capitán xten resoldaad rexcuxhtis guidoro te biädnäreni reapost, luxh direni nusacsí reapost sa'csi rdxejbreni nucuaarení guij yejcreni. ²⁷ Che bidzunñäjreni reapost, räjpreni suurení nez loj reguxhtis xten Israel, sas gunii bixhojz ni rnibee, ²⁸ räjpni loj reapost:

—¿Et agunibeenu lojtu na'cru guiniitu xtidx Jesucrist? Xhoxh naj cagutie'chtu rediidxga lo guiraa rebejn̄ neñ̄ guedx Jerusalén. La'tu rlanjtu cuaquijtu nuure bagu'tnu Jesucrist.

²⁹ Dxejc räjp Pedr näjza reapost lojreni:

—Nanabpac gusoobnu xtidx Dios, lacuaa gusoobnu xtidx bejn̄. ³⁰ Bagu'ttu Jesucrist che bacuaatuni lo cruzj. Niluxh Xtios xtadgoldoonu guläsni lo rebengut. ³¹ Naj agule'c Diosni xladbeeni cadro rnibeeni, abadeedza Dios yälrnibee loj Jesucrist te guslaani nuure, te si'c rlanjzni guibicaj xtoj̄l guiraa rexpejn̄ Israel nani gusiechlanjzreni. ³² Bahuiloonu xhi bejn̄ Dios. Ni'c cagusule'nu. Nadoncheenu Sprit Dxan xten Dios cayacnäj nuure te gusule'nu rediidxre. Badeed Dios Sprit Dxan xtenni lo guiraa renani susoob xtiidxni.

³³ Che biejn̄ diajg reguxhtis rediidxga, bidxechduxhreni, rlanjzreni nugu'treni reapost.

³⁴ Dxejcti huisulii te niguui ni laa Gamaliel, nani najc te farisee nani ruluii leii xten Israel, rebejn̄ rapduxh respe't dade'ga. Gunibee Gamaliel guirii reapost neñ̄ yu'ga.

³⁵ Dxejcti räjp Gamaliel lo rebixhojz:

—Guejbtu rexpejn̄ Israel, colyensa'c xhigab xhini'c rlanjtu gunñäjtu reniguiire. ³⁶ Colzaa lajztu gajd gac xchej guyu' tej ni laa Teudas, räjpni rnibeduxhni. Dxejc huinajl tajp gayuu bejn̄ni. Che bagu'trenini, bire'ch guiraa rexpejn̄ni, xhetru bejndireni. ³⁷ Neñ̄ ijz ni guyu' cens, biriiza Judas ni siääd Galilee. Dxejc gurejdxni xhidajl bejn̄ ni

huinajlni. Bagu'tza bejn̄ni, dxejcti bire'chza guiraa reni huinajlni. ³⁸ Naj rniä, colguibicaj, colgusaan reniguiire, rexpejn̄ Jesús. Palga guejbcareni cayujnreni dzuunre, xtebcani sinitlojni. ³⁹ Palga xtzuum Dios ni cayujnreni, digacdi guscuaäznu dzuunga, sa'csi guidiñnu guidxe'ch Gueb Dios loonu.

⁴⁰ Bichagljaj rebixhojz xtiidx Gamaliel. Gurejdxreni reapost, dxejcti gudijnreni reapost, gunibeereni loj reapost na'cru guiniireni xtidx Jesús. Dxejc baslaarenini. ⁴¹ Biriitireni nez loj rebixhojz. Cabaduxh lajzreni sa'csi gujc gudejdreni trabajw xcuent Jesucrist. ⁴² Guixe-guixee laltis baluiireni xtidx Jesucrist nen̄ guidoro näjza rolizj bejn̄. Cagusule'reni diidx lo rexpen̄ Israel:

—Jesús najc Crist nani cabäätzu jiääd.

6

Gulereni reniguii ni gudeed yätxtiil lo rexpejn̄ Jesucrist

¹ Nen̄ redxejga, xhidalro gujc rexpejn̄ Jesucrist. Niluxh gusloj camojm̄ rexpejn̄ Jesucrist nani rnii didx griegw. Räjpreni:

—Xhet laadi cayujn rebejn̄ ni rnii didx hebreo. Rebiuud nani rnii didx hebreo rca'ru loj rexpiuudnu. Rebiuud ni rnii didx hebreo rca'ru xhi gaureni che rguisreni xhi gau rebiuud guixe-guixee.

² Dxejcti batie' guitzubitio'p reapost guiraa rexpejn̄ Jesucrist, räjpreni lo guiraaren̄i:

—Et laadi guisaannu guluiinu xtidx Dios te quisnu xhi gau rebiuud. ³ Ni'c nanab cuetu lo resa'tu gajtz niguii nani najntu najc beñsa'c, nani rbäjz Sprit Dxan xten Dios nen̄ lastooreni, nani yu' xcäriejnreni. Reniguiire quis xhi gaureni. ⁴ Te si'c sajc chanuutis guiniabnu lo Dios, guiluiizanu xtidx Dios lo rebejn̄.

⁵ Guiralii rebejn̄ga bidxaglajzreni diidxga. Dxejcti gulereni Esteban, te niguii ni rililajzpac xtidx Dios, rbäjzza Sprit Dxan xten Dios neñ lastooni. Gulezarenı Felipe, Prócoro, Nicanor, Timón, Parmenas; gulezarenı Nicolás nani siääd guedx Antioquía. Nicolás najc te proselite, nalajznu, dini gac xpejn̄ Israel, per basoobni xleii toMoisés che gajdni chalilajz xtidx Jesucrist. ⁶ Sas biädñä rexpejn̄ Jesús guigajtz niguiiga lo reapost. Dxejcti guredx-gunab reapost lo Dios xcuent reniguiiga, batzuubreni ñaarenı yejc reniguiiga si'c te seen abiu'reni lo xtzuunrenı.

⁷ Birechduxh xtidx Dios. Xhidajl beñ Jerusalén huililajz xtidx Dios, näjza xhidajl bixhojz.

Gunaazrenı Esteban sanärenıni lo rebixhojz nani rnıbee

⁸ Gucnäduxh Dios Esteban, bejnıni redzunro, remilagwr nez lo rebejn̄. ⁹ Dxejc reben̄ guidoo ni laa Libertados gusloj cadılñäj Esteban. Lojrenı nadxaag beñ Cirene, näjza beñ Alejandría, näjza gaii beñ Cilicia, näjza sgaii bejn̄ ni siääd reguedx Asia. ¹⁰ Reniguiire di nıajcdı nuzejcreni diidx lo Esteban, sa'csi nasıñduxhni, luxh cayacñäj Sprit Dxan xten Diosni. ¹¹ Dxejcti baquılrenı sgaii niguii ni di gac xpejn̄ Jesús, te räjprenı:

—Biejn diaagnu canıyaj Esteban toMoisés näjza Dios.

¹² Scree gujc bache'chrenı rebejn̄ näjza rebejn̄ ni ruluii leii näjza rebengool. Dxejcti bachagsa'reni, gunaazrenı Esteban. Huinärenıni lo reguxhtis xten Israel. ¹³ Dxejcti biädñärenı reniguii nani baquılrenı te gunıireni didx-xhii. Räjp reniguiire:

—Entis rnıyaj Esteban leii xten toMoisés näjza guidodxanre. ¹⁴ Abiejnza diaagnu gunıi Esteban: “Jesús nazareno sutzujl guidoro, suchaazani leii nani baniidx toMoisés loonu.”

¹⁵ Dxejcti guiraa rebejn ni sobga' ro'c bahuiireni lo Esteban, bahuiireni rujn lojni si'c rujn loj te angl xten Dios.

7

Diidx ni basule' Esteban lo rebixhojz

¹ Dxejcti räjp te bixhojz nani rnibee lo Esteban:

—¿La gulií si'c guniilu, ä?

² Räjp Esteban lojreni:

—Colgucuadaiajg rextidxä, guejbtu dad, näjza resa'ä. Xtioznu ni sacduxh, ni rnibee, baluiloj lo toxtadgoldoonu Abram che guläjnzi Mesopotamia, che gajdni chaläjz nen guedx Harán. ³ Räjp Dios loj toAbram: “Birii lajdxtu, basa'n guiraa resa'lu. Huij cadrotis guluiä lojlu” ⁴—räjp Esteban—. Dxejcti birii toAbram lajdx reCaldeos. Huiläjzni guedx Harán. Che gujt xtadni, biädnä Dios toAbram nez ree, cadre rbääznu naj. ⁵ Di Dios nuzalajz nicla tla' yuj cadre suu te ni' toAbram. Niluxh räjp Dios sudeedni yujga lo rexajg toAbram, jiannäjreni yujga che guet toAbram. Niluxh nicla gajd xi'n toAbram chu dxejc. ⁶ Stee huält räjp Dios lo toAbram: “Rexi'nlu, rexagdoolu, siläjzreni si'c benzijt. Ladxbejn gacreni mos, ro'c susacsí bejnreni si'cti tajp gayuu ijz.” ⁷ Räjp Dios: “Narä sunä castiigw rebejn ni gusacsíreni che najczeni mos. Narä cuää rexagdoolu ro'c, te ree guzuxhijbreni loä nen guejdxre”, si'c räjp Dios ⁸—räjpa Esteban—. Dxejcti si'c bia'n Dios diidx con toAbram, gunibee Dios gutiuug Abram lagajc laani, te chuni bee; ni'c najc te seen xten diidx ni bia'n Dios con Abram. Guyu' te xi'n toAbram, ni laa Isaac. Che guyu'ni xhujn dxej, basälza toAbram beegani si'c te seenza. Sigajcza bennäj Isaac xi'nni Jacoob. Sigajcza bennäj Jacoob guitzubitio'p rexi'nni nani najc rexpengoldoo xpen Israel.

⁹ Räj̄p Esteban:

—Guitzubiteb rexi'n Jacobo guyu' te yälrudxojn lo bejtzreni José. Dxejc bato'reni José lo te beñ Egipto. Dxejc Dios goptzu'tz José. ¹⁰ Che gudejd José trabajwduxh, gucnäy Diosni. Badeed Dios yäl̄nasin̄duxh lojni. Bejn Dios bichagljaz̄ reīi Faraón José. Badeed reīi Faraón guj̄cni gubernadoor xten Egipto. Gunibeeza José guira'ti xhixten reīiga.

¹¹ Räj̄pza Esteban:

—Che bidzuj̄n dxej gujc te gubijn, guiraa neñ reguedx Egipto näjza guiraa neñ reguedx Canaán, trabajwduxh cadejd guiraa rebejn̄. Xhet guyu'di xhi niajw retoxtadgoldoonu. ¹² Che biejn diajg xtadgoldoonu Jacobo yu' xhi gaureni neñ reguejdx xten Egipto, ro'c baxhal̄ni rexi'nni, bica'reni xhi gaureni te huält. ¹³ Che huijreni stehuält, dxejc bazäbdiidx José lojreni laani najc bejtzreni. Biembeza Faraón resa' José. ¹⁴ Dxejcti baxhal̄ José diidx jiäd xtadni Jacobo, näjza guiraa resa'ni, cuääzreni Egipto. Najc rebejn̄ga si'cti gayon̄bitzubigaīi bejn̄. ¹⁵ Si'c gujc te huij Jacobo guedx Egipto. Ro'c guläjz̄ni, ro'c gujt̄ni. Ro'c gujtza retoxtadgoldoonu. ¹⁶ Dxejcti huinäreni rextzuj̄treni loj Siquem te biga'tzsacreni neñ baa nani gusii toxtadgolnu Abram lo rexi'n Hamor neñ guedx Siquem.

¹⁷ Räj̄p Esteban:

—Che bidzungaj̄xh dxej, si'c diidx ni bia'n Dios con toxtadgoldoonu Abram, bidalduxh rexpengoldoonu neñ guedx Egipto. ¹⁸ Dxejcti guyu' te xreīi Egipto ni di gan guiraa redzunsac nani bejn toxtadgoldoonu José. ¹⁹ Reīiga basgueeni rexpengoldoonu, basacs̄nireni, trabajwduxh bateedni rexpengoldoonu. Gunibee reīiga basäl̄reni guiraa rebäz niguīi te di laareni, te guetreni. ²⁰ Neñ redxejga, gojl Moisés. Che gujc Moisés báz, te báz daani, saru ruj̄n lojni, huinäljaz̄ Diosni. Gułaani chon̄

bäii rolijzni. ²¹ Dxejc huisälrenini, te guzojb xtidx Faraón. Dxejc lagajc xindxa'p Faraón bidxälni Moisés, cua'nini baslaanini si'c xi'nmi. ²² Bisieed Moisés guiraa ni najn reben Egipto. Gunisa'cni diidx, bensa'cni dzuun.

²³ Räj p Esteban:

—Che guyu'ni tiuu ijz, banaj lajzni resa'ni ni najc xpejn Israel, huijni cadro rbäjzreni. ²⁴ Dxejc bahuiini casacsí te ben Egipto te ben sa'ni. Sas bagu'tni ben Egipto. ²⁵ Bejn Moisés xhigab pet sacbee resa'ni cayacnä j Diosni te guslaani rexpejn. Luxh di resa'ni niacbee si'c. ²⁶ Che bara yääl, bahuii Moisés cadilnä j sa'reni tiop xpen Israel. Räj p Moisés lojreni: “Colcuedxi, Dad. Lagajc sa'tu cadilnä jtu. ¿Xhicuent rdijltu?” si'c gunii Moisés, te na'cru tilnä j sa'reni. ²⁷ Dxejcti nani cayunniälajzga, balanaani Moisés, räjpni loj Moisés: “¿Chu baniidx yälrnibee lojlu te jädnibeelu nuure? ²⁸ ¿La rlaizlu ju'tlu narä si'c bagu'tlu ben Egipto naii?” —räjpni—. ²⁹ Che biejn diajg Moisés rediidxga, baxunni, huijni zijt. Huiläzsijcni guedx Madián. Ro'c bachnaani, guyu' tiop xingaanni.

³⁰ Räj pza Esteban:

—Che gudejd tiuu ijz, bidzujn te dxej cansajni nez lo reyubijdz ni naga' guideb gabi dajn ni laa Sinaí. Ro'c bahuiini te bajl nen te yaguejch. Nen bajlga baluiloj angl xten Dios lo Moisés. ³¹ Bidxeloduxh Moisés che bahuiini si'c. Dxejcti gubigni te rlaizni nuhuisa'cni yajgga. Dxejc biejn diajgni gunii Dios, räjpni lo Moisés: ³² “Narä nacä Xtios rextadgoldoolu, narä nacä Dios xten Abram, näjza xten Isaac näjza xten Jacob.” Dxejcti gucsez Moisés sa'csi bidxebduxhni, diruni nuhuisa'c yajgga. ³³ Dxejcti räjp Dios lojni: “Gulää xcura'chlu. Yuj cadro suga'lu najc dxan, sa'csi narä yu'ä ree. ³⁴ Abahuiä xho cagusacsí reben Egipto rexpenä. Abiejn diagä xho roonreni. Naj abiälä te guslää rexpenä. Gudaa naj, suxhalälu chäälü Egipto.”

³⁵ Rāj̄p Esteban:

—Dios badeed yāl̄rnibee lo Moisés nani baze' retoxtadgoldoonu che rāj̄preni: “¿Chu baniidx yāl̄rnibee lojlu te jīād̄nibeelu nuure?” Baxha| Dios Moisés te guinibeeni xpej̄n Dios, gucnāj̄za Dios Moisés baslāāni rexpej̄nni neñ nació̄n Egipto si'c gunii angl xten Dios che baluiloj̄ni lo Moisés neñ yaguejchga. ³⁶ Gulāā Moisés rebej̄nga. Ganiddoo bejn Moisés redzunro, yāl̄rdxeloj̄ neñ nació̄n Egipto nāj̄za ro' nisdoo ni laa nisdoo xniaa. Tiuu ijz cuansaj̄ retoxtadgoldoonu neñ yubijdzroga, ro'c bejnza Moisés redzunro, remilagwr. ³⁷ Lagajc Moisésre gunii xtidx Dios che rāj̄pni loj̄ rexpej̄n Israel: “Sibe Dios lo rexajgtu te niguii ni najc sigac narā. Siniini xtidx Dios. Colgusoob xtiidxni.” ³⁸ Lagajc Moisés guyunāj̄ rebej̄n neñ yubidzro. Xangl Dios gunināj̄ Moisés neñ dajn xten Sinaí. Dxejcti badeed Moisés rediidx ni gunibee Dios lo retoxtadgoldoonu. Laareni basa'nreni diidxga loonu.

³⁹ Rāj̄p Esteban:

—Niluxh di retoxtadgoldoonu nusoob rextidx Moisés. Di rljzreni guinibee Moisésreni. Canaduxhrljzreni nació̄n Egipto. ⁴⁰ Che sää Moisés dajn Sinaí, rāj̄preni loj̄ Aarón bejtz Moisés: “Benchee banāj̄b gac xtiooznu, te nidreni loonu, te chanajlnureni. Chu gan con Moisésre ni baluui nezyuj che gulāāni nuure guejdx reEgipto.” ⁴¹ Sas bencheereni te banāj̄b ni najc si'c te gonbāz. Dxejcti bagu'treni guidxaa te badeedreni rejnga lo banāj̄b te bazuxhijbreni lojni. Bibalazduxhreni sa'csi abencheereni banāj̄bga. ⁴² Dxejcti gubicaj Dios loj̄ rexpej̄n Israel sa'csi bejnreni si'c. Basaan Dios goj̄nreni gubijdx, nāj̄za bāii, nāj̄za rebal xhaguibaa. Guj̄cni si'cni caj lo guijtz ni bejn reniguii nani bacuaa rextidx Dios. Rāj̄p Dios: La'tu beñ Israel, cheni cuansajtu tiuu ijz nez lo reyubijdz, ¿la par narā bagu'ttu guidxaa, ä?

¿La loä baniidxtu xtiejnreni, ä?

⁴³ Xho gacni si'c, räjp Dios.

Cuansanäjtu te yu' najcw guijd cadro chu te banäj**þ**.

Neng**g**a guyu' banäj**þ** ni laa Moloc, nani najtu najc xtiostu.

Gojnzatu balbäze' xten xtiostu ni laa Remfán.

Redios ni bencheetistu reni'c gojntu.

Ni'cni sibää la'tu ree guxhalä la'tu stelaad guedx Babilonia.

⁴⁴ Guniiru Esteban, räjpni lojreni:

—Nen reybijdz gojp retoxtadgoldoonu te yu' najcwni guijd. Gujcn**i** xquidooreni. Ro'c guninäjreni Dios. Benchee retoxtadgoldoonu yu' najcw guijdga si'cni gunibee Dios che baluini lo Moisés xhoni gacni. ⁴⁵ Che gujt Moisés, Josué gunibee lacuaa to Moisés, huinäni retoxtadgoldoonu nación Canaán. Batzujlreni yuro ni najcw guijd te näj ni'c huinäreni Canaán. Gulää Dios rebejn**ñ** ni guläjz nen reguedx Canaán. Dxejcti bia'n retoxtadgoldoonu nen reguejdxga. Bazuxhijbreni lo Dios nen yuguijd ni najc xquidooreni che gojlli xtiemp reii David. ⁴⁶ Huinä**l**ajz Dios David. Räjp David lo Dios: “Rlazä gunä te guidoo par guejblu, Dios xten nuure, rexpejn**ñ** Israel.” ⁴⁷ Dxejcti di Dios nusoob xtidx David. Alga Salomón, xi'n David, ni'c benchee xquidoro Dios. ⁴⁸ Naj di Dios guiquiin te yu' nani runchee bejn**ñ**. Scree bacuaa te niguii nani gunii xtidx Dios. Räjp Dios:

⁴⁹ Si'c najc te yagxhilsa'c cadro rnibee reii, si'c najc xhaguibaa cadro rbeä.

Si'c te bancw cadro rsiuj ni' reii, si'c najc guedxliuj nani bencheä.

Dina guiquinä guncheetu te xyu'ä.

Dina guiquinä te lajt cadro gusilazä, räjp Dios.

⁵⁰ ¿La et naädi benchee guiraa nani ruhuiitu?, räjp Dios.

⁵¹ Räjp Esteban lojreni:

—Te beṇ nadduxh najctu. Ditu jiu xtidx Dios. Niäu lastootu, niäuza diajgtu. Di'tu chanälajz xtzuun Sprit Dxan xten Dios, dizani cuääz neṇ lastootu. Si'c beṇ retoxtadgoldootu, si'cza rujntu. ⁵² Basacsí retoxtadgoldootu guiralii reniguii nani gunii xtidx Dios. Nicla tejni direni niu. Bagu't retoxtadgoldootu guiraa reniguii nani gunii siääd te niguidxan xten Dios. Naj abiääd niguidxanga, Jesucrist laani, luxh la'tu huinätuni lo guxhtis te gunibeetu gujtni. ⁵³ La'tu biannäjtu leii nani gunii reangl xten Dios loj Moisés, luxh la'tu ditu nucuadiajg rediidxga.

Bagu'treni Esteban

⁵⁴ Che biejn diajgreni rextidx Esteban, bidxe'chduxhreni, rauya' läijreni sa'csi rdxe'chreni lo Esteban. ⁵⁵ Rbäjz Sprit Dxan xten Dios neṇ lastoo Esteban, ni'cni bahuitzu'tzni xhaguibaa, ro'c bahuiini yälrdimbichasejz xten Dios. Bahuiizani suga' Jesucrist xladbee Dios. ⁵⁶ Räjþ Esteban lojreni:

—Colhuilaa. Narä cahuiä xhaguibaa cadre yu' Dios, ruhuiäza loj Xi'n Dios nani gujc Niguii; ani suga' xladbee Dios.

⁵⁷ Guredxaduxhreni basäuzareni diajgreni. Dxejcti baxunreni bixa'treni yejc Esteban. ⁵⁸ Dxejc gudobyujrenini, gulääreni Esteban neṇ guejdxga. Ro'c bacuaareni guij yejc Esteban. Che cagucuaareni guij yejcn, guläyalreni xhajbreni; te niguii ni laa Saulo biannäj xhajbreni. ⁵⁹ Laṇ ni cagucuaareni guij yejcn, gunii Esteban loj Jesucrist räjpni:

—Guejblu, Dad Jesucrist, cua' narä.

⁶⁰ Dxejcti biajb Esteban, bazuxhibni, guredxa'ni räjpni:

—Dad Jesucrist, na'c gudzuublu dojlre yejc rebejnre, na'c cagucuaquijlureni.

Gulujxsi guniini si'c, gujtni.

8

Saulo basacsí rexpejn Jesucrist

¹ Rbaduxh lajz Saulo bagu'treni Esteban.

Lagajc dxejga gusloj gudejd rexpejn Jesucrist traba-jwduxh neñ guedx Jerusalén. Dxejcti bire'ch rexpejn Jesucrist. Biunejzreni ro'c sääreni nez guiraa reguedx Judea näjza nez guiraa reguedx Samaria. Xtebtis reapost bia'n Jerusalén, direni nire'ch.

² Reniguii nani sanälajz Dios huicua'tz Esteban. Cayon-duxhreni sa'csi riareni gujt Esteban. ³ Biäädza Saulo, guixe-guixee basacsíni rebejn nani huililajz xtidx Dios. Biu'ni rolijzreni, gunaazni reniguii näjza regunaa te basäunireni neñ latzguiib.

Basule' rexpejn Jesucrist xtidx Dios nez región Samaria

⁴ Che bire'ch rebejn nani huililajz xtidx Dios, basule'reni xtidx Dios nez cadrotis sääreni. ⁵ Tej rebejnnga laa Felipe. Siini nez te guedx Samaria. Ro'c basule'ni xtidx Dios. Räjpní:

—Jesús najc Crist nani cabäjztu jiääd.

⁶ Ro'c bachagsa' rebejn bacuadiajgreni rextidx Felipe, bahuiizareni redzunro, remilagwr nani bejn Felipe. ⁷ Gaii bejn yu' beñdxab neñ lastooreni. Che gunibee Felipe guirii rebendxab lastoo rebejnnga, guredxa' rebendxabga, dxejcti biriireni neñ lastoo rebejnnga. Yu'za xhidajl bejn nani digacdiru guiniib, yu'za reni rajc ni'reni, ñaareni. Con xcälrnibee Jesucrist basiajc Felipe guiraa rebejnnga. ⁸ Sa'csi gujc si'c, bibalazduxh guiraa rebejn neñ guejdxga.

⁹ Guyu' te niguii ni laa Simón neñ guejdxga. Bisieedni bejnni xhidajl redzuun yälbidxaa, basgueeni rebenguejdxga. Bidxeloduxh rebenguejdx lojni. Räjpní lo rebejn rutru chu stee bejn ni najc maazru beñro lojni. ¹⁰ Luxh

guiraa rebejn, rebiuux, rebengool, rebenrajp, rebenproof
bacuadiajgreni xtidx bidxaaga, räjpreni:

—Laani rajpni yälrnibee xten Dios.

¹¹ Xchero basgueeni rebejn, bidxelojreni rextzun-
yälbidxaani. Guiraa rebejn huililajz xtiidxni. ¹² Dxejcti
baluii Felipe xcuent xcälrnibee Dios, näjza xcuent Je-
sucrist. Xhidajl rebenguejdxga huililajz rediidx nani
gunii Felipe. Dxejcti birobnisreni, niguii näjza gunaa.
¹³ Nägajcza Simón huililajz rediidxga dxejc gurobniszani.
Dxejc guyunäj Simón Felipe. Che bahuii Simón lo
redzunro, remilagwr nani cayujn Felipe, bidxeloduxh
Simón.

¹⁴ Che biejn diajg reapost ni yu' guedx Jerusalén
huililajz reben Samaria xtidx Dios, baxhalreni Pedr näjza
Juan ro'c. ¹⁵ Che bidzujn guiro'preni guejdxga, gunabreni
lo Dios xcuent rebejn ni huililajzga te gudeed Dios Sprit
Dxan xtenni lojreni, ¹⁶ sa'csi gajd Sprit Dxan xten Dios
jädläjz nen lastooreni. Che huililajzreni, gurobnistis-
reni te gucbee rebejn chuni'c najc rexpejn Jesucrist.
¹⁷ Dxejc batzuub Pedr näjza Juan naareni yejc tejga renani
ahuililajz xtidx Dios, dxejc badeed Dios Sprit Dxan xtenni
biädläjzni nen lastooreni.

¹⁸ Che bahuii Simón biädläjz Sprit Dxan xten Dios lastoo
rebejn ni batzuub reapost naani yejcreni, rlajz Simón
nudeedni meel loj reapost, ¹⁹ räjpni lojreni:

—Colguniidx yälrnibee loä te si'cza gudzubä naä yejc
rebejn, te jiu' Sprit Dxan xten Dios nen lastooreni.

²⁰ Dxejcti räjp Pedr lojni:

—¡Sunitloj xmeellu con luj! Xho gunlu xhigab siilu
Sprit Dxan xten Dios nani rudedxlia' Dios. ²¹ Digacdi
gunlu dzuun ni riennu, sa'csi xhet laadi najc lastoolu nez
loj Dios; yu' dojl nen lastoolu. ²² Basie'ch lajzlu, badzucaj
rexhigab guijdx xtenlu. Guredx-gunab lo Dios, top susiäj!

lajz Dios xtojllu ni bejnlu neñ lastoolu. ²³ Naj narä nanä ruguilazduxhlu, luxh runduxhlu xhigabguijdx.

²⁴ Dxejcti räjp Simón lo guiro'preni:

—Colnab loj Dios xcuentä te na'c sacä si'cni caniiitu.

²⁵ Che gulujxti bijreni diidx xcuent ni bahuilojreni bejn Jesucrist, che gulujx basule'reni xtidx Jesucrist loj reben Samaria, gubisacreni Jerusalén.

Felipe näjza te dade' ni siääd nación Etiopía

²⁶ Dxejcti biääd te xangl Dios, räjpni lo Felipe:

—Huij lo nezyuj ni rii guedx Jerusalén, ni rij nez guedx Gaza. Nezyujga rdejd lo reyubijdz.

²⁷ Sä'ti Felipe. Che bidzujñni lo nezyujga, bidxaagni te dade' ni siääd nación Etiopía. Najcni te eunuco, najczani xcuxhtis reina Candace. Laani rgucheeni guiraa xmeel reinaga. Biääd dade'ga guedx Jerusalén te sagajñni Dios.

²⁸ Siääd bisacni lajdxni. Sobga'ni neñ te gare't saruduxh, cayolni xtidx Isaías, nani bacuaa xtidx Dios agujc xchero.

²⁹ Dxejcti räjp angl xten Dios lo Felipe:

—Gubig cuä' gare'tga, guninäj dade'ga.

³⁰ Che gubig Felipe cuä' gare'tga, biejn diajgni cayol dade'ga rextidx Isaías. Dxejcti räjp Felipe lojni:

—¿La rabeelu ni caj lo guijtznani cayollu, ä?

³¹ Dxejcti räjp dade'ga lojni:

—¿Xho gacbeäni palga rut gusule'dini loä?

Sas räjp dade'ga lo Felipe chä'pni neñ gare'tga.

³² Cadro cayol dade'ga neñ guijtznani caj xtidx Dios rni scree:

Di xiil cuedxa' che rinä bejñni cadro guetni;

dxitis raa xiil che ruhuajrenini.

Si'c te xiil najc niguiire,

xhet rniidini mase rusacsíduxhrenini.

³³ Basacsíduxhrenini.

Reguxhtis ni niujn yälguxhtisni xhet laliidi bejnreni.

Xhet si'cti nunyäjĭ gunreni.

¿Xho guiniinu yu' xpejñni?

Ni abagu'trenini. Diruni guibajñ lo guedxliuj.

³⁴ Dxejcti gunabdiidx beñ Etiopía, rájpnĭ lo Felipe:

—Gunilaa loä, chuni'c ruzä't niguii nani bacuaa reguijtzre, ¿la ruzä'tni lagajc laani o la ruzä'tni ste'ca bejñ, ä?

³⁵ Gusloj basule' Felipe rediidx nani abĭl dade'ga. Dxejcti basule'ni rediidx xcuent Jesucrist. ³⁶ Laĭ ni sääreni lo nezyuj, bidzujñreni te lajt cadre yu' nis. Dxejc rájpnĭ dade'ga lo Felipe:

—¿Bahuii, ree yu' nis! ¿Xhi rudxojn tiobnisä?

³⁷ Dxejc rájpnĭ Felipe lojni:

—Palga rililajzlu xtidx Dios neñ lastoolu, sajc tiobnislu.

Dxejc rájpnĭ dade'ga lo Felipe:

—Rililazä Jesús najc Crist Xi'n Dios.

³⁸ Dxejc gunibee dade'ga gusudxi gare't, sas biäjť guiro'preni, biu'reni neñ nis, ro'c batiobnis Felipe dade'ga. ³⁹ Che biriireni neñ nis, huinä Sprit Dxañ xten Dios Felipe ste'ca lajt. Dxejc diru dade'ga nuhui lo Felipe. Sä'ti dade'ga lajdxni, cabalazduxhni. ⁴⁰ Dxejcti chela gucbee Felipe abidzujñni guedx Azoto. Baluiizani xtidx Dios neñ guiraa reguejdx che bidzujñlini guedx Cesarea.

9

Huililajz Saulo rextidx Jesucrist

(Hch. 22:6-16; 26:12-18)

¹ Laĭtis cagusacsĭ Saulo rexpejñ Jesucrist. Rlajzni ju'tni guiraareni, ni'c huijni lo bixhojz nani rnibee, ² gunabni gac te guijtz chanäni lo reguidoö neñ guedx Damasco te palga guidxälñi reni najc xpejñ Jesucrist neñ reguidooga, niguii sigac gunaa, guliibnireni, jiädñnireni guedx Jerusalén te jiäureni. ³ Laĭ sasajni lo nezyuj, asiäd-dzungajxhni guedx Damasco, basaniya' te bal xhaguibaa,

basanijni guideb gabi cadre siädsaj Saulo. ⁴ Dxejc biajbni lo yuj, biejn diajgni te xse' bejn nani canii lojni:

—Saulo, Saulo, ¿xhicuent rusacsflu narä, näjza rex-pena?

⁵ Räjpn Saulo lojni:

—¿Chuluj Dad?

Räjpn lo Saulo:

—Narä nacä Jesucrist, nani cagusacsíduxhlu. Niluxh lagajc luj cadejdlu trabajw si'c rajc te gon ni rucuani' yejc caru'ch.

⁶ Bidxebduxh Saulo, racsejsni räjpn:

—Dad, ¿xhini'c rlajzlu gunä?

Dxejc räjpn Jesús loj Saulo:

—Huistie, biu' guedx Damasco. Ro'c sului te niguii xhini'c gunlu.

⁷ Rebejn ni siädnä Saulo sugadxireni, bidxejbreni sa'csi biejn diajgreni te xse' bejn, luxh rut lojdi bahuiireni.

⁸ Che huistie Saulo lo yuj, baxhalni lojni, niluxh di lojni jien. Dxejc gunaazreni ñaani, sanärenini guedx Damasco.

⁹ Ro'c guyu'ni choñ dxej, natiä'p balojni, dini niä', dizani niajw.

¹⁰ Guedx Damasco rbäjz te xpejn Jesucrist ni laa Ananías. Baluiloj Jesucrist loj Ananías lo te bacal, räjpn Jesucrist lojni:

—Ananías.

Dxejc räjpn Ananías lojni:

—Anaree Dad.

¹¹ Räjpn Jesucrist lojni:

—Huistie te cháälu lo nezyuj ni laa Ladbee cad rbäjz Judas. Ro'c guiniabdiidxlu con te niguii ni laa Saulo, bejn Tarso. Cabejdx, canabni loä naj. ¹² Lo bacal abahuiini siäd te niguii ni laa Ananías te gutzuubni ñaani yejcn te fiini stehuält.

¹³ Dxejcti räjpn Ananías lojni:

—Dad, abiejn diagä xho basacsí niguiiga rexpejnlu nen guedx Jerusalén. ¹⁴ Luxh rebixhojz ni rnibee abadeed guijtz lojni te guiniaazni ree guiraa rebejn nani rbedx-rniab lojlu, chanänireni jäüreni.

¹⁵ Dxejcti räjp Jesucrist lojni:

—Huij, narä aguleäni te gunni xtzunä. Suluiini xtidxä loj rebenzijt nani digac xpen Israel, näjza loj reni rnibee renacion, näjza loj rexpejn Israel. ¹⁶ Narä suluiä lo Saulo trabajwduxh ni tedni te jäädnajlni narä.

¹⁷ Dxejcti säa Ananías, bidzujnni ro yu' cadre rbäzlaa Saulo. Batzuubni naani yejc Saulo. Dxejcti räjp Ananías loj Saulo:

—Betzä Saulo, Jesucrist ni rnibee, nani baluiloj lojlu lo nezyuj cheni siäädlu, lagajc laani baxhalni narä te fiilu stehuält, te jäädläzza Sprit Dxan xten Dios nen lastoolu.

¹⁸ Lagajc dxejc bitejb si'c xmelbäjl yec baloj Saulo, biacgajc balojni, bahuisa'cni stehuält. Dxejc huistieni, gurobnisgajcni. ¹⁹ Dxejc gudajwni, guc nadaanni stehuält. Xchej guyunäj Saulo rexpejn Jesucrist nen guedx Damasco.

Gusloj basule' Saulo xtidx Dios nen guedx Damasco

²⁰ Dxejcti gusloj basule' Saulo xtidx Dios nen reguidoo xten rexpejn Israel, räjpni:

—Jesucrist najc Xi'n Dios nani gujc Niguii.

²¹ Che biejn diajgreni xtiidxni, bidxelojreni, räjp lo sa'reni:

—¿La xhet laadi niguiire ni rusäu rexpejn Jesucrist nen latzguuib guedx Jerusalén, ä? Lagajcza dee bidzujnni ree te guliibni rexpejn Jesucrist te chanänireni guedx Jerusalén lo rebixhojz.

²² Dxejcti gusutzu'tz Saulo guniini xtidx Dios. Basacajnni rexpejn Israel nani rbäjz Damasco sa'csi basule'pacni Jesús najc Crist nani rnibee.

Baxun Saulo guedx Damasco

²³ Che gudejd xhidajl dxej, bachagsa' rexpejn Israel te nugu'treni Saulo. ²⁴ Dxejcti gucbee Saulo xhi xhigab bejnreni. Dxej, yääl cabäzreni Saulo ro' guiraa renezyuj ni rdzujn guejdxga te ju'trenini. ²⁵ Dxejcti che gojl te yääl basäl rexpejn Jesucrist Saulo nen te dximro, basiäjtreni dxijmga nez ro' te padeer ni dejd gabi guejdxga. Basiäjtrenini nez dejtz padeerga, te si'c baxunni guejdxga.

Bidzujn Saulo guedx Jerusalén

²⁶ Che bidzujn Saulo guedx Jerusalén, rlazjni nuchaagni loj reni rililajz xtidx Jesucrist, niluxh guiraareni bidxebrenini sa'csi direni gan ahuililajzni xtidx Dios. ²⁷ Dxejcti huinä Bernabéni lo reapost, bijni diidx xcuent Saulo. Räj p Bernabé lojreni:

— Baluiloj Jesucrist lo Saulo loj nezyuj. Guninäj Xtioznu Saulo loj nezyuj, ni'cni gusutzu'tz Saulo basule'ni xtidx Jesucrist guedx Damasco.

²⁸ Dxejc bia'n Saulo guedx Jerusalén, bidxaagni lo rexpejn Jesucrist. ²⁹ Dxejcti gusutzu'tz Saulo gusloj bijni xtidx Jesucrist lo rebejn. Dxejcti gudilnäj Saulo rexpejn Israel nani rnii didx griegw. Laareni rdexchduxhrene, rlazjreni nugu'treni Saulo sa'csi direni nichagljaz xtidx Jesucrist. ³⁰ Che gucbee rexpejn Jesucrist si'c, huinäreni Saulo guedx Cesarea, ro'c gulääreni Saulo, baxhalrenini guedx Tarso.

³¹ Dxejc guredxi lajz guiraa renani huililajz xtidx Dios nen reguedx Judea, nen reguedx Galilee, näjza nen reguedx Samaria, sa'csi diru Saulo nusacsí rexpejn Jesucrist, luxh guc xhidajlrureni. Basoobreni xtidx Jesucrist, bisiedrurenirextiidxni, gucnäjza Sprit Dxan xten Diosreni.

Biajc Eneas

³² Che gusloj sahuu Pedr guiraa renani huililajz xtidx Dios, huihuiizani rexpejn Jesucrist nani yu' guedx Lida. ³³ Ro'c bidxälni te niguii ni laa Eneas. Agujc xhujn ijz naga' niguiiga cayacxhuuni. Abixu'n tiejxhni, digacdiru guiliini.

³⁴ Dxejcti räjp Pedr lo Eneas:

—Eneas, cagusiajc Jesucrist guejblu. Huistie, guläs xta'lu.

Lagajc dxejc biajcn, huistietini.

³⁵ Guiraa rebejn ni rbäjz guedx Lida, näjza reben ni rbäjz guedx Sarón, bahuiireni abiajc niguii ni cayacxhuu. Dxejc xhidajlreni nen reguejdxga huililajz xtidx Dios.

Gubansac Dorcas

³⁶ Nen guedx Jope yu' te gunaa ni laa Tabita; rni-izarenini Dorcas con xtidx griegw. Gunaaga huililajz xtidx Dios, rudeedzani xhi rquiin rebenproob, najczani huenduxh loj chutis bejn. ³⁷ Gucxhuu gunaaga, dxejc gujtni. Che gulujx bahuajz rebejn togoolga, huitixhrenini nen te yu' ni najc jiaa yejc sa'ni. ³⁸ Sa'csi gajxh guedx Jope tre' guedx Lida, luxh biejn diajg rexpejn Jesucrist ro'c yu' Pedr, baxhalreni tiop dade' saxii Pedr. Räjp redade'ga loj Pedr:

—Bejn huen salu chonnu Jope nanajga.

³⁹ Dxejc sanägajc Pedr redade'ga. Che bidzujnreni, huinäreni Pedr nen yu' cadro naga' togunaaga. Ro'c cayonduxh guiraa regunabiuud, baluiireni lo Pedr guiraa rexhjbreni nani benchee Dorcas, ni badeed Dorcas lojreni che nabajnni. ⁴⁰ Dxejcti gunibee Pedr birii guirareni nen yu'. Dxejc bazuxhibni, guredx-gunabni loj Dios. Dxejc gubiréni bahuiini loj togoolga, räjpni:

—Tabita, huistie.

Dxejcti baxhal gunaaga balojni; che bahuiini loj Pedr, gurejni. ⁴¹ Dxejc gunaaz Pedr ñaani, basuliinini, dxejcti gurejdx Pedr regunabiuud nájza sgaii reni najc rexpejn Jesucrist. Baluiini gunaaga lojreni te bahuilojreni agubansacni. ⁴² Gucbegajc reben guedx Jope xhini'c gujc, dxejcti xhidajl rebejnnga huililajz xtidx Jesucrist. ⁴³ Xchejza guyu' Pedr ro'c, gulájzni rolijz dade' ni laa Simón, nani ruscoodz guijd.

10

Pedr con Cornel

¹ Guedx Cesarea guyu' te niguii ni laa Cornel. Rnibeeni te gayuu resoldaad lo te cuaa ni laa Italiano. Cornel najc benzijt, dini gac ben Israel. ² Beñsacduxh najc Cornel, nájza guiraa resa'ni, sacruduxh rusoobreni xtidx Dios. Rudeedni gojn lo reben proob xten Israel. Guixe-guixee rbejdx, rniabni lo Dios. ³ Te dxej, si'cti rcachon gudxej, si'c lo bacal bahuiini loj xangl Dios, rájpni loj Cornel:

—¿Conlu Cornel?

⁴ Che bahuii Cornel xangl Dios, bidxejbni, bidxelojni, rájpni lojni:

—¿Xhini'c, Dad?

Dxejcti rájp angl xten Dios lojni:

—Che rniilu lo Dios, riejn diajg Dios xtiidxlu, che rudeedlu meel lo reben proob, ruhuii Dios ni rujnlu, ni'cni rnalajz Dios luj. ⁵ Naj baxhal tiop niguii cháa guedx Jope te chaxiireni Simón Pedr. ⁶ Rbájzni rolijz te dade' ni laa Simón nani ruscoodz guijd. Rolijz Simón sojb gajxh ro' nisdoo. Simón Pedr gusule' xhini'c nanab gunlu.

⁷ Che sii angl xten Dios, gule Cornel tiop mos xtenni nájza te xsoldaadni nani sanälajz Dios. ⁸ Dxejc bij Cornel diidx lojreni xcuent ni gusajcni, dxejc baxhalni redade'ga guedx Jope.

⁹ Che bara yääl, sääreni lo nezyuj. Asiäddzungajxhreni guedx Jope, pet si'cti läidxejni. Lagajc orga huä'p Pedr yecyu' te guininäjni Guejb Dios. ¹⁰ Calanduxh Pedr, rlajzni gauni. Laḷ ni cayujnreni xhi gauxhuejni, gusloj canixcaḷni. ¹¹ Bahuiini bixal xhaguibaa, bahuiizani biäjt te bariadro nani naliib guidap xi'ni. Siädjiätchäiini gajxh nez loj Pedr. ¹² Nen bariaadga yu' guiraa reman ni yu' lo guedxliuj nani rsianäj guidap ni'ni, näjza renani rxeeb si'c bäl, näjza renani rutajt. ¹³ Gunii Dios lo Pedr, räjpni lojni:

—Pedr, huisu te ju'tlu man gaulu.

¹⁴ Dxejc räjp Pedr lojni:

—Na'c Dad. Nunc gauä sa' remandxuudxga, abia'a dina gauä reman nani rni xleiilu najc mandxuudx.

¹⁵ Gunisac Dios loj Pedr, räjpni:

—Na'cru guiniilu nacdXuudx reman nani abasia.

¹⁶ Che gujc choḅ huält gujc si'c, huä'psac bariaadga xhaguibaa. ¹⁷ Laḷ ni cayujn Pedr xhigab xhichani'c säloj nani bahuiini, bidzujḅ reniguii ni baxhaḷ Cornel ro' yu'ga, sa'csi agunabdiidxreni caro rbäjz Simón nani ruscoodz guijd.

¹⁸ Che bidzujḅreni rolä'ga canabdiidxreni la ro'c rbäjz te dade' ni laa Simón Pedr. ¹⁹ Laḷ ni cayujn Pedr xhigab xcuent ni bahuiini, gunii Sprit Dxaḅ xten Dios lojni, räjpni:

—Bahuii, choḅ dade' caguiillu. ²⁰ Biäjt yejc yu're te jinälureni. Na'c gunlu xhi stee xhigab, sa'csi lagajc narä baxhaḷäreni lojlu.

²¹ Dxejcti biäjt Pedr jiaaga, bidzujḅni cadro suga' redade'ga, räjpni lojreni:

—Narä nacä ni caguiiltu. ¿Xhi siäädту?

²² Räjp reniguiiga lo Pedr:

—Cornel, nani rnibee te gayuu soldaad, te beḅsa'c, te bejḅ ni rajḅ Dios, te bejḅ ni sanälajz rexpejḅ Israel,

laani baxhaġ nuure lojlu, sa'csi räjp angl xten Dios lojni, jiopxiinu luj te jiejn diajgnu xtiidxlu.

²³ Dxejcti gurejdx Pedr rebejnġa, biu'reni neņ yu'. Ro'c bia'nreni te guxhijņ. Che bara yääl, Pedr näjza sgaii beņ Jope ni najc xpejņ Jesucrist, sanä redade' ni baxhaġ Cornel.

²⁴ Che bara yääl, bidzujņreni guedx Cesarea. Abatojp Cornel resa'ni näjza reexamigwni rolijzni. Cabäjzreni guidzujņ Pedr. ²⁵ Che bidzujņ Pedr ro yu', huichagġoj Cornelni, bazuxhijbni lo Pedr. ²⁶ Dxejc gunaaz Pedr naani, guläsnini, räjpni lojni:

—Huisulii, sa'csi narä nacä te niguiitis sigajc najclu.

²⁷ Cayuiireni diidx, biu'reni neņ yu'. Che biu'ni bahuii Pedr nadxagsa' rebejņ neņ yu'. ²⁸ Räjp Pedr lojreni:

—Anajntu xhi caj lo leii xten rexpejņ Israel: digacdi guchaag te xpejņ Israel loj benzijt nani digac xpejņ Israel, digacdiza jiu'ni rolijzreni. Niluxh agunii Dios loä lo te bacaġ, te gacbeä digacdiru jiuä releiire. Abaluii Dios narä sajc guchagsa'ä chutis bejņ. ²⁹ Ni'cni, che gurejdxtu narä biälgacä. Naj rniabdixä, ħxhicuent gurejdxtu narä?

³⁰ Dxejcti räjp Cornel loj Pedr:

—Gudajp dxej si'cti rcachon gudxej, cabedx-canabä lo Dios rolizä chela baluiloj te niguii najcw te ladnol ni rdimbicha'. ³¹ Najni loä: “Cornel, che rbedx-rniablu lo Dios, riejn diajg Dios xtiidxlu, che rudeedlu meel lo rebeņ proob, racbee Dios, di lajzni jääl luj. ³² Ni'cni naj baxhaġ tiop dade' chää guedx Jope te chaxiireni Simón Pedr nani rbäzlaa rolijz Simón ni ruscoodz guiġd. Rolijzni sojb gajxh ro' nisdoo. Che guidzujņni, laani gusule'ni xtidx Dios lojtu.” ³³ Dxejc baxhaġä chu biädxiilu. Xquixtiostelu biädldu. Naj anadxagsa'nu ree nez loj Dios te jiejn diajgnu rextidx Dios ni baniidxni lojlu guiniilu loonu.

Basule' Pedr xtidx Dios rolijz Cornel

³⁴ Dxejcti räjp Pedr lojreni:

—Naj gucbeliä tebloj rinälajz Dios guiraa bejn; rebenz-
ijjt sigajc rexpejn Israel. ³⁵ Niluxh rinälajz Dios chutis bejn
guedxliuj nani ruzuxhijb lojni, nani rusooob rextiidxni,
nani laaca nabajn. ³⁶ Badeed Dios xtiidxni loj rexpejn
Israel, basule' Dios biääd Jesucrist te gac chanälaznu Dios
te cuedxilajznu, sa'csi Jesucrist rnibee guideb guedxliuj.
³⁷ Che gulujx baluii Juan ni rutiobnis xcuent yälrobnis,
dxejc gusloj basule' Jesucrist xtidx Dios nez reguedx
Galilee. La'tu najntu xho bire'ch xtidx Jesucrist guideb
nez nen reguedx Judea. ³⁸ Nancheetu xho badeed Dios
yälrnibee loj Jesucrist, bejn Nazare't. Badeedza Dios Sprit
Dxan xtenni te cuääzni nen lastooni. Nancheetu xho be-
jnni redzunro, remilagwr, basiajcnj rebejn nani caguteed
benxgab trabajwduxh. Redzunroga bejnni sa'csi bennäj
Diosni dzuun. ³⁹ Bahuiloonu guiraa redzuun ni bejn Je-
sucrist nen reguedx Israel näjza guedx Jerusalén. Bacuaa
rexpejn Israel Jesucrist lo crujz, ro'c gujtni. ⁴⁰ Dxejcti che
biojn dxej, guläs Dios Jesucrist lo rebengut, gubansacni,
badeed Dios yälrnibee lojni te gujc biädluiloj Jesucrist
loonu. ⁴¹ Di Jesucrist nuluiloj loj chutis bejn. Lojtis
renani agule Dios gutie'ch diidx gubansac Jesucrist lo
rebengut, loj reni'c baluilojni. Nuure nadxagnu loj reni
gule Dios. Bidaunänuni, bidunnäänuni che gubansacni lo
rebengut. ⁴² Baxhałni nuure chatie'chnu diidx loj guiraa
rebejn, chosule'pacnu Dios gule Jesucrist te gacni juejz xte
rebenbajn näjza xte rebengut. ⁴³ Galooli bacuaa renani
gunii xtidx Dios lo guijtz, räjpreni: “Guiraa rebejn ni
chalilajz xtidx Jesucrist sudzucaj Dios xtojłreni.”

Biädlajz Sprit Dxan xten Dios nen lastoo rebenzijt

⁴⁴ Lał ni canii Pedr rediidxga, biädlajz Sprit Dxan xten
Dios nen lastoo renani huililajz xtiidxni. ⁴⁵ Bidxeloj guiraa

rexpejn Israel nani huinä Pedr sa'csi biädläjz Sprit D_{xan} xten Dios neñ lastoo renani najc beñzajt. ⁴⁶ Gucebereni biu' Sprit D_{xan} xten Dios lastoo rebenzajt sa'csi bejn Sprit D_{xan} guniireni stee didxsaj nani gajdreni guisieed, calä'pzareni xpala'n Dios. ⁴⁷ Dxejcti räjp Pedr lo rexami-igwni:

—Chu laa ni gudxojn yälrobnis lo rebejnre, ni sigajc biädläjz Sprit D_{xan} xten Dios neñ lastoonu, abiädläjzni neñ lastoo rebejnre.

⁴⁸ Dxejcti gunibee Pedr gurobnisreni te gacbee bejn najcreni xpejn Jesucrist. Dxejcti gunabreni loj Pedr jia'nni ro'c tiop-choñ dxej.

11

Basule' Pedr xho biädlajz Sprit D_{xan} xten Dios lastoo rebenzajt lo rexpejn Jesucrist neñ guedx Jerusalén

¹ Reapost, näjza renani huililajz xtidx Jesucrist neñ reguedx Judea, biejn diajgreni huililajz rebenzajt ni digac xpejn Israel xtidx Dios. ² Che bidzujñ Pedr guedx Jerusalén, rexpejn Israel nani rlajz chu guiraa rexpejn Jesucrist bee si'cni bejn toAbram, gudiñäjreni Pedr. ³ Räjpreni lo Pedr:

—¿Xhicuent biu'lu rolijz beñzajt nani xhet yu'di bee si'c nuure? ¿Xhicuent gudaunäjjlureni, ä?

⁴ Dxejcti basule' Pedr diidx xho gujc huijni loj rebenzajt:

⁵ —Yu'ä guedx Jope. Cabedx-canabä lo Dios, dx-
ejc si'c gunixcalä, bahuiä bixal xhaguibaa, siädjiäjt te bariadro, naliib guidap xi'ni. Siädjiätchäiini nez loä. ⁶ Che bahuisa'cä, nenga yu' guiraloj reman ni yu' lo guedxliuj nani rsianäj guidap ni'ni, renani rbäjz neñ dajn, renani rxeeb si'c bäl, näjza renani rutajt. ⁷ Dxejcti biejn diagä naj Dios loä: “Pedr, huisu. Bagu't man gaulu.” ⁸ Dxejcti räpä: “Digacdini Dad. Nicla tej gadna gauä te man nani

rni leii xtenlu najc mandxuudx.”⁹ Dxejc gunisac Dios loä: “Na'cru guiniilu nacdXuudx recos nani abasia Dios.”¹⁰ Che gujc choñ huält gunii Dios si'c, huä'psac bariaadga xhaguibaa.¹¹ Lagajc orga bidzujñ choñ dade' ro yu' cadro yu'ä. Guedx Cesarea biriireni, biädxiiireni narä.¹² Dxejc gunii Sprit Dxan xten Dios loä: “Huinä reniguiire. Na'c gun tiop lajzlu.” Dxejcti huinää xho'p beñ Jope, dade' nani rililajz xtidx Jesucrist. Che bidzunnu guedx Cesarea, biu'nu rolijz Cornel.¹³ Basule' Cornel diidx loonu xho baluiloj te angl xten Dios lojni lagajc rolijzni. Räjp angl xten Dios lojni: “Baxhal tiop dade' chää guedx Jope te chaxiireni Simón ni rniireni Pedr.¹⁴ Laani siniini xtidx Jesucrist te gabeelu con resa'lu xhini'c nanab gunlu te guslaa Dios la'tu lo rextojltu.”¹⁵ Che gusloj cagusule'ä xtidx Dios lojreni, biu' Sprit Dxan xten Dios neñ lastooreni si'c biu'ni lastoonu galooli.¹⁶ Dxejcti banaj lazä rextidx Dad Jesucrist che najni: “Juan abatiobnis con nistis, biädla narä suxhalä Sprit Dxan xten Dios te cuääzni neñ lastootu.”

¹⁷ Dxejc räjpza Pedr:

—Palga badeed Dios Sprit Dxan xtenni lojreni si'c baniidxni Sprit Dxan xtenni loonu che huililajznu xtidx Jesucrist, ¿chu narä? te niäpä lo Dios: “Na'c gudeedlu Sprit Dxan xtenlu lojreni.”

¹⁸ Che biejn diajg rebeñ Jerusalén rediidxga, biäuu ro'reni, dirureni nidiñäj Pedr. Alga gulä'preni xpala'n Dios, räjpreni:

—Näjza rebenzijt nani digac rexpejñ Israel abasaan Dios gusiechlajzreni te guibannäjreni Dios par tejpas.

Rexpejñ Jesucrist ni yu' guedx Antioquía

¹⁹ Che gujt Esteban bire'ch renani huililajz rextidx Jesucrist. Bire'chreni lo yuj Chipre ni re' lo nisdoo, lo

reguedx Fenicia, nájza lo guedx Antioquía sa'csi cadejdeni trabajwduhx. Basule'reni rextidx Jesucrist lojtis rexpejn Israel. ²⁰ Lojreni nadxaag gatii beñ Chipre, nájza gatii beñ Cirene. Redee bidzujñ guedx Antioquía. Ro'c gusloj caniireni lo benzijt nani rnii didx griegw. Basule'reni lo rebenzijtga guiraa xcuent Jesucrist. ²¹ Gucnäj Diosreni caniireni xtiidxni. Xhidajl rebejnğa huililajz xtidx Jesucrist, basoobreni xtiidxni.

²² Che biejn diajg rexpejn Jesucrist ni yu' guedx Jerusalén rililajzreni, baxhalreni Bernabé guedx Antioquía. ²³ Che bidzujñ Bernabé guedx Antioquía, bibalazduhxni che bahuiini xho cayunnäj Dios rebejnğa. Dxejcti balijdx Bernabéreni: gutijp lajzreni gusoobreni xtiidxtis Jesucrist. ²⁴ Beñsa'c najc Bernabé. Rililazduhxni xtidx Jesucrist. Racnäjdüxh Sprit Dxañ xten Diosni. Xhidajl rebejn huililajz xtidx Jesucrist guejdxga.

²⁵ Che birii Bernabé guejdxga, huijni guedx Tarso satiilni Saulo. ²⁶ Che bidxälñ Saulo, huinänini guedx Antioquía. Ro'c bia'nreni tebijz, bachagsa'reni renani huililajz te baluiireni xtidx Jesucrist lo xhidaldüxh bejn. Ganid beñguejdxga gulälaj “Cristianos” renani rililajz xtidx Jesucrist.

²⁷ Neñ redxejga birii gatii dade' nani rnii xtidx Dios. Guedx Jerusalén biriireni, bidzujñreni guedx Antioquía. ²⁸ Huisulii te dade'ga ni laa Agabo. Gucnäj Sprit Dxañ xten Diosni te guniini siäd te gubijn guideb guedxliuj. Luxh gujc gubijnga neñ reijz ni gunibee reii Claudio ni sajcro. ²⁹ Dxejcti rexpejn Jesucrist ni rbäjz guedx Antioquía bejn xhigab cade tejreni gudeed meel chää lo rexpejn Jesucrist ni rbäjz neñ reguedx Judea. ³⁰ Batojpreni meel, baxhalrenini lo rebengool ni rnibee rexpejn Jesucrist ro'c. Saulo nájza Bernabé huinä meelga che huijreni Judea.

12

Gujt Jacobo, biäu Pedr neṅ latzguiib

¹ Neṅ redxejga, trabajwduxh bateed rei Herodes gaaṅ rexpejṅ Jesucrist. ² Gunibeeni gujt Jacobo betz Juan, biru' guejṅni. ³ Che bahui Herodes bibalazduxh rexpejṅ Israel sa'csi bagu'tni Jacobo, gunibeeni gunazgajczeni Pedr. Dee gujc neṅ redxe lanij che rajwreni yätxtiil ni di saguij. ⁴ Che gunaazzeni Pedr, biäuni neṅ latzguiib. Gunibee Herodes biääd tajp cuaa soldaad cuanäjreni ro' latzguiib. Tapgaj soldaad cuanäj ro' latzguiibga cade xho'p or. Bejn Herodes xhigab cuääni Pedr te guetni nez loj rexpejṅ Israel che ted lanij. ⁵ Yu'ti Pedr neṅ latzguiib, dxejcti durtis cabejdx, canab rexpejṅ Jesucrist lo Dios xcuent Pedr.

Gulää Dios Pedr neṅ latzguiib

⁶ Bidzujṅti dxe bispr dxej ni rlaiz Herodes nibää Pedr nez loj rexpejṅ Israel. Yäälga nagayejs Pedr galäi tiop soldaad. Caden naliib guiro'p ṅaa Pedr. Stiop soldaad canäj ro' latzguiib. ⁷ Chela baluiloj te angl xten Dios, bianij te bajl nani basanij neṅ latzguiib. Dxejcti gunaazni xhajcw Pedr, basniibnini te gubajṅni. Räjṅni lo Pedr:

—Basquejnga, huistie.

Dxejcti bixec recaden, bitejbreni ṅaa Pedr. ⁸ Räjṅ xangl Dios lo Pedr:

—Gojt xhajblu, baläj xcura'chlu.

Si'c bejn Pedr, dxejc räjṅ xangl Dios lo Pedr:

—Gojt xhablajzlu, gudanajl narä —räjṅni.

⁹ Biriitini latzguiib sanajlni angl xten Dios. Niluxh dini gun xhigab guliipac nani bejn xangl Dios. Bejṅni xhigab pet canixcaṅni. ¹⁰ Gudejdreni nez loj te soldaad, gudedgajczeni nezloj steeni, dxejc bidzujṅreni ro' puert-guiib xten latzguiib nani caj lo nezyuj ni rdejd galäi

guejdxga. Xtebca bixal puertroga, biriireni gusajreni tebnezyuj. Dxejcti te squiin gunitloj xangl Dios. Xtebtis Pedr sasaj lo nezyuj. ¹¹ Dxejc si'cni gubajñ Pedr, bejnñi xhigab:

—Naj sii nanä baxhal Dios te xanglñi basläa narä ladzñaa Herodes te digacdi gun rexpejn Israel nani rla-jzreni gunñajreni narä.

¹² Che gucbee Pedr xhi gusajcni, huijni roliz Marii, xnan Juan ni rniireni Marcw. Ro'c nadxagsa' xhidajl rexpejn Jesucrist, cabedx-canabreni lo Dios xcuent Pedr.

¹³ Cagusejz Pedr rolä', dxejc gubig te dxa'p ni laa Rode, bacuadiajgni ro lä'. ¹⁴ Che biembée Rode xse' Pedr, sa'csi bibalazduxhni, biallajzni nuxhalni ro lä'. Alga baxunni biusacni neñ yu', räjpni lojreni:

—Pedr suga' ro lä'.

¹⁵ Dxejcti räjpreni lo Rode:

—Yejclu cayajc.

Dxejcti duurtis gunii dxape'ga suga' Pedr ro lä'. Dxejcti räjpreni loj Rode:

—Xho gacni Pedr. Pet biejn diajglu gunii xangl Dios ni rcanäj Pedr.

¹⁶ Dxejcti lałtis cagusejz Pedr ro lä'. Che baxhalreni ro lä' bidxeloduxhreni bahuiireni lo Pedr. ¹⁷ Dxejcti bazääb Pedr ñaani te na'cru jiejyreni. Dxejc bij Pedr diidx xho baxhal Dios ro' latzguiib. Dxejc räjpni:

—Colchaye'tz lo Jacob näjza lo rexpejn Jesucrist guiraa ni gusacä nayääl.

Dxejcti birii Pedr ro'c, huijni ste'ca lajt.

¹⁸ Che bara yääl, rsildooru, bieiduxh resoldaad sa'csi direni gan xho gujc birii Pedr neñ latzguiib. ¹⁹ Gunibee Herodes huitiilreni Pedr, gunabdiidxzani lo resoldaad xho gujc birii Pedr, dxejc gunibeeni gujt resoldaad ni cuanäj

latzguiib che birii Pedr. Dxejcti birii Herodes reguedx Judea, xchej huijia'nni guedx Cesarea.

Gujt Herodes

²⁰ Bachechduxh reben̄ Tiro nājza reben̄ Sidón Herodes, ni'cni diruni gusaan guto' rebejn̄ nez cadro rnibeeni xhi gau reben̄ Tiro nājza reben̄ Sidón. Ni'c biāād xhidajlreni te guiniabreni jiāj̄l lajzni, te na'cru guidxe'ch Herodes lo-jreni. Abenxgaareni xamiigwreni Blasto, mos ni yu' lo reīi Herodes, mos ni sajcr̄u lo guiraa rexmos Herodes. Gunināj Blasto Herodes xcuentreni te na'cru guidxechñāj Herodes rebejn̄ga. ²¹ Basoobtini te dxej te guininājniren̄i. Dxejga gojt Herodes xhajn̄ reīini, gurejni lo xyacxhīl reīini. Dxejcti gusloj caniini didxsa'c loj rebejn̄ga. ²² Guredxa' rebejn̄ räjpreni lojni:

—Huenduxh najc diidxre. Guejblu najc te dios, xhet xtiidxdi niguii najc diidxre.

²³ Lagajc dxejc biāād te angl xten Dios, bejn̄ni gusloj cayacxhuu Herodes, gudajw rebisiujg Herodes, gujtni sa'csi basaanni gunii rebejn̄ najcni te dios, sa'csi dini niliä'p xpala'n Dios.

²⁴ Xhidajl bejn̄ biejn̄ diajgni xtidx Dios, huililajzreni xtidx Dios.

²⁵ Che gulujx badeed Bernabé nājza Saulo meel ni batojp reben̄ Antioquía lo rebengool, biriireni guedx Jerusalén. Sanäreni Juan ni rniireni Marcw lo guedx Antioquía.

13

Gule Sprit Dxaan xten Dios Bernabé nājza Saulo

¹ Lo rexpejn̄ Jesucrist ni rdxaag sa' guedx Antioquía guyu' gaii niguii ni gunii xtidx Dios, nājza gaii niguii ni rusule' xtidx Dios loj guiraa rexpejn̄ Jesucrist. Loj redee

nadxaag Bernabé, náj Simón ni rniireni Negr; náj Lucio, beñ Cirene; náj Manaén ni gulanáj reii Herodes gujčni si'c bejtzni; nájza Saulo. ² Bidzujñ te dxej cagucua'nreni lañ ni cabedx-canabreni lo Dios, dxejc rájñ Sprit Dxañ xten Dios lojreni:

—Colcue Bernabé nájza Saulo te gunreni dzuun ni rlazá gunreni.

³ Che gulujx bacua'nreni, che gulujxza guredx-gunabreni lo Dios, batzuubreni ñaarení yejc guiro'preni, te si'c baxhañreni Bernabé nájza Saulo te guluiireni xtidx Dios ste'ca lajt.

Guiro'preni baluii xtidx Dios lo rebeñ Chipre

⁴ Baxhañ Sprit Dxañ xten Dios Saulo nájza Bernabé guedx Seleucia. Ro'c biu'reni neñ barcw, sääreni nez yuj ni tre' galáii nisdoo, ni laa Chipre. ⁵ Che bidzujñreni Chipre, biu'reni guedx Salamina. Ro'c basule'reni xtidx Dios neñ guiraa rexquidoo rexpejñ Israel. Náj Marcw gucnájreni. ⁶ Che cuansajreni guideb yuj Chipre, bidzujñreni guedx Pafos. Ro'c bidxaagreni te niguii ni laa Barjesús. Najčni te bidxaa, najczani te xpejñ Israel. Cagusgueeni rebejñ guejdxga, rájñni xtidx Dios caniini, niluxh dini gac xtidx Dios. ⁷ Bidxaare nu'ch lo rexpejñ Sergio Paulo, nani najc gubernadoor xten Chipre. Nasinduxh Sergio Paulo. Gurejdxni Bernabé nájza Saulo, sa'csi rlanjni jieñ diajñni xtidx Dios. ⁸ Dxejcti Barjesús, ni laaza Elimas, bidxagdijñni guiro'preni sa'csi di rlanjni chalilajz Sergio Paulo xtidx Dios. ⁹ Saulo, nani laaza Pabl, bahuitzu'tz loj Barjesús. Batijp Sprit Dxañ xten Dios lastoo Pabl, rájñni loj Barjesús:

¹⁰ —Rusgueduxhlu rebejñ, najclu beñlatsiaj, benguidxduxhlu, najclu xi'n Satanás, beñdxab ni rnibee. Rdxech-nájzalu guiraa recossa'c xten Dios. ¿Guc cuääz guxhiidlu xtidxlii Jesucrist te di chalilajz bejñ xtidx Jesucrist? ¹¹ Naj

siääd xcastiigw Dios yejclu. Xhidajl dxej sicäy lojlu, xhetliidi fiilu —räjp Pabl.

Gujcsi räjpni si'c, bicäigajc lojni. Dxejctiru cuansajni caguilni chu guiniaaz naani guluiini canejz chääni. ¹² Che bahuii Sergio Paulo xhi gusajcni, huililajzni xtidx Dios, sa'csi bidxeloduxhni xcuent xcälrluui Dios.

Bidzujn Pabl näjza Bernabé guedx Antioquía xten distrit Pisidia

¹³ Che baluux Pabl näjza resa'ni xtzuunreni guedx Pafos, biu'reni nen barcw, gudejdreni lo nisdoo, sääreni guedx Perge nen estad Panfilia. Che bidzujnreni guejdxga, gubisac Juan, ni rniireni Marcw, Jerusalén.

¹⁴ Dxejcti birinäj Pabl resa'ni guedx Perge, sääreni guedx Antioquía nen distrit Pisidia. Dxejc te dxe sabd, dxej ni rusilajz rexpejn Israel, biu'reni nen xquidoo rexpejn Israel, ro'c gurejreni. ¹⁵ Che gulujx bil te dade' reguijtz xten Dios ni laa leii näjza reprofe't, baxhaḷ reguxhtis xten guidoo chu huigajnreni, räjpreni lo Pabl näjza Bernabé:

—La'tu sa'nu, palga rajptu te diidx ni gulijdx rebejnre, colguiniini.

¹⁶ Dxejc huisulii Pabl, guläsni naani bejnni seen lo rebejn te cuadiajgreni xtiidxni. Räjp Pabl lojreni:

—Colcuadiajg, la'tu rexpejn Israel, guiraatu ni rajn Dios. ¹⁷ Galooli gule Xtios rexpejn Israel retoxtadgoldoonu. Luxh che guläjzreni nación Egipto, bidalduxh retoxtadgoldoonu. Gucnäjduxh Diosreni bejnmi remilagwr, te guläänireni guedx Egipto. ¹⁸ Tiuu ijz guläjzreni lo reyubijdz. Xhidajl huält direni nusoob xtidx Dios, niluxh empac gucnäjza Diosreni. ¹⁹ Guyu' gajtz nación guläjz nen reyuj ni laa Canaán. Dios bejn gunitloj reguejdxre, te gudisni reyujga loj retoxtadgoldoonu. ²⁰ Dxejcti badeed Dios reniguii ni gujc juejz, gunibeereni rebejn. Tajp gayugarol ijz gunibeereni rexpejn Israel. Samuel

nani gunii xtidx Dios gujc lult juejz. ²¹ Dxejcti gunab rexpejn Israel te rei lo Dios te guinibee reiiiga lojreni. Badeedti Dios Saúl xi'n Cis, sa' toBenjamín. Gunibeeni tiuu ijz. ²² Che badzucaj Dios Saúl, badeedni gunibee torei David. Räj p Dios: “Agucbeä David xi'n Isaí rujn tejsi xhigab con narä. Susoobni xtidxä sujnni guiralii ni rlazä gac.”

²³ Räj pza Pabl:

—Galooli bia'n diidx lo rexagdoo David guxhał Dios te bejn ni gudzucaj xtojłnu, ni gusłaa nuure lo dojl. Naj aguzojb diidxga. Jesucrist najc bejnğa, rudzucajni xtojłnu, rusłani nuure lo dojl. ²⁴ Che gusloj cagulijdx Juan rebejn, baluiini nanabpac gusiechlajz rexpejn Israel, tiobnisreni te jia xtojłreni. ²⁵ Niluxh guxii riäädx guluux Juan dzuun ni badeed Dios gunni che räj pni lo rebejn: “¿Chu rujntu xhigab nacä narä? Dina gacä Crist nani bia'n diidx guxhał Dios. Colhuii, detzä siäd tej ni sacduxhru loä; nicla gac surloä te cuää xcura'chni.”

²⁶ Räj pza Pabl:

—Rniä lojtu sa'ä, rexagdoo toAbram, näjza lo chutis ni rajn Dios, loonu baxhał Dios xtiidxni ni rusule' xho rudzucaj Jesucrist xtojłnu, xho rusłani nuunu lo dojl. ²⁷ Rebejn Jerusalén, näjza renani rnibeereni, direni niembee Jesucrist nani rnibee, dizareni niacbee diidx xcuent Dios nani bacuaa reniguii ni gunii xtidx Dios agujc xchero, luxh rołreni xtidx Diosga gasob sabd. Niluxh che bagu'treni Jesucrist, guzobj xtidx Dios ni caj lo guijtzga. ²⁸ Baliidxreni Pila't ju'tni Jesucrist, luxh xhet bejndini te guetni. ²⁹ Che bagujc guiraa ni caj lo guijtz xcuent Jesucrist, gulätreni Jesucrist lo crujz, bacua'tzrenini neñ baa cuä' te guilaj. ³⁰ Dxejcti guläs Dios Jesucrist lo rebengut. ³¹ Balti huält baluiloj Jesucrist lo reexamigwni nani biädnajłni nez rexyuj Galilee, renani biädnajłzani

nez guedx Jerusalén. Bahuilojreni gubansac Jesucrist lo rebengut, te naj rusule'reni diidx xcuent Jesucrist.

³² Naj siopnānu xtidx Diosre lojtu te guibalajztu. Agujc xchero bia'n Dios diidxre con retoxtagoldoonu. ³³ Gulās Dios Jesucrist te huile' diidxga par nuure, rexagdooreni. Agujc xchero gunii Dios te diidx ni caj neñ Salmo ni bacuaa toDavid. Lo Salmo ni rojp rāj̄p Dios: “Luj najclu xi'nā. Nadxej guleālu te guinibeelu.”

³⁴ Rāj̄pza Pabl:

—Dxej cru stee lajt caj xcuent ni gulās Diosni lo rebengut te nuncru guetni. Scree bacuaa te niguii, rāj̄p Dios: “Sunidxā recossa'c lojlu si'c ni bia'nā diidx con toDavid.”

³⁵ Ni'cni bacuaaza toDavid neñ stee Salmo ni gunii Dios, guniini: “Dipaclu gusaan gudx tiejxh Xi'nlu nani sanāljzlu.” ³⁶ Che gulujx gunibee toDavid lo retoxtagoldoonu, si'cni badeed Dios gunni, dxejc gujtni. Biga'tznāj̄ni retoxtagoldooni. Niluxh guyujdx tiejxh toDavid. ³⁷ Niluxh gulās Dios Jesucrist lo rebengut, ni'c di tiejxhni niujdx. ³⁸ Ni'cni colyacbee, la'tu resa'ā, Jesucristre, beñ ni caniā xcuentni, laani rudzucajni rextoj̄l̄nu. ³⁹ Chutis ni rililajz xtidx Jesucrist ruslaa Jesucristni loj guiraa rextoj̄l̄ni nani digacdi guibicaj mascā rusoobni guiralii ni caj lo leii xten toMoisés. ⁴⁰ Col̄susiñ te na'c sajctu recos ni caj lo guijt̄z ni bacuaa te niguii nani bacuaa xtidx Dios:

⁴¹ Col̄huilaa, la'tu ni ruxhiznāj̄ xtidxā col̄guidxeloj, col̄nitloj, sa'csi naj ni nabajntu sunā te dzunro, te milagwr nez lojtu, niluxh dipac lajztu chalii, mascā jiāād chu gusule'pacni lojtu.

⁴² Gulujxti xtidx Pabl, biunejz rebejñ. Che birināj̄ Pabl Bernabé biād̄nii rebejñre lojreni, rāj̄preni:

—Jiādsactu ste xmaan te gusule'rutu rediidxre loonu.

⁴³ Che care'ch rebejnga, xhidajl rexpejñ Israel, nājza xhidajl rebenzijt̄ nani rusoob xtidx Dios si'c rujn rexpejñ

Hechos 13:44 47 Hechos 13:52

Israel, birinajlreni Pabl nájza Bernabé. Dxejc balijdxreni rebejn ni siädnajlreni, räjpreni lojreni chanuutis chalilajzreni didxlii xcuent Jesucrist.

⁴⁴ Che gojlti stee sabd, dxej ni rusilajz rexpejn Israel, xhidalduxh rebenguejdx bire' te gucuadiajgreni guinii Pabl xtidx Dios. ⁴⁵ Che bahuii rexpejn Israel guiraa rebejn ni bire', bidxechlajzreni, gucnadareni. Dxejc gusloj cadxagdijl rexpejn Israel Pabl. Che rniini te diidx, laareni rniireni “didxxhiini”. Caniyajzareni Pabl nájza Bernabé, caguereni lojreni. ⁴⁶ Luxh di Pabl niclaza Bernabé nidxejb. Gusutijptisreni, räjpreni lo rebejn:

—Nungäjł ganid lojtu guiniinu xtidx Dios, sa'csi la'tu najctu rexpejn Israel. Niluxh ditu chalilajz xtidx Dios, lagajc la'tu caniitu digacdi guibannäjtu Dios par tejpas. Ni'c sibiré loonu, te guiniinu xtidx Dios lo rebenzajt ni digac xpejn Israel. ⁴⁷ Sa'csi si'c agunibee Xtiosnu. Scree caj xtidx Dios lo guijtz:

Suxhalätu te guluiilu rextidxä lo rebenzajt ni digac xpejn Israel,
te chalilajz rebejnğa xtidxä,
te laareni lo xtojłreni, cadrotis yu'reni lo guedxliuj,
räjp Dios.

⁴⁸ Che biejn diajg rebenzajt rediidxre, bibalazduxhreni, gulä'preni xpala'n xtidx Dios. Renani gule Dios galooli huililajz xtidx Dios. Xhidajł najcreni. ⁴⁹ Bire'ch xtidx Dios guideb nez reguejdxga. ⁵⁰ Dxejc rexpejn Israel balijdx regunaa ni sajcro, nájza reniguii ni sajcro nen guedx Antioquía, te bidxechnäjreni Pabl nájza Bernabé, barilaagwreni Pabl nájza Bernabé te biunejzreni guedx Antioquía. ⁵¹ Dxejcti Pabl nájza Bernabé gubijb guxhuj ni'reni si'c te seen te gacbee rebejn xhet laadi bejnreni. Sä'tireni guedx Iconio. ⁵² Baspaa Dios lajz rexpejn Jesucrist guedx

Antioquía xten Pisidia. Bazutijpza Sprit Dxaan xten Dios lastooreni.

14

Guyu' Pabl náj Bernabé guedx Iconio

¹ Che bidzujñ Pabl nájza Bernabé guedx Iconio, biu'reni xquidoo rexpejñ Israel. Basule'reni xtidx Dios lo rexpejñ Israel nájza lo rebenzjijt. Xhidajl rebejnğa huililajz xtidx Dios. ² Niluxh sgaii rexpejñ Israel nani di chalilajz xtidx Jesucrist balijdx rebenzjijt te bidxechñäjreni rebejñ nani huililajz xtidx Jesucrist. ³ Ni'cni bia'n Pabl nájza Bernabé lo guejdxga balti dxej. Gusutzu'tz guiro'preni guniireni xtidx Jesucrist. Badeed Dios bejnreni redzunro, remilagwr xcuent xcälrnibee Dios te bahuii bejñ cayacnäj Diosreni. ⁴ Guyu' tiop cuaa bejñ nen guejdxga. Gala' guejdxga huililajz xtidx Dios nani gunii Pabl nájza Bernabé, ⁵ dxejc sgala' guejdxga bacuadiajg xtidx rexpejñ Israel. Dxejc bire' te cuaa rexpejñ Israel, nájza benzjijt, nájza reguxhtis, rlajzreni nidxagdijlreni reapost, rlajzzareni nu-cuaareni guij yejc Pabl nájza Bernabé. ⁶ Dxejc gucbeereni xhi rlajzreni gunreni, ni'c baxunreni ro'c huijreni nez reguedx Licaonia, ro'c bidzujñreni guedx Listra, guedx Derbe, nájza reguejdx ni re' nejzga. ⁷ Che bidzujñreni ro'c, cadrotis huijreni basule'reni xtidx Dios.

⁸ Guedx Listra guyu' te niguii ni digacdi sa, che gojllini racxhuu ni'ni. ⁹ Cagucuardiajg niguiiga xtidx Pabl. Che bahuii Pabl lojni, gucbee Pabl rililajz niguiiga xtidx Dios, rililajzzani sajc gusiajc Diosni. ¹⁰ Dxejcti dip gunii Pabl lojni, räjjni:

—¡Huisulii!

Dxejcti huisuyälñi, gusajni. ¹¹ Che bahuii rexpejñ Licaonia xhi bejn Pabl, lagajc xtiidxreni guniireni, räjpreni lo sa'reni:

—¡Redios abiädluiloj loonu si'c niguii!

¹² Gulälajreni Bernabé Júpiter, si'c laa tej rextiosreni. Dxejcti Pabl gulälajreni Mercurio, si'c laa stee rextiosreni, sa'csi laani rniiruni lo guiro'preni. ¹³ Dxejcti te bixhojz xten xquidoo Júpiter cua' tiop gon najl guii guejnreni. Biädnäni regonga ro' xquidoo Júpiter ni suga' ro' guejdxga. Rebejn näjza bixhojz rlajzreni nugu'treni regon te ganreni Bernabé näjza Pabl si'c rajnreni rextiosreni. ¹⁴ Che biejn diajg reapost xhi cayajc, batiäjsreni tla' xhajibreni si'c te seen direni guichaglajz xhi cayujn rebejnnga. Ruxunreni bidzujnreni lo rebejn, räjpreni lo rebejn:

¹⁵ —Colcuadiajg xtiidxnu. ¿Xhicuent cayujn guejbtu recosre? Ni lagajc sabejntu najcnu, lagajc bejn guedxliuj najcnu. Rusule'nu xtidx Dios lojtu te lacuaa ruzuxhijbtu lo redios ni runchee bejn, guzuxhijbtu lo Gueb Dios ni nabajn par tejpas, ni benchee xhaguibaa näjza guedxliuj, näjza nisdoo, näjza guiralii ni yu' lojreni, nenreni, ¹⁶ Galoo basaan Diosga gun reben guedxliuj si'ctis ni rlajzreni. ¹⁷ Huen najc Dios, rudeedni nisguij, rudeedni rajc xhi rajw rebejn, rdxaj xque'reni, rbaa lajzreni. Ni'cni riembeep-acnu yu' Dios.

¹⁸ Xhidajl diidx guniireni te chäii bejnreni gaan guredxi rebejn, sa'csi rlajzpac rebejn nugu'treni regon.

¹⁹ Dxejcti bidzujn gaii xpejn Israel siäädreni guedx Antioquía näjza guedx Iconio. Baquiilreni reben Listra te gucuareni guij yejc Pabl. Bacuaareni guij yejc Pabl, gudobxhajxhrenini guläärenini ro' guejdxga, sa'csi naareni agujtni. ²⁰ Dxejc lał ni suga' rexpejn Jesucrist guideb gabi cadre naga' Pabl, huistieni, biusacni guejdxga. Che bara yääl, huinäni Bernabé sääreni guedx Derbe.

²¹ Che bidzujnreni guejdxga, basule'reni rextidx Dios lo rebejnnga. Xhidajlreni huililajz xtidx Dios. Dxejc gubi'reni, biu'reni guedx Listra, näjza guedx Iconio, näjza guedx

Antioquía. ²² Baliidxreni rebejn nani huililajz xtidx Dios, gucnäjreni rebejnğa te batiplajz rebejnğa, räjpreni lo rexpejn Jesucrist:

—Colsnaj lajztu xtidx Dios. Susacsí rebejn la'tu, sidejdtu trabajw te jiu'tu cadre rnibee Dios.

²³ Dxejcti gule reapost gaii dade' ni najc bengool te fiireni rexquidoo xpejn Jesucrist. Che gulujx bacua'nreni, lał ni guredx-gunabreni lo Dios, basadiidxreni rebejn, räjpreni: “Gacnäj Jesucrist la'tu ni huililajz xtiidxni.”

Gubisac guiro'preni guedx Antioquía xten Siria

²⁴ Che gudejd Pabl näjza Bernabé distrit Pisidia, bidzujreni estad Panfilia. ²⁵ Basule'reni xtidx Dios lo reben Perge, dxejcti biriireni ro'c sääreni guedx Atalia. ²⁶ Che bidzujreni guejdxga, biu'reni nen barcw, gudejdreni lo nisdoo te bidzujreni stee guejdx ni laaza Antioquía. Ni'c najc guejdx ni biriireni che sääreni. Lo guejdxre yu' rexpejn Jesucrist ni gunab lo Dios xcentreni, gacnäj Diosreni, baxhalreni Pabl näjza Bernabé chasule'reni xtidx Dios nen guiraa reguejdx. Naj abaluux Pabl näjza Bernabé dzuunga. ²⁷ Che bidzujreni guejdxga, bachagsa' rexpejn Jesucrist. Dxejcti bijreni diidx lo rebejnğa guira'ti ni bennäj Dios laareni, näjza xho badeed Dios huililajz rebenzajt nani digac rexpen Israel. ²⁸ Xchej biannäjreni rexpejn Jesucrist ro'c.

15

Bidxagsa'zareni nen guedx Jerusalén

¹ Nen redxejga bidzujn gaii dade' ni siäd nez Judea, caguluiireni rexpejn Jesucrist, räjpreni lojreni:

—Palga ditu gusal bee si'c gunibee toMoisés, di Dios guslaatu lo xtojltu.

² Che biejn diajg Pabl nájza Bernabé rediidxga, bidx-agdijlreni redade'ga. Dxejc gule rexpejn Jesucrist Pabl nájza Bernabé nájza sgaii rexpejn Jesucrist cháäreni guedx Jerusalén te guininäjreni reapost nájza rebengool te guidon xho gac xcuent beega.

³ Huisunejz rexpejn Jesucrist ni najc beñ Antioquía Pabl nájza rebejn ni sanäjreni, sääreni guedx Jerusalén. Gudej-dreni reguedx Fenicia, nájza reguedx Samaria. Cadrotis gudejdreni bijreni diidx lo rexpejn Jesucrist ahuililajz rebenzajt xtidx Dios. Bibalazduxh rexpejn Jesucrist che biejn diajgreni rediidxga.

⁴ Che bidzujñreni guedx Jerusalén, huichagloj rexpejn Jesucristreni. Dxejcti bij Pabl nájza Bernabé diidx lo reapost, lo rebengool nani rnibee rexpejn Jesucrist, nájza lo rexpejn Jesucrist, guiraa redzunro nani cayunnäj Diosreni. ⁵ Dxejc huisulii gaii refarisee ni ahuililajz xtidx Dios, räjpreni lojreni:

—Che chalilajz rebenzajt xtidx Dios, nanab chureni bee, nanabza gusoobreni leii xten toMoisés.

⁶ Dxejcti bachagsa' reapost nájza rebengool nani rnibee rexpejn Jesucrist, te don xho gunreni. ⁷ Huisulii Pedr, räjpnii lojreni:

—Guejbtu, resa'ä, anajntu xho bejn Dios gubalti ijz. Gule Dios narä lo guiraanu te gusule'ä xtidx Dios loj rebenzajt, te chalilajzreni xtidx Dios. ⁸ Luxh Dios, nani numbechee lastoo guiralii bejn, badeed seen huililajzpac rebenzajt xtiidxni. Badeed Dios Sprit Dxan xtenni lojreni si'c te seen te gacbee bejn najcreni xpejnii. Sigac baniidxni Sprit Dxan xtenni loonu galoo, si'cza badeed-nini lo rebenzajt. ⁹ Sigajc rinälajz Dios nuunu, sigajcza rinälajzni rebenzajt. Che huililajz rebenzajt xtiidxni, basia Dios lastooreni. ¹⁰ Naj ¿xhicuent rusieedtu Dios, ä? Di niajcdi nisianäj rextadnu releiiga, digacdiza chosanäjnu

releiiiga naj. ¿Xhicuent rlanjtu chasanäj rebenzijt releiiiga?
¹¹ Xhet si'cti gacni sa'csi Dios ruslaa nuure lo xtojlnu che rililajznu xtidx Jesucrist, luxh si'cza ruslaani rebenzijt lo dojl che rililajzreni xtidx Jesucrist —räjp Pedr.

¹² Che gulujx gunii Pedr, dxitis gurej rebejn, bacuadij-greni xtidx Bernabé, xtidx Pabl. Guiro'preni bijreni diidx xho cayujn Dios redzunro, remilagwr nez lo rebenzijt.

¹³ Che gulujx gunii guiro'preni, xhet guniidi rebejn. Jacobtis räjp lojreni:

—Sa'ä, colcuadijg xtidxä. ¹⁴ Agunii Simón ni rniireni Pedr lojtu xho ganiddoo baxhal Dios laani lo rebenzijt te gurejdx Dios rexpejn ni nadxaag lo rebenzijt. ¹⁵ Luxh si'cza caj lo guijt. Agujc xcheroduxh bacuaa reniguii nani gunii xtidx Dios, che räjpni:

¹⁶ Sidzujn dxej ni guibisacä.

Sunä guzuxhijb guiraa rebejn nez löä si'c bazuxhijb rexpejn Israel che gubajn toDavid.

Si'c gunä,

¹⁷ te jiädgajn rebejn narä te gacä Xtiosreni,

näjza guiraa rebenzijt nani najc rexpenä jiädgajn narä,

¹⁸ si'c räjp Dios nani galooli baluiloj guiraa redzuunre.

¹⁹ Dxejcti räjp Jacob lojreni:

—Dee najc xhigab ni runä. Na'cru gusieednu rebenzijt ni cagusiechlajzreni, renani salilajz xtidx Dios.

²⁰ Gucuaanu te guijt, jie'tznu lo rebenzijt: Na'c gaureni xhi cos ni basuj bejn loj rebanäjb, sa'csi dinu chalilajz xcuent rebanäjb. Na'cza guesnäjreni bejn ni di gac chäälni, na'cza gaureni bääl nani gurerejn, na'cza gaureni rejn. ²¹ Dee gucuaanu te di guche'chreni xpejn Israel sa'csi nen guiraa reguejdx galooli yu' rexpejn Israel nani rol leii xten toMoisés gasob sabd —räjp Jacob.

²² Che biejn diajg reapost näjza rebengool nani rnibee, näjza guiraa rexpejn Jesucrist xtidx Jacob, bichagljazreni

xtiidxni. Dxejcti gulereni tiop sa'reni chanä Pabl nájza Bernabé guedx Antioquía. Gulereni Judas ni rniireni Barsabás nájza Silas. Guiro'preni najc bejn ni saj cru loj rexpejn Jesucrist. ²³ Dxejcti bejnreni guijt z huinäreni. Bacuaaren i rediidxre:

“Nuure reapost, nájza rebengool ni rnibee, nájza rexpejn xquidoo Jesucrist ruxhalnu xtixtios lojtu, resa'nu nani rbájz guedx Antioquía nájza estad Siria nájza estad Cilicia. ²⁴ Rucuaanu guijt zre sa'csi biejn diaagnu birii gaii resa'nu ree biädsieedreni la'tu con xtiidxreni, cayu'tu yärsia' sa'csi najreni lojtu nanab chutu bee si'c gunibee toMoisés, guibajnzatu si'c rnii leii xten toMoisés. Xhet nuudinu gunibeenu jiadniireni si'c. ²⁵ Ni'cni biennu xhigab guxhalnu lojtu tiop dade' ni gulenu loj resa'nu te chanäreni Bernabé nájza Pabl, nani sanälaznu. ²⁶ Agajc balti huält rlaizreni nugu'treni Bernabé nájza Pabl, luxh direni guidxelj gusule'reni xtidx Jesucrist. ²⁷ Naj ruxhalnu Judas nájza Silas lojtu. Laaren i susule'za guiraa rediidxre lojtu. ²⁸ Tejsi najc xhigabnu con Sprit D xan xten Dios. Di rlaaznu gutaalrunu leii ni chasanäjtu. Releiitis nani nanab rusoobnu rucuaanu lojtu. ²⁹ Na'c gautu xhicos ni basuj bejn lo rebanäjb, sa'csi dirunu chalilaaz xcuent rebanäjb. Na'cru gautu rejn, na'cza gautu bääl nani gurerejn, na'cza guesnäjtu nani digac chäältu. Palga gusoobtu recosre, laaca cayujntu. Sacru guibajntu. Sujiannäjtu Dios.”

³⁰ Dxejcti basadiidx rexpejn Jesucrist Judas nájza Silas huinäreni Pabl nájza Bernabé guedx Antioquía. Che bidzujnreni ro'c batojpreni guiraa rebejn nani huililajz xtidx Dios te bilreni guijt zga lojreni. ³¹ Che biejn diajg rexpenz it Jesucrist diidx ni caj lo guijt zga, bibalazduxhreni sa'csi gulecdxi diidxga lastooreni. ³² Dxejcti basule' Judas nájza Silas xtidx Dios lojreni, sa'csi rudeed Dios xtiidxni

loj guiro'preni. Xhidajl diidx guniireni te baliidxreni rexpejn Jesucrist. Lacti gulecdxi rediidx ni guniireni lastoo guiraa rexpejn Jesucrist. ³³ Ro'c bia'nreni xchej, dxejcu cuäjb rexpejn Jesucrist gubi'reni te gudeedreni xtixtios loj reni baxhaļreni.

³⁴ Dxejc Silas bejn xhigab jia'nni ro'c. ³⁵ Luxh Pabl nājza Bernabé bia'n guedx Antioquía. Guiro'preni baluii, basule'reni xtidx Dios loj rebejn. Guyu'za sgaii dade' ni gucnājreni.

Huihuisac Pabl rexpejn Jesucrist nen guiraa reguejdx

³⁶ Che gudejd xhidajl dxej, räjp Pabl lo Bernabé:

—Do'o guibi' lo guiraa reguejdx cadro basule'nu rextidx Dios te chohuiinu don xho yu' rexpejn Jesucrist.

³⁷ Niluxh Bernabé rlajz chanäreni Juan ni laa Marcw.

³⁸ Naaddi Pabl chääni, sa'csi birii Marcw lojreni che guyu'reni nez Panfilia, diruni nisianāj Pabl nājza Bernabé.

³⁹ Dxejc gudildiidxreni. Gubicajtireni lo sa'reni. Ni'c sanā Bernabé Marcw, biu'reni nen barcw, sääreni Chipre ni re' galäii nisdoo. ⁴⁰ Dxejcti Pabl gule Silas te sanänini. Badeed rexpejn Jesucrist xtixtios lojreni, räjpreni gacnāj Diosreni. ⁴¹ Laļ ni sasajreni gudejdreni guiraa reguedx Siria nājza guiraa reguedx Cilicia, ro'c gucnājreni guiraa rexpejn Jesucrist, basule'rurenit xtidx Jesucrist lojreni.

16

Huinä Timoteu Pabl nāj Silas

¹ Bidzunsac Pabl nājza Silas reguedx Derbe nājza Listra. Ro'c bidxaagreni te xpen Jesucrist ni laa Timoteu. Xnanni najc beņ Israel ni huililajz xtidx Jesucrist. Xtadni najc beņ griegw. ² Didxsa'ctis rnii rexpen Jesucrist ni yu' Listra nājza Iconio xcuent Timoteu. ³ Rlajz Pabl chanāni Timoteu. Dxejcti basāļ Pabl bee Timoteu te gujcnit si'c

xpeṅ Israel, te xhet naadi rexpejṅ Israel, sa'csi guiraareni nanchee xtad Timoteu najc beṅ griegw. ⁴ Che bidzujṅreni cade tej reguejdx, basule'reni xtidx reapost nājza rebengool nani rnibee xpeṅ Jesucrist guedx Jeurusalén, te gusoob rexpejṅ Jesucrist diidx ni bacuaareni lo guijtz. ⁵ Bazutijp xtidx Dios lastoo renani huililajz xtidx Jesucrist. Guixe-guixee xhidajlru beṅ huililajz xtidx Dios xcuent Jesucrist.

Lo te bacal gunii te niguii lo Pabl

⁶ Che gudejdreni distrit Frigia, nājza estad Galacia, di Sprit Dxan xten Dios nusaan nusule'reni xtidx Jesucrist neṅ reguedx Asia. ⁷ Bidzujṅtirenireni gajxh estad Misia. Dxejc rlanjzreni nijreni estad Bitinia, niluxh di Sprit Dxan xten Dios nusaan nijreni ro'c. ⁸ Ni'c gudejdtirenireni stelaad estad Misia, bidzujṅreni guedx Troas. ⁹ Te yääl si'c lo te bacal bahuii Pabl suga' te beṅ Macedonia. Canabduxh niguiiga lo Pabl, räjpni:

—Gudaa ladxä, estad Macedonia, te gacnäjlru nuunu.

¹⁰ Che bara yääl ni gunixcal Pabl, gudilgajcnu te barcw te chonnu estad Macedonia, sa'csi gucbeenu Dios najc nani caguxhaḷ nuure te guluiini xtiidxni lo rebeṅ Macedonia. Narä, Lucas, ni cagucuaä rediidxre, gusanää Pabl nājza Silas.

Che guyu' Pabl con Silas guedx Filipos

¹¹ Biu'tinu neṅ barcw ro' guedx Troas. Bidzujṅnu Samotracia, te yuj ni re' neṅ nisdoo. Che bara yääl bidzujṅnu guedx Neápolis. Ro'c biriinu neṅ barcw, ¹² bionnu guedx Filipos, guejdx nani sajcro lo estad Macedonia. Guedx romanni. Ro'c bia'nnu tiop choṅ dxej. ¹³ Che gojl sabd, dxej ni rusilajz rexpejṅ Israel, biriinu guejdxga bionnu ro' te gueuu, sa'csi biennu xhigab ro'c jiaäd rexpejṅ Israel te guininäjreni Dios. Ro'c gurejnu, guniinu lo renane'

nani bire' ro'c. ¹⁴ Lojreni nadxaag te nane' ni laa Lidia, te benzijt ni digac xpejn̄ Israel. Guedx Tiatira siädni. Ruto'ni ladmuraad ni sacduxh. Rajn̄ gunaaga Dios si'c rajn̄ rexpejn̄ Israelni. Bacuadiajgni xtidx Jesucrist ni cagusule' Pabl. Guenäj Dios nane'ga te huililajzni xtiidxni. ¹⁵ Birobnisni, näjza guiraa reni rbäjz rolizjni. Dxejc guniini loonu:

—Palga ruhuitu guliä rililazä xtidx Dios, coltaa rolizä te ro'c cuääztu.

Lacti gunab nane'ga nuunu, ni'c huijia'nnu rolizjni.

¹⁶ Te dxej cheni sionnu cadro rninäj bejn̄ Dios, bidx-aagnu te dxa'p nani yu' te bendxab nen̄ lastooni. Rajp rexpaxhuaanni melduxh sa'csi rusule' dxa'pga recos ni gajd gac. ¹⁷ Birinajl dxa'pga Pabl näjza nuure. Rbedxa' dxape'ga, räjpni:

—Reniguiire najc xmos Dios nani rnibee guideb guedxliuj. Ruluiireni loonu xho laanu lo xtoj̄nu —räjp dxape're.

¹⁸ Balti dxej birinajl dxape'ga nuure, entis caniini rediidxga lo rebejn̄. Lacti basieed dxape'ga Pabl, ni'c gubiréni, räjpni lo bendxab ni yu' nen̄ lastoo dxape'ga:

—Xcuent xcäl̄rnibee Jesucrist miä lojlu: “Birii nen̄ lastoo dxape'ga.”

Lagajc dxejc birii bendxab nen̄ lastoo dxape'ga.

¹⁹ Che bahuü rexpaxhuaan dxape'ga diru dxape'ga gun gan melro, gunaazreni Pabl näjza Silas. Dxejcti gudobx-hajxhreni guiro'preni nez roguü cadro suga' reguxhtis. ²⁰ Che bidzun̄äjreni Pabl näjza Silas lo reguxhtis, räjp rexpaxhuaanni lo reguxhtis:

—Reniguiire najc xpejn̄ Israel. Cayujnreni bieyj lo guejdxre. ²¹ Caguluiireni garenca leii nani digacdi gusoobnu sa'csi najcnu bejn̄ roman.

²² Dxejcti bidxechnäj rebejn Pabl näjza Silas. Gu-nibee rejuejz gulääreni xhajn Pabl, näjza xhajn Silas, te batiäjlneni baar guideb tiejxh guiro'preni. ²³ Che gulujx gudinduxhreni Pabl näjza Silas, biäurenin enen latzguiib. Dxejcti räjp reguxhtis lo reguixhajg:

—Colgapdzu'tzreni, di gusaantu guiriireni.

²⁴ Basäl guixhajgreni enen latzguiib. Guyu' ni'reni enen te baräjd ni sojb gueed te di guxunreni.

²⁵ Garolyääl guninäj Pabl näjza Silas Dios, gusloj cayolreni dij ni rliä'p xpala'n Dios. Biejn diajg guiraa rebejn ni yu' enen latzguiib cayolreni. ²⁶ Chela gujc te xuduxh, basniib guideb latzguiibga. Bixal guiraa repuert, birucya' guiraa recaden, bixal ro' rebaräjd cadro naaz ni'reni. ²⁷ Che gubajn guixhajg ni canäj latzguiib, bahuini naxhal latzguiib, gulääni spaad xtenni, te rlanjni nugu'tni lagajc laani, sa'csi naani abadxuñ reni niäu enen latzguiib. ²⁸ Dxejc guredxa' Pabl, räjpni lo guixhajgga:

—Na'c gunlu si'c. Bahuii, guiraliinu suga'nu ree.

²⁹ Dxejc gunibee guixhajg biääd te bajl te biu'ni enen latzguiib. Racsejsni biäädni bazuxhijbni nez loj Pabl näjza nez loj Silas. ³⁰ Dxejcti gulää guixhajgreni enen latzguiib. Gunabdiidxni räjpni lojreni:

—¡Colguinii, dade'! ¿Xhini'c nanab gunä te gusläa Dios narä lo dojl?

³¹ Räjp Pabl näjza Silas lo guixhajg:

—Huililajztis xtidx Dios xcuent Jesucrist, luj näjza guiraa reni yu' rolijzlu, te gusläa Diostu lo dojl.

³² Basule' Pabl näjza Silas rextidx Dios lojni näjza loj guiraa rebejn ni yu' rolijzni. ³³ Lagajc dxejc, garol yääl, huinä guixhajgreni gudiibni dejtreni cadro batiuug baarreni. Dxejcti batiobnisreni guixhajg näjza guiraa reni yu' rolijzni. ³⁴ Dxejc huinä guixhajgreni rolijzni, ro'c

badeedni xhi gudajwreni. Laani nájza guiraa reni yu' rolizjni bibalazduxhreni sa'csi huililazreni xtidx Dios.

³⁵ Che bara yáäl, baxhał reguxhtis stiop guixhajg rájpnı lo guixhajg nani cuanáj latzguiib:

—Baslaa reniguiiga.

³⁶ Dxejcti huiye'tz guixhajgga lo Pabl, rájpnı:

—Anaj reguxhtis guslaátu. Naj colcháj, gacnáj Dios la'tu, saru cháātu.

³⁷ Niluxh rájpnı Pabl loj reguixhajg:

—Nuure najczanu beņ roman. Batiájłreni baar detznu nez loj guiraa rebejņ. Nicla niniabdiidxreni la yu' xhi dojl biennu. Basäurenı nuure neņ latzguiib. Leii xten roman di gusaan gac rebeņ roman si'c. Luxh naj rlajzrenı guslaarenı nuure xhiga'tz. ¡Dinu guirii si'c! Lagajc laarenı sujiädsläärenı nuunu.

³⁸ Che huiye'tz reguixhajg diidxga lo reguxhtis, bidxebduxhrenı che biejn diajgrenı beņ roman najc Pabl nájza Silas. ³⁹ Dxejcti biäd reguxhtis, guläärenı Pabl nájza Silas, gunabrenı jiájłlajzrenı. Gunabduxhrenı lo Pabl nájza Silas; rájpnı:

—Coljiunejz guejdxre.

⁴⁰ Che biriirenı neņ latzguiib, huijrenı roliz Lidia. Balijdxrenı rexpejņ Jesucrist, gulecdxirenı lajz rexpejņ Jesucrist. Dxejcti biunejzrenı guejdxga.

17

Cadxechduxh guiraa rebeņ Tesalónica

¹ Che gudejdrenı reguedx Anfópolis, nájza guedx Apolonia, bidzujņrenı guedx Tesalónica cadre yu' te xquidoo rexpejņ Israel. ² Ro'c basule' Pabl xtidx Dios si'c ni rujnpacni. Choņ sabd, dxej ni rusilajz rexpejņ Israel, basule'ni xtidx Dios lojrenı. ³ Basule' Pabl xtidx Dios ni caj lo guiijt ni bacuaa reniguii ni gunii xtidx Dios galooli. Caj

lo guijtza: “Nanab ted Crist trabajwduxh, guetni, niluxh sibansacni lo rebengut.”

Dxejc räjp Pabl lojreni:

—Ruiä lojtu diidx xcuent Jesús; lagajc Jesúsre najc Crist —räjpni.

⁴ Yu' rexpejn Israel huililajz xtidx Dios, gusanäjreni Pabl näjza Silas. Näjza xhidalduxh beñ griegw nani rajñ Dios näjza xhidajl reguna griegw ni sajcru huililajz xtiidxni. ⁵ Luxh yu' rexpejn Israel ni di chalilajz, ni bidxechlajz. Batie'reni gaii beñploj, beñlatsiaj, bejnreni biey nez galäii. Biu'reni rolijz Jasón caguilreni Pabl näjza Silas te cuääreni guiro'preni nez lo rebejn. ⁶ Niluxh che direni nidxäl Pabl näjza Silas, alga Jasón gulääreni näjza gaii renani rililajz xtidx Dios, sanääreni redee lo reguxhtis, cabedxa'reni:

—Reniguiire ni abejn bieiduxh guideb guedxliuj abidzujñreni laadxnu, ⁷ luxh badeed Jasón rolijzni jia'nreni. Direni gusoob leii xten César, najreni yu' stee reii ni laa Jesús.

⁸ Che biejn diajg reguxhtis näjza rebejn diidxre, guyu'reni yärsia'. ⁹ Cua' reguxhtis meel lo Jasón näjza lo rexamigwni. Räjp reguxhtis sudedsacreni meelga che jii Pabl näjza Silas, jiunejzreni lo guejdxga. Dxejcti baslaareni Jasón näjza rexamigwni.

Che guyu' Pabl con Silas guedx Berea

¹⁰ Che biu' guxhijn, baxhalgajc rexpejn Jesucrist Pabl näjza Silas ste guejdx ni laa Berea. Che bidzujñreni guejdxga, biugajczeni xquidoo rexpejn Israel. ¹¹ Hueenru najc rebeñ Berea loj rebeñ Tesalónica, sa'csi rbaali lajzreni bacuadiajgzeni xtidx Pabl ni guniini xcuent Jesucrist. Guixe-guixee biñreni guijtza cadre caj xtidx Dios te gucebereni la gulii rextidx Pabl. ¹² Xhidajl rexpejn Israel näjza xhidajl beñ griegw ni sajcru, gunaa sigajc niguii,

huililajz xtidx Dios. ¹³ Che gucbee rexpejn Israel ni rbäjz guedx Tesalónica caguluii Pabl xtidx Dios guedx Berea, biäädreni guedx Berea. Che bidzujnreni lo guejdxga bejnreni biey ro'c. ¹⁴ Dxejcti baxhal rexpejn Jesucrist Pabl, huijni ro' nisdoo. Niluxh Silas näjza Timoteu bia'n guedx Berea. ¹⁵ Dxejcti rebejn ni guzanäj Pabl huinänini guedx Atenas. Ro'c räjp Pabl lo rebejn ni biädnäni gudeedreni diidx lo Silas näjza Timoteu jädgajcreni lojni. Dxejcti rebejn ni sanä Pabl gubisac guedx Berea.

Guyu' Pabl guedx Atenas

¹⁶ La_l ni guläjz Pabl guedx Atenas, guyuduxhni yärsia' sa'csi bahuiini rajn guiraa rebejn rebanäjb nani runchee lagajc bejn. ¹⁷ Ni'c ne_n xquidooreni gudildiidx Pabl rexpejn Israel näjza rebenzajt ni rajn Dios si'c rajn rexpejn Israelni. Guixe-guixee gudildiidxni chutis bejn ni re' lo guii. ¹⁸ Dxejcti biääd gaii bejn lojni. Yu' reni ro_lduxh guijt_z ni bacuaa epicúreos, yu'za renani ro_lduxh guijt_z ni bacuaa estoicos, gudildiidxreni Pabl. Yu' reni räjp lo sa'reni:

—¿Xhicha guinii bejnre loonu? Entis naxhal ro'ni.

Yu'zaren_i räjp lo sa'reni:

—Pet calä'pni xpala'n tiop dioscoob.

Si'c guniireni sa'csi biejn diajgreni bazä't Pabl “Jesús” näjza “Resurreccion”, ni säloj yälgubansac lo rebengut. ¹⁹ Dxejcti gunaazreni Pabl sanärenini nez dajn ni laa Areópago. Ro'c yu' si'c te jusgaad. Räjpreni lo Pabl:

—Rlaaznu gacbeenu xhi diidx ruluiilu, ²⁰ sa'csi rujyulu diidx nani dinu jiacbee. Ni'cni bejn huen, basule' diidxre loonu te gacbeenu xhi sälojreni —räjpreni.

²¹ Rebejn Atenas näjza rebenzajt ni yu' ro'c ruteedreni redxey rniireni didxcoob lo sa'reni, o rucua diajgreni didxcoob. Ni'cpac rchaglajzreni.

²² Galäii Areópago huisulii Pabl, räjpni lojni:

—Colcuadiajg guejbtu, beñ Atenas. Abahuiä xho ran_duxhtu xhidajl banäjb. ²³ Che siädsaa lo guejdxre, bahuiä lo rexpanäjbtu. Bahuiäza loj te piään cadro caj rediidxre: “Dios ni dinu jiembee.” Narä ranä Diosga. Rumbeä Diosga nani rajntu mase ditu gumbeeni. Susule'ä xtiidxni lojtu.

²⁴ Räjþ Pabl:

—Diosre benchee guedxliuj näjza guiralii ni yu' lo guedxliuj, sa'csi rnibeeni xhaguibaa näjza guedxliuj. Di Diosre cuääz lo piään niclaza nen reguidoo ni runchee bejn. ²⁵ Diza Diosre guiquiin chu gacnäjni sa'csi lagajc Diosre rudeed yäl_nabajn, yäl_nadaan, näjza guiralii nani rquiin reben guedxliuj.

²⁶ Räjþ Pabl:

—Guiralii reben guedxliuj najc rexagdo tejsi gunaa näjza tejsi niguii. Desde galooli gunibee Diosga bal ijz chu renacion, näjza cati gunibee renacionga. ²⁷ Benchee Dios guiraa reben guedxliuj te quiilreni Dios te chalilajzreni xtiidxni. Luxh suga' Dios gajxh cadetejnu, ²⁸ sa'csi Dios rujn nabajnnu lo guedxliuj, runiidxni rsiaanu lo guedxliuj, runiidxzani rdajlru xcäl_naba_nnu lo guedxliuj. Laaca bacuaa rexpennajntu: “Najcnu xi'n Dios, sa'csi benchee Diosnu.” ²⁹ Ni'cni, sa'csi najcnu xi'n Dios, di nungäj_l jiennu xhigab najc Dios si'c rebanäjb ni nac-chee pla't, o guij, o yajg si'ctis ni runchee bejn rexpanäjbtu. ³⁰ Nen redxey ni di bejn niembee Dios, diza Dios niujn castiigwreni. Niluxh naj gunibee Dios gusiechlajz guiraa rebejn, ³¹ sa'csi abasoobni te dxey cheni gac Jesús juejz lo guiraa reben guedxliuj. Agule Diosni gacni juejz, sa'csi rumbechee Jesucrist chu najc benguijdx, chuza najc bens'a'c. Rnili Jesucrist rediidx ni najc guliitis. Guläs Dios Jesucrist, baspan_sacnini lo rebengut, te gacbeenu rajp Jesucrist yäl_rnibee lo guiraa recos.

³² Che biejn diajg rebejn_{ga} guba_{nsac} Jesucrist lo re-bengut yu' reni baxhiznäj xtiidxni. Yu'za reni räjp:

—Sucuadiajgrunu xcuent ni rusule'lu.

³³ Dxejcti birii Pabl lojreni. ³⁴ Yu'za reni huinajlni, huililajzreni xtidx Dios. Lojreni nadxaag te dade' ni laa Dionisio ni najc te juejz lo Areópago; näjza te nane' ni laa Dámaris. Guyu'za sgaii bejn ni huililajz.

18

Guyu' Pabl guedx Corinto

¹ Biriiti Pabl guedx Atenas, huijni guedx Corinto. ² Ro'c bidxaagni te dade' ni najc be_n Israel, ni laani Aquila. Ponto najc lajdxni. Biädgajni ro'c, biriini Roma, sa'csi gunibee rei Claudio guirii guiraa rexpejn Israel guedx Roma. Birinäj Aquila Priscila chääl_{ni}. Biriireni Italia, biädreni guedx Corinto. Bihuii Pablreni, ³ sa'csi lagajc dzuun ni rujnreni rujnzani. Tejsi lajt guläjzreni te bejn jionreni tejsi dzuun. Runcheereni yuguijd. ⁴ Gasob sabd, dxej ni rusilajz rexpejn Israel, basule' Pabl xtidx Dios nen_n xquidoo rexpejn Israel. Rlajzni chalilajz rexpejn Israel näjza be_n griegw ni digac xpejn Israel diidx ni rniini xcuent Jesucrist.

⁵ Dxejcti birii Silas näjza Timoteu Macedonia. Che bidzujnreni guedx Corinto, gusloj rusule'tis Pabl xtidx Dios guixe-guixee, guniliini lo rexpejn Israel:

—Jesús najc Crist ni runloj rexpejntu guxha_l Dios.

⁶ Dxejc bidxehnäj rexpejn Israelni, guniyajzaren_{ni} xti-idxni. Dxejcti gubijb Pabl xhajbni si'c te seen diruni jiureni, caguro'nnireni. Räjpszani lo rexpejn Israel:

—Lagajc la'tu rajptu dojl_l nittu lo Dios. Xhet dojl_{di} rapä narä. Aguniä xtidx Jesucrist lojtu. Naj lo rebejn nani di gac be_n Israel gusule'ä xtidx Jesucrist —räjzni.

⁷ Dxejcti biriini lojreni, huijni roliz Justo, te bejn ni rajn Dios si'c rajn rexpejn Israelni. Rolizni sojb cuä' xquidoo rexpejn Israel. ⁸ Crisp, ni rnibee xquidoo Israel, huililajz xtidx Jesucrist. Huililajzza guiraa reni rbäjz rolizni. Xhidajlza bejn Corinto huililajz xtidx Jesucrist, dxejcti birobnisreni. ⁹ Gojl te yääl gunii Dios lo te bacal, räjpni lo Pabl:

—Na'c guidxeyblu. Guniitis, na'c gusäulu ro'lu, ¹⁰ sa'csi narä suganää luj. Rut gacdi gun latsiajlu. Aguleä xhidalduxh bejn lo guejdxre te gacreni xpenä —räjp Dios.

¹¹ Ni'c bia'n Pabl ro'c tebizgarol. Baluiini xtidx Dios lojreni.

¹² Che gujc Galíon gubernadoor xten Acaya, tejsi xhigab bejn rexpejn Israel bidojpreni te gunaazreni Pabl. Sanäreni Pabl jusgaad cadro yu' Galíon. ¹³ Räjpreni lo Galíon:

—Niguiire caguluii rebejn ganreni Dios garenca mood, xhet si'cti ni caj lo xleiinu —räjpreni.

¹⁴ Agojl ninii Pabl, che räjp Galíon lo rexpejn Israel:

—Palga gulanni o bagu'tni te bejn, dxejc yu' xtojlni te gucuadiagä xtiidxtu. ¹⁵ Per la'tu cadxe'chtu xcuent diidx, xcuent laj bejn, xcuent ni caj lo leii xtentu. Gubernadoor narä, xho gucuadiagä diidxga. Lagajc la'tu colchahuii xho guntu yälguxhtis —räjp Galíon.

¹⁶ Gunibee Galíon barilaagw resoladaad rexpejn Israel.

¹⁷ Dxejc gunaaz reGriegw Sóstenes nani rnibee xquidoo rexpejn Israel. Batiäjlni baar dejtz Sóstenes nez ro' jusgaad xten Galíon. Niluxh nicla niu Galíonreni.

Chon huält huihui Pabl rexpejn Jesucrist

¹⁸ Bia'nti Pabl Corinto xchej. Dxejc badeed Pabl xtixtios lo rebejn nani huililaz xtidx Jesucrist, biriini ro'c. Sanäni Priscila näjza Aquila, biu'reni nejn barcw te siireni

nez estad Siria. Dxejc ganid gudejdreni guedx Cencrea, cadre bahuaj Pabl yejcní si'c te seen yu' xhi diidx bia'nni con Dios. ¹⁹ Che bidzujñreni guedx Éfeso, basa'n Pabl Priscila nájza Aquila ro'c. Biu' Pabl xquidoo rexpejn Israel, ro'c bachaagni diidx con rexpejn Israel. ²⁰ Dxejcti che gunabreni jia'n Pabl ro'c xchej, naaddini jia'nni. ²¹ Badeedni xtixtios, rájpní lojreni:

—Nungájlpac chatedä laníro guedx Jerusalén. Siälsacä ree palga gusaan Dios jialä.

Biusacni nen barcw, biriini guedx Éfeso. ²² Che bidzujñni guedx Cesarea, biriini nen barcw, huijni guedx Jerusalén. Che bidzujñni, guniini xchan lo reapost nájza lo rexpejn Jesucrist. Dxejc huijni guedx Antioquía xten Siria. ²³ Che gudejd balti dxej, biriini guejdxga, gudejdni guideb estad Galacia nájza guideb distrit Frigia. Nen cade tej reguejdxga, balijdxni rexpejn Jesucrist te gutijpru lajzreni.

Balúi Apolos xtídx Dios nen guedx Éfeso

²⁴ Nen redxejga, te dade' ni laa Apolos bidzujñ guedx Éfeso. Najcni xpejn Israel, gojlni guedx Alejandría xten Egipto. Lacti rajc rnisa'cni, nanduxhzani xtídx Dios. ²⁵ Nanduxhni xtídx Dios xcuent Jesucrist. Laaca basule'ni xtídx Dios, guideb xcálnabajñni rinälajzni Dios. Niluxh xcuent Jesucrist najntisni yälrobnis xten Juan. ²⁶ Nicla nidxejb Apolos gusloj caniini nen guidoo xten rexpejn Israel. Che biejn diajg Priscila nájza Aquila xtiidxni, huinärenini rolíjzreni. Ro'c basule'rureni xtídx Dios nani gajdñi gan. ²⁷ Dxejc, sa'csi abejñ Apolos xhigab cháäni reguejdx ni tre' nez Acaya, bacuaa rexpejn Jesucrist guíjtz lo rexpejn Jesucrist ni yu' nen reguejdxga te gacnäjreni Apolos. Gucnäduxh Apolos rebejn nani badeed Dios huililajz xtídx Dios nen reguejdxga, ²⁸ sa'csi gunilii Apolos

nez loj guiraa rebejn̄ xhet laadi rnii rexpejn̄ Israel. Di niajcdi nuzejc rexpejn̄ Israel diidx lo Apolos sa'csi ganax con xtidx Dios ni bacuaa reniguii ni gunii xtidx Dios galoo basule'ni: “Jesús najc Crist nani cayunlojtu guxhaļ Dios.”

19

Guyu' Pabl guedx Éfeso

¹ Laļ ni guyu' Apolos guedx Corinto, huij Pabl xhidajl reguejdx nen̄ región Asia, dxejcti bidzujnni guedx Éfeso cadro bidxaagni gaii bejn̄ nani huililajz xtidx Dios.

² Gunabdiidx Pabl lojreni:

—Che huililajztu xtidx Dios, ¿la biädlaļz Sprit Dxiān xten Dios nen̄ lastootu, ä?

Räjpreni lojni:

—Nicla gajd diajgnu jiejn la yu' te Sprit Dxiān xten Dios.

³ Räjp Pabl lojreni:

—¿Xho birobnistu, pues?

Räjpreni lojni:

—Birobnisnu si'cni baluii Juan tiobnis bejn̄.

⁴ Dxejcti räjp Pabl lojreni:

—Guliica bastiobnis Juan che basiejch lajz rebejn̄ xto-ļreni. Räjpza Juan lo rebejn̄: “Coļchalilajz xtidx bejn̄ ni siääd detzä.” Bejn̄ ni basä'tni najc Jesucrist —räjp Pabl.

⁵ Che biejn diajgreni rextidx Pabl birobnisreni te gacbee rebejn̄ najcreni xpejn̄ Jesucrist. ⁶ Che batzuub Pabl ñaani yejcreni, biu' Sprit Dxiān xten Dios nen̄ lastooreni. Dxejc gusloj caniireni garen-garen didxsaj. Guslojza caniireni diidx ni badeed Dios lojreni. ⁷ Si'c tzubitio'p dade' gusajc si'c.

⁸ Si'c choñ bäii, guixe-guixee gunii Pabl rextidx Dios, basule'ni xcuent xcälrnibee Dios loj rebejn̄ nen̄ xquidoo rexpejn̄ Israel. Dini nidxejb guniini loj rebejn̄.

⁹ Dxejc guyu' reni gucnajd, dirureni nililajz xtidx Dios. Che gusloj caniyajreni xtidx Dios lo rebejn, biunejz Pabl ro'c sanäni rexpejn ni rililajz xtidx Jesucrist. Sanä Pablreni te bidxagsa'reni ro scueel xten mastr Tiranno. Ro'c bidxagsa'reni te guixe-guixee basule' Pabl xtidx Dios lojreni. ¹⁰ Tiop ijz bejn Pabl si'c, ni'c guiraa rebejn ni rbäjz Asia biejn diajgreni xtidx Dios. Rexpejn Israel sigajc reben griegw biejn diajgreni xtidx Dios. ¹¹ Gucnäj Dios Pabl bejn ni xhidajl dzunro, remilagwr. ¹² Ni'cni biääd bejn ca'reni baii, ca'reni tla' lajd te guxheebreni relajdga lo Pabl. Dxejcti rinäreni relajdga lo rebejn ni racxhuu, luxh riacgajc rebejn ni racxhuuga, rigajcza rebenxab lastoo renani yu' benxab.

¹³ Dxejcti guyu' gaii bejn Israel nani entis rcansaj, direni cuääz tejsi guejdx. Najcreni bejn ni rbää benxab lastoo rebejn. Bejn redee xhigabcoob, naareni cuääreni benxab xcuent laj Jesucrist, ni'cni räjpreni lo renani yu' benxab nen lastooni:

—Xcuent xcälrnibee Jesucrist nani ruluii Pabl rnibeenu guiriilu nen lastoo bejnga —räjpreni.

¹⁴ Guyu' gajdz xi'n Esceva, te bejn Israel, nani sajcro lo rebixhojz. Rujn redee dzuun rbääreni rebenxab nen lastoo rebejn. ¹⁵ Che gunii rexi'n Esceva loj benxabga si'c, räjp benxab ni yu' nen lastoo bejnga lojreni:

—Rumbeä Jesucrist, rumbeäza Pabl. ¿La'tu, chu la'tu? Dina gumbeä la'tu.

¹⁶ Dxejcti bixa't niguii nani yu' benxab nen lastooni yejc rexi'n Esceva, gudinuxhnireni, basäl'ta'nireni, batiäjsni xhajbreni. Dxejcti baxunreni biriireni nen yu'ga, bidxälgujdxzaren i biräsyä' xhajbreni. ¹⁷ Dxejcti guiraa reben Éfeso, rexpejn Israel sigajc ben griegw, gucbee xho bennäj benxab reniguiiga. Bidxebduxh rebejnga, luxh huä'p xpala'n Jesucrist.

¹⁸ Xhidalduxh reni huililajz xtidx Dios biääd lo rexpejn Jesucrist. Cacäjpreni guiraa recos xhet laadi nani rujnreni. ¹⁹ Xhidajl reni najc bidxaa biädnä reguijtz cadro caj yäl najn xten rebidxaa. Dxejcti base'creni reguijtzga nez loj guiraa rebejn. Bejnreni cuent lacti meel sajc reguijtzga. Sajcreni tiubitzuu mil melpla't. ²⁰ Xhidalduxh rebejn huililajz xtidx Dios. Batijp Dios lastoo rexpejn ni. Gulä'p guiraareni xpala'n Dios.

²¹ Che gulujx recosre, bejn Pabl xhigab chääni guedx Jerusalén, niluxh tedxgaani reguejdx ni re' nez Macedonia näjza Acaya, bejnzani xhigab, naani:

—Che ahua'a Jerusalén, nanabza cha'a guedx Roma.

²² Ni'cni baxhaļ Pabl Timoteu näjza Erasto, tio'p renani racnäjni, huijreni Macedonia, luxh laani bia'nni Asia.

Bidxechduxh reben Éfeso

²³ Nen redxejga, guyuduxh rebejn yärsia' sa'csi baluii Pabl xtidx Dios. Direni nichagljaz care'ch xtidx Dios. ²⁴ Te dade' ni laa Demetrio runchee ni'ch pla't xten banäjb ni laa Diana, ni najc banäjb xten guejdxga. Demetrio näjza guiraa replateer ni rujn ni'ch xten Diana runduxhreni gaan meel ro'c. ²⁵ Gurejdx Demetrio guiraa replateer ni rujn reni'chga, räjpni lojreni:

—Colcuadiajg, la'tu resa'ä: najntu rbäanu melro lo dzuun ni riennu. ²⁶ Abahuiitu niguiire ni laa Pabl. Abiejnza diajgtu xtiidxn. Räjpni lo rebejn: “Xhet diosdi najc reni racchee con naa bejn.” Guedx Éfeso näjza guideb nación Asia cagusiejchni lajz bejn, xhidalduxh bejn salilajz xtiidxn. ²⁷ Ni'c ries nitloj xtzuunnu palga diru bejn sii ni'ch ni riencheenu. Luxh riesza diru bejn jiädgajñ Diana nen xquidoro Diana. Naj reben Asia, näjza guiraa reben guedxliuj randuxh Diana, banäjb ni sajcru, niluxh palga diru rebejn gan Diana, pet sinitlojni —räjpni.

²⁸ Che biejn diajg replateer xtiidxni, bidxe'chduxhreni, guredxa'reni räjpreni:

—Sacduxh Diana xtios rebeñ Éfeso.

²⁹ Guideb guejdx guyu' biejy. Dxejcti ruxunreni bidxagsa'reni lo yuj cadre rajc rexjuntreni. Gunaazreni Gayo näjza Aristarco, beñ Macedonia ni rinajl Pabl. ³⁰ Rlajz Pabl niu'ni cadre bidxagsa' rebejn, niluxh di rexpejn Jesucrist nusaanni. ³¹ Gaii guxhtis ni rnibee Asia, sa'csi najcreni xamijgw Pabl, baxhalreni diidx lo Pabl, räjpreni:

—Na'c chäälü cadre nadxagsa' rebejnğa —räjpreni.

³² Lo rebejn ni re'ga, yu' reni rbedxa' tej diidx, sgaiireni rbedxa' garenca diidx. Te bieiduxh cayajc. Xhidalduxh rebejnğa nicla gan xhicuent bidxagsa'reni. ³³ Dxejcti gulää rexpejn Israel te dade' ni laa Alejandro lo rebeñ xhidaalga, te guiniini lo rebejn. Dxejcti basääbni ñaani lo rebejn te gac dxi rebejn. Rlajz Alejandro guiniini xcuent rexpejn Israel loj guiraa rebejn, te di guidxe'chreni lo rexpejn Israel. ³⁴ Niluxh che gucbee rebejn najc Alejandro beñ Israel, tiop oꝝ guredxaduxhreni, räjpreni:

—Sacduxh Diana xtios rebeñ Éfeso.

³⁵ Dxejcti biääd secretaar xten guejdxga lo rebejn, gunibeeni guc dxi rebejn, te räjpni lojreni:

—Colcuadiajg, la'tu beñ Éfeso, caguidxäj] te beñ guedxliuj ni di gacbee rebeñ guedx Éfeso rajnpac Diana, nani xhaguibaali bitejb lo guedxliuj. ³⁶ Sa'csi rediidxre najc gulii, nungäj] cuedxitu, na'c guntu recos guiidxre. ³⁷ ¿Xhicuent gunaaztu reniguii ni siädñätü ree? Dhireni gac gubaan ni rbajn recos guidoo, dizareni niniyaj xtiosnu. ³⁸ Naj palga rlajz Demetrio näjza rebejn ni najc plateer chale'c quej, naxhal jusgaad, suga' reguxhtis. Ro'c suchale'creni xquejreni. ³⁹ Niluxh palga yu' xhi stee, nanab gac te junt xte rebenguejdx si'c ni caj lo xleinu. ⁴⁰ Ries jii xquejnu lo gubier, naareni bidojpu te

guidxagdilnu gubier. ¿Dxejca'? ¿Xhi jie'tznu xcuent ni bidxagsa'nu ree?

Dxejcti räjpni:

—Agojl, coljiunejz.

⁴¹ Che gunii secretaar si'c, bire'ch rebejn, biunejzreni ro'c.

20

Huihuisac Pabl rexpejn Jesucrist ni yu' Macedonia näjza Grecia

¹ Che bire'ch rebejn, gurejdx Pabl rexpejn Jesucrist biääd lojni, te balijdxnireni. Badeedni xtixtios lojreni. Sä'tini nez reguedx Macedonia. ² Guiraa reguejdxga cadre gudejdni, balijdxni rexpejn Jesucrist, basule'runi xtidx Dios lojreni. Dxejc sääni reguedx Grecia. ³ Che bidzujñni Grecia, bia'nni ro'c chon bäii. Dxejcti niu' Pabl nen barcw te nijni reguejdx Siria. Niluxh che biejn diajgni cabäz-xhiga'tz rexpejn Israelni te guiniaazrenini, gunaazni nezyuj, gubi'ni nez Macedonia. ⁴ Huinäni Sópater, xi'n Pírios, te beñ guedx Berea; näj Aristarco näjza Segundo, beñ guedx Tesalónica; näj Gayo, beñ guedx Derbe; näj Timoteu; näj Tíquico näjza Trófimo, beñ Asia. ⁵ Guiraa redee gunijd loonu, huiläjzreni nuure guedx Troas. ⁶ Guedx Filipos bidxaag Pabl narä, Lucas. Ro'c gudejdnu lanij xten rexpejn Israel che rajwreni yätxtiil ni di saguij. Biriitinu guejdxga, biu'nu nen barcw te sonnu nez guedx Troas. Gaii dxej gusaanu nen barcw, dxejc bidzunnu guedx Troas. Ro'c bia'nnu gajdz dxej.

Baluu Pabl xhidalduxh xtidx Dios lo rexpejn Jesucrist guedx Troas

⁷ Che gojl dumingw, primer dxej xman, bidxagsa'nu te bidaunu yätxtiil si'c gudaunäj Jesucrist rexpejn pacni galoo che gajdni guet. Abejn Pabl xhigab guira yäl

guiriini guejdxga. Che biu' guxhijñ, gusloj cagusuleduxh Pabl xtidx Dios, huinuuni si'cti garolyäälli. ⁸ Yu' cadre bidxagsa'nu najc jiaa yejc stiop yu'. Xhidalduxh balgan-deel cagusanij ro'c. ⁹ Sobga' te bi'n ni laa Eutico ro' te bentaan. Laļ ni cagusuleduxh Pabl xtidx Dios lo rebejñ, gunaaz bacal bi'nga, gudiejsni, bitejbni lo yuj desde yu' ni riojñ pis. Che huiläsrenini, agujtni. ¹⁰ Dxejcti biäjñ Pabl lo yuj cadre bitejb bi'nga. Bazuxhijb Pabl cadre naga' bi'nga, gudääznini. Dxejcti räjp Pabl lojreni:

—Na'c chutu yärsia'. Agubansacni. Baspajñ Diosni.

¹¹ Dxejcti huäpsac Pabl lo yujiaaga. Ro'c bidaunu yätxtiil si'c gudaunäj Jesucrist rexpejñpacni galoo che gajdni guet. Gunii Pabl lojreni xchejru, che bianijli lo guedxliuj. Dxejc biunejzni. ¹² Xhetliidiru rajcdi bi'nga nani gubansac, nani guläs Pabl. Bibalazduxhreni, huisa'nrenini rolizjni.

Biu'nu neñ barcw, bionnu guedx Mileto

¹³ Gunijdnu lo Pabl. Biu'nu neñ barcw, sonnu guedx Asón, te ro'c guidxaagnu Pabl, sa'csi abejñ Pabl xhigab ni'ni jiini guejdxga, ro'cli jiu'ni neñ barcw. ¹⁴ Che bidxaag Pabl nuunu guedx Asón, biu'ni neñ barcw, sonnu lo nisdoo te bidzunnu guedx Mitilene. ¹⁵ Neñ barcw biriinu ro'c. Che bara yääl, gudejdnu yuj ni re' lo nisdoo ni laa Quío. Che bara stee yääl, bidzunnu guedx Samos. Guedx Trogilio basilaaznu. Che bara stee yääl, bidzunnu guedx Mileto. ¹⁶ Di rlanj Pabl jiu'nu guedx Éfeso, diza rlanjni chunu Asía xchej, sa'csi riojb lajzni guidzunnu guedx Jerusalén te ro'c tedni redxe lanij ni laa Pentecostés.

Guedx Mileto guninäj Pabl reni rnibee xpejñ Jesucrist ni yu' guedx Éfeso

¹⁷ Che guyu'nu guedx Mileto, baxhaḷ Pabl diidx lo rexpejn Jesucrist ni yu' guedx Éfeso, gurejdxni reni rnibee. ¹⁸ Che bidzujñreni lo guejdxga, räjp Pabl lojreni:

—Lagajc la'tu najntu xho nabanä nez lojtu, dxejli ni bidzunä, nabannää́ Dios. ¹⁹ La'tu najntu xho runä xtzuun Jesucrist guixe-guixee, guideb xcälñnadipä. Dina niliä'p ä xpala'nä. Najntu xho ronä che di bejn chalilajz xtidx Jesucrist. Che rlanj rexpejn Israel nugu't narä, gudedä trabajwduxh. ²⁰ La'tu najntu xho baluiä lojtu guiralii rextidx Dios ni najc huen par la'tu. Che nadxagsa'tu baluiä xtidx Dios lojtu, näjza roliz cade tejtü huiluiä xtidx Dios lojtu. ²¹ Basule'ä xtidx Dios lo rexpejn Israel näjza lo rebenzijt ni di gac xpejn Israel. Röpä lojreni nanab gusiechlajzreni, gusa'nreni xtojñreni, nanab chalilajzreni xtidx Jesucrist te gudzucaj Dios xtojñreni. ²² Naj cadedä te laad guejdx xtentu, sia'ä guedx Jerusalén, sa'csi caguxhaḷ Sprit Dxan xten Dios narä cha'ä guedx Jerusalén. Dina ganä xhi sacä ro'c. ²³ Niluxh nanä cade tej reguejdx cadre rdedä rni Sprit Dxan xten Dios loä sidedä trabajwduxh, siäüá neñ latzguiib guedx Jerusalén. ²⁴ Niluxh dina guidxebä, dizana chanälazduxhä xcälñnabanätis, te guluxä dzuun nani baniidx Jesucrist gunä. Lo dzuun ni baniidx Jesucrist nanab chaye'tzä lo guiraa rebejn sibicaj xtojñreni palga chalilajzreni xtidx Dios xcuent Jesucrist —räjp Pabl.

²⁵ Räjpzani:

—Naj agucebä dirutu fisac loä, la'tu nani basule'ä xcälñnibee Dios lojtu. ²⁶ Rniliäpac lojtu, xhet dojñdi rapä palga yu' te bejn ni di chalilajz xtidx Dios, ni di Dios gudzucaj xtojñni. ²⁷ Xhetliidi biäädxdidi loj rextidx Dios ni basule'ä lojtu. Dina nucua'tzä nicla tej xtiidxni xcuent xho rlanj Dios guibanu. ²⁸ Colga'p lagajc la'tu si'c ra'p baxhtoor xiil, si'c colga'p guiraa rebejn nani rililajz xtidx

Dios sa'csi Sprit Dxan xten Dios abaniidx dzuunga guntu, ni'cni abixe' xtiejn Jesucrist lo cruz te gac gudzucaj Dios xtojlrēni. ²⁹ Anancheä che rutdiru narä, siääd bejn nani rlanj chalilajztu ste'ca diidx, na'c chalilajztu niclaza jiuu rebejnnga. Rusgueetisreni la'tu. Sutie'chreni la'tu lo sa'tu si'c rutie'ch cuyo't rexiil. ³⁰ Su'za lagajc sa'tu ni guinii didx-xhii lojtu te gunreni gusaan rexpejn Jesucrist xtidx Dios, te chanajlrēni redee ni rusguee. ³¹ Colhūi te di gusgueereni la'tu. Di jiäl-lajztu choñ ijz, dxej yääl basule'ä xtidx Dios, ronäli balidxätu, sa'csi sanälazätu.

³² Räjpa Pabl:

—Asia'are, rusa'nätu ladzṇaa Dios, gacnäj Dios la'tu. Sutijp xtidx Dios lastootu, te xca'tu guiraa ni bia'n diidx guniidx Dios lojtu, näjza loj guiraa ni abejn Dios beṇsa'c, nani najc xpejn̄ni. ³³ Dina niniabä meel, niclaza xhabä che baluiä xtidx Jesucrist lojtu. ³⁴ Anajntu lagajc narä benä dzuun con ṇää te bio' xhi gudaunää reexamigwä. ³⁵ Si'c benä te filojtu xho guntu dzuun te gacnäjtu sa'tu ni xhet rajpdi, te guinaj lajztu xtidx Jesucrist che najni: “Huenru guideednu lo bejn̄ quela xcaxlia'nu xhi cos” —räjpni.

³⁶ Che gulujx gunii Pabl rediidxga, bazuxhibnäjni rebejnnga, guredx-gunabni lo Dios. ³⁷ Dxejcti ron-duxh guiraareni gudääzreni guejn Pabl, bachagro'renini. ³⁸ Guc-huinuxh lajzreni dxejc sa'csi räjp Pabl dirureni fisac lojni. Dxejcti huisa'nrenini lo barcw.

21

Huij Pabl guedx Jerusalén

¹ Che basa'ntinu rexpejn̄ Jesucrist ro'c, biu'nu neñ barcw, sionnu te lii nejz lo yuj ni laa Cos, ni tre' lo nisdoo. Che bara yääl, bidzuñnu lo xyuj Rodas ni tre'za lo nisdoo. Ro'c biriinu sionnu neñ barcw nez guedx Pátara.

² Che bidzuñnu ro' guejdxga, bidxälnu te barcw ni sää nez

reguedx Fenicia. Dxejc biu'nu neṅ barcwga te chonnu ro'c. ³ Bahuiinu lo yuj Chipre ni tre' lo nisdoo, xlad-bäjcwnu tre' yujga, bideednu te laad. Siontinu nez Siria, ro'c bidzunu guedx Tiro cadro gule'creni cargw ni nuu barcwga. ⁴ Ro'c bidxälnu rexpejn Jesucrist. Biannänureni gajdz dxej. Baluii Sprit Dxan xten Diosreni te guniireni lo Pabl, räjpreni:

—Na'c chäälü guedx Jerusalén.

⁵ Che baza' gajdz dxej, biunejznu guejdxga. Dxejc guzaj reniguii, regunaa, näjza rexi'nreni biriinu guejdxga. Ro' nisdoo bazuxhijbnu te guredx-gunabnu lo Dios.

⁶ Che abazadiidxnu sa'nu, nuure biu'nu neṅ barcw, biädla laareni gubisacreni rolijzreni.

⁷ Biriitinu guedx Tiro. Che bidzunu ro' guedx Tole-maida, gulujx xpiajnu biäjtnu neṅ barcw. Dxejc biohuiinu rexpejn Jesucrist ni yu' guejdxga, biannänureni tejtis yääl. ⁸ Che bara yääl, biriinu guejdxga, sonnu guedx Cesarea. Che bidzunu guejdxga, bionnu rolijz Felipe, te dade' ni rusule' xtidx Dios lo bejn. Felipe gujc tej lo gajdz niguii nani gudis xhi gudajw rexpen Jesucrist nani xhet rajpdi guedx Jerusalén. Rolijzni huijia'nnu. ⁹ Yu' tajp xinxapxteb Felipe. Dios badeed diidx guiniireni lo bejn. ¹⁰ Xhidajl dxej guläjznu rolijz Felipe. Laḷ ni dxunnu ro'c, bidzujn te niguii ni laa Agabo, biriini nez Judea. Ruzanij Dios xcäriejn ni te guiniini xtidx Dios.

¹¹ Che bidzujni loonu, cua' Agabo xsindoor Pabl, bali-ibni lagajc reni'ni näjza renaani, najni loonu:

—Anaj Sprit Dxan xten Dios: “Scree suliib rexpejn Israel ni yu' guedx Jerusalén niguii ni najc xtenni sindoorre te gutedrenini ladzṅaa rebenzijt.”

¹² Che biejn diaagnu rediidxga, nuure näjza reben ro'c, gunabduxhnu lo Pabl na'c chääni guedx Jerusalén.

¹³ Dxejc naj Pabl loonu:

—¿Xhicuent roontu? ¿Xhicuent runhuiintu lazä? Xhet najcdi jiäuä nen latzguiib, xhet najcdi palga nungälä guetä guedx Jerusalén xcuent Jesucrist —räjp Pabl.

¹⁴ Che naaddi Pabl gusiechlajzni, xhetru guniidinu lojni. Räjptisnu lojni:

—Sugac nani rlanjtis Dios.

¹⁵ Che gudejd redxejga, bilucheenu rehxixtenu, biriinu guejdxga, sontinu guedx Jerusalén. ¹⁶ Gaii rexpejn Jesucrist ni najc beñ Cesarea huisa'n nuure guedx Jerusalén. Ro'c huinäreni nuure rolizj te dade' ni laa Mnasón, beñ Chipre, yuj ni tre' lo nisdoo. Laani galooli huililajzni xtidx Dios. Huijia'nnu rolizjni, ro'c gulääznu.

Huihuii Pabl Jacobo

¹⁷ Che bidzunnu guedx Jerusalén, bibalazduxh rexpejn Jesucrist sa'csi siopnu ro'c. ¹⁸ Che bara yääl huinänu Pabl lo Jacobo näjza lo renani rnibee guidoo xten rexpejn Jesucrist. ¹⁹ Dxejc gudääz Pablreni, bijni diidx xcuent tebgaj redzuun nani badeed Dios bejni che guyunäjni rebenzajt nani di gac xpejn Israel, te biejn diajgreni xtidx Dios. ²⁰ Che biejn diajgreni xtidx Pabl, gulä'preni xpala'n Dios, räjpzarenı lo Pabl:

—Guejblu, sa'nu, anajnlu lacti xhidalduxh xpejn Israel yu' nani rililajz xtidx Jesucrist luxh rapdaduxhreni leii xten toMoisés. ²¹ Abiejn diajg rebejnre xcuentlu. Abiejn diajgreni garenca ruluiilu guiraa rexpejn Israel nani rbäjz nen reguejdx xten rebenzajt, rulijdxlureni na'c gusalreni bee rexi'nreni, na'cza chazanäjrrureni rexcostumbrnu. ²² ¿Xhini'c jiennu? Siejn diajgreni abidzujnlu ree, dxejc suchagsa'reni te jäädreni lojlu. ²³ Naj gunlu nani guiniinu lojlu. Yu' tajp resa'nu ree nani basa'nreni diidx lo Dios. ²⁴ Huinäreni, näjza luj bejn si'ctis gunreni si'c ni caj lo leii xten toMoisés, te gaclu naya nez lo Dios. Luj quiixlu

guiraa ni banijtreni, te che abasa'tu guiraa ni nanab gac sajc guigaj yejctu si'c te seen te gacbee guiraa rebejn abasoobtu leii. Dxejcti gan guiraa rebejn didx-xhii najc rediidx ni biejn diajgreni xcuentlu. Te gacbeereni laaca rusooblu xleii toMoisés. ²⁵ Biädla rebenzijt nani huililajz xtidx Jesucrist, xhet najc di, sa'csi abacuaanu lojreni, rie'tznu lojreni: na'c gautu recos nani gule'c bejn si'c gojn loj banäjb, na'c gautu rejn, niclaza bääl nani gurerejn, na'c guesnäjtu nani di gac cháältu.

Gunaaz rexpejn Israel Pabl

²⁶ Che bara yääl, huinä Pabl guidap niguiiga, bejnreni si'c caj lo xleii toMoisés, biu'reni nen xquidoo rexpejn Israel te huiye'tzreni lo bixhojz nen guidoo xhi dxej jiädnä tejgareni te man te ju't rebixhojz remanga lo Dios.

²⁷ Si'c nanab gunreni gajdz dxej. Che ameer guiza' redxejga, bahuii rexpejn Israel ni siädä Asia lo Pabl nen guidoroga. Gunaazreni Pabl, dxejcti gusloj cayujnreni biey, ²⁸ guredxa'reni räjpreni:

—¡Coltaa xpejn Israel! ¡Coltaa te gacnäjtu nuure!
¡Bahuilaa! Niguiire najc nani rniyaj rexpejn Israel cadrotis rijni. Rulijdxni bejn te di chazanäjrureni xleii toMoisés, riye'tzni lo bejn xhet sajc di xquidoronure. Colhuilaa xho siädnäni ree bejn griegw, benzijt ni di gac xpejn Israel, te gundxuudxni xquidoronu —räjpreni.

²⁹ Si'c caniireni sa'csi te huält bahuiireni sanä Pabl Trótimos lo nezyuj. Trótimos najc te benzijt ni siädä guedx Éfeso. Naj cayujnreni xhigab laa niguiiga ni siädnä Pabl nen xquidoro rexpejn Israel.

³⁰ Guideb guejdxga guyu' yärsia', bire' benguixhuj, bixa'treni yejc Pabl, gunaazrenini, gudobxhajxhreni Pabl, gulägajcnenini nen guidoroga. Biägajc repuertro xten guidoro. ³¹ La! ni cayujnreni xhigab ju'trenini, yu' chu

Hechos 21:32 76 Hechos 21:40

huiye'tz lo nani rnibee resoldaad ni caya'p guejdxga, räjpreni:

—Cayajc te bieiduxh neñ guejdxre.

³² Guredxgajc comandant resoldaad näjza gaii capitán, ruxunreni bidzujñreni cadre tre' rebejñ. Che bahuii rebejñ lo comandant näjza resoldaad, guläjz caguijñreni Pabl. ³³ Dxejcti gubig comandant lo Pabl, gunibeeni baliib resoldaad ñaa Pabl con tiop cadenguiib. Dxejcti gunabdiidxni lo Pabl, räjpni:

—¿Chu luj? ¿Xhini'c bejñlu?

³⁴ Lo rebeñ xhidaalga yu' rexpejñ Israel ni guredxa' tej diidx, yu'za reni guredxa' ste'ca diidx. Di comandant niujn gan niacbeeni xhicuent cayajc biey sa'csi cabedxa' guiraa rebejñ. Dxejc gunibeeni chanä resoldaad Pabl cadre rbäjzreni. ³⁵ Che bidzunnäj resoldaad Pabl ro' scaleer ni caj ro'c, biireni Pabl te bejñreni gan biunäjreni Pabl, sa'csi nialazduxh rebejñ rlanjreni nugu'treni Pabl.

³⁶ Siädñajl guiraa rebejñ Pabl, rbedxa'reni:

—Colgugu'tni.

³⁷ Che agojl jiu' Pabl neñ yuro xten resoldaad, räjpni lo comandant con diidx griegw:

—Rlazä guiniä tiop diidx lo guejblu.

Räjp comandant lo Pabl:

—¡An rniilu xtidsaä! ³⁸ An dilu gac niguii ni siäd nación Egipto, nani gudilñäj gubier, nani huinä lo reyubjdz tajp mil niguii nani rugu't bejñ.

³⁹ Dxejc räjp Pabl lojni:

—Narä nacä te beñ Israel, te beñ Tarso xten Cilicia. Sacduxh guejdxga lo reguedx Cilicia. Canabä gun guejblu te hueen, gusaan guejblu guiniä lo rebejñre.

⁴⁰ Dxejc cuäjñ comandant guinii Pabl lo rebejñ. Lal ni suga'ni lo scaleer basäab Pabl ñaani lo rebejñ te

gucdxireni. Che aguredxi rebejn, gusloj Pabl canii lojreni didxsaj hebreo, räjpni:

22

¹ —Guejbtu bengool, guejbtu resa'ä, näjza la'tu dade'. Gucudiajgtu rextidxä —räjpni.

² Che biejn diajgreni caniini didx hebreo, dxidujru guzuj rebejn. Räjp Pabl lojreni:

³ —Narä nacä te xpejn Israel. Guedx Tarso xten Cilicia golä. Reepac gulaä. Lo Gamaliel bisiedä guijt. Baluisa'cni narä guiragajc relei xten retoxtadgoldoonu. Guideb xtipä basobä ni gunibee Dios. Gucä si'cpac ni najctu naj.

⁴ Dxejcti bidxecheduxhä loj renani huililajz xtidx Jesucrist, bagu'tazareni. Balibä xhidajl bejn, niguii näjza gunaa, con cadenguuib. Basäuäreni nen latzguuib. ⁵ Bixhojz ni sajcrü näjza guiraa rebengool ni sajcrü nen xquidootu, sajc guinii xhini'c benä. Laareni baniidxreni guijt loä. Ni'c huinää lo rexpejn Israel ni yu' guedx Damasco, cadro hua'a te niniazä rebejn nani huililajz xtidx Jesucrist. Benä xhigab jädnääreni guedx Jerusalén te jäüreni nen latzguuib, te gusacsíreni rebejnğa.

Gunii Pabl xho huililajzni xtidx Jesucrist

(Hch. 9:1-19; 26:12-18)

⁶ Räjzpni:

—Dxejc hua'a guedx Damasco. Läidxejti ameer guidzunä guejdxga, chela bazanij te balro guideb gabi narä. Xhaguibaali siääd bajlga. ⁷ Biabrloä lo yuj, dxejc biejn diagä te se' ni canii loä, najni: “Saulo, Saulo, ¿xhicuent rusacsílu narä näjza rexpenä?” najni. ⁸ Dxejcti räpä lojni: “¿Chuluj, Dad?” Najni loä: “Narä nacä Jesucrist ni siääd Nasare't, nani cagusacsíduxhlu.” ⁹ Rebejn ni sanää bahuiloj bajlga, bidxejbreni, niluxh di diajgreni niejn xse' nani gunii loä. ¹⁰ Räpä lojni: “Dad, ¿xhini'c

gunä?” Dxejcti najni loä: “Huistie, huij guedx Damasco. Ro'c sinii te dade' lojlu guiraa ni guinibeä gunlu.”
 11 Bastujxh bajlga loä, diru loä nien, ni'cni gunaaz resa'ä ñää, sontinu guedx Damasco.

12 Räjþ Pabl:

—Guejdxga guläjz te niguii ni laa Ananías. Rusoobni guiraa releii xten toMoisés. Guiraa rexpeljñ Israel rnii nadalajz lo dade'ga. Biääd Ananías loä. 13 Cuä'a guzujni najni loä: “¡Saulo, betzä, bahuisac!” Lagajc dxejc bjaic loä, bahuiä lojni. 14 Naj Ananías loä: “Xtios retoxtadgoldoonu agulelu. Gule Dios luj te jiejn diajglu rediidx ni rlanjni gunlu, te filojlu Jesucrist, Xindxan Dios, te jiejnza diajglu rextiidxpac Jesucrist. 15 Loj guiraa bejn susule'lu guiraa ni bahuiilu näjza nani bejn diajglu. 16 ¿Xhicuent sojbtislu ro'c? Basquejn, huistie te tiobnislu. Huililajz xtidx Jesucrist, gurejdx lo Dios te gudzucajni rextojllu.”

Gunii Pabl xhicuent baluini xtidx Dios lo rebenzijt

17 'Che gubi'ä guedx Jerusalén, biu'ä nen guidoro xten rexpeljñ Israel te guredx-gunabä lo Dios. Laļ ni cabedxcanabä lo Dios, astoo gunixcaļä, 18 dxejc bahuiä lo Jesucrist. Najni loä: “Basquejn, birii guedx Jerusalén sa'csi di rebejn chalilajz xtidxä ni gusule'lu lojreni.” 19 Narä räpäza lojni: “Dad, anajnreni xho biu'ä guiraa reguidoo, gunazä guiraa rebejn nani huililajz xtiidxlu, gudinduxhäreni, basäuäreni nen latzguiib. 20 Che bacuaareni guij yejc Esteban nani gunii xtiidxlu, ro'c guzuä, cuäbä bejnreni si'c. Go'pä xhajb xten renani bagu't Esteban laļ ni bacuaareni guij.” 21 Dxejcti naj Jesucrist loä: “Huij. Suxhalä luj zitduxh. Chäälü lo guiraa rebenzijt ni di gac xpejn Israel.”

Bia'n Pabl nen rolizro xten resoldaad

22 Bacuadiajg guiraa rebejn laļ ni gunii Pabl rediidxga, dxejcti guredxa'reni, räjpreni:

Hechos 22:23 79 Hechos 22:29

—Colgu't niguuiga. Di nunyäjł guibajnruni.

²³ Sanuutis cabedxa'reni. Gulääreni xcamangwreni, cacuaazareni yuyol jiaa. ²⁴ Dxejcti gunibee comandant lo resoldaad, räjpni:

—Colchanä Pabl neñ yuro xtenu. Ro'c colquiiin Pabl te guiniini didxgului, te gacbeenu xhicient rbedxaduxh rebejn lojni.

²⁵ Sanätireni Pabl. Entis baliibreni ni', naa Pabl con duguijd te niguijnrenini che gunabdiidx Pabl lo capitán, räjpni:

—¿La rajc rguijntu te beñ roman che gajdtu gacbee xhi dojl bejnni, ä? Et si'cti caj lo xleiilu.

²⁶ Che biejn diajg capitán xtiidxni, bidxejbni, huijni lo comandant, räjpni lojni:

—Colnati xhi gunäjlu dade're, sa'csi najcni beñ roman.

²⁷ Biädguxuñ comandant lo Pabl, räjpni:

—¿La gulii najclu beñ roman, ä?

Räjp Pabl lojni:

—Guliini.

²⁸ Dxejcti räjp comandant:

—Narä badedä xhiroob meel te nacä beñ roman.

Dxejcti räjp Pabl lojni:

—Narä che gołali nacä beñ roman.

²⁹ Che biejn diajg resoldaad nani niguijn Pabl si'c, baslagajcreni reduguijd ni naliib ni', naani. Che biejnza diajg comandant najc Pabl beñ roman, bidxejbni sa'csi gunibeeni biliib Pabl.

*Basule' Pabl diidx xcuentni lo rebixhojz nani rnibee rexpejn
Israel*

³⁰ Che bara yääl, rlaĵ comandant gacbeeni xhicuent rlaĵ rexpeĵn Israel ju't Pabl. Ni'c gunibeeni ĵiäd re-bixhoĵ ni saĵcru näĵza reguxhtis xten guidoro. Dxeĵcti biädnäni Pabl, bazujnini nez loĵ guiraa rebeĵn ni bire' ro'c.

23

¹ Rdxelodzu'tz Pabl lo rebeĵn ni tre' ro'c laĵ ni räĵpni loĵreni:

—Narä gusule'ä tiop diidx lo guejbtu, beĵ Israel, sa'ä. Guideb ni nabaĵä ruzobä xtidx Dios. Di lastoä guidxeĵb nez lo Dios —räĵp Pabl.

² Che bieĵn diaĵg Ananías, bixhoĵz ni saĵcru, xtidx Pabl, bidxechduxhni, gunibeeni lo renani suga' gajxh lo Pabl ca'preni ro' Pabl.

³ Räĵp Pabl lo Ananías:

—Sigajcza ca'p Dios ro'lu, benguijdx. Ro'c sobga'lu te gunlu yälguxhtis si'cni caj lo leii. ĴXhicuent rujnlu nani rni leiga di nungäĵl gun beĵn? ĴXhicuent gunibeelu guda'preni ro'ä? —räĵp Pabl.

⁴ Reni suga' cuä' Pabl räĵp lo Pabl:

—ĴLa dilu gacbee laa bixhoĵz ni saĵcru xten Dios? Na'c guiniyajluni.

⁵ Dxeĵcti räĵp Pabl loĵreni:

—Rexamigwä, dina niacbeä caniä lo bixhoĵz ni saĵcru, sa'csi nanä agunii Dios: “Na'c guiniyajlu reni rnibee xpeĵnlu.” Si'c caj lo guijtzt ni bacuaa reni gunii xtidx Dios.

⁶ Gucbee Pabl tiop cuaa najc reni tre' ro'c. Yu' reni najc beĵ saducee, yu'za reni najc beĵ farisee. Dxeĵc guredxa' Pabl räĵpni loĵreni:

—Sa'ä, narä nacä te beĵ farisee, xi'nza te beĵ farisee narä. Rililazä sibansac beĵn lo rebengut, ni'c cabe'creni xqueĵä ree.

⁷ Entis guniini si'c lojreni, chela gusloj caniireni lo sa'reni. Tiop cuaa gujcreni, gala' refarisee, sgala' resaducee. ⁸ Di lajz resaducee chalii sibansac rebengut, dizareni chalilajz yu' rexangl Dios, dizareni chalilajz yu' aim xten bejn. Niluxh refarisee rililajz guiraa rediidxga. ⁹ Guyu' te bieiro. Dxejcti huisulii gaii farisee nani najn leii, gusloj caniduxhrenei, räjpreni:

—Di niguiire gac benguijdx. Palga gunii te angl xten Dios o te togool lojni, alga Dios tilnäjnu, dxejc sidxechnäj Diosnu.

¹⁰ Che gusloj cabedxaduxhrenei lo sa'reni, bidxejb comandant, andi ju'treni Pabl, caxha'treni yejcni. Dxejcti gunibeeni biäjt resoldaad cadre suga' Pabl. Guideb xti-jpreni guläärenei Pabl galäii rebejnğa huinäsaerenini nen yuro xtenrenei.

¹¹ Che biu' guxhijn, baluiloj Jesucrist lo Pabl, guzujni cuä'ni, räjpni lojni:

—Batijp lajzlu, na'c guidxejblu, Pabl. Si'cni basule'lu xtidxä guedx Jerusalén, sigajcza nanab gusule'lu xtidxä guedx Roma.

Rexpejn Israel bejn xhigab nugu'treni Pabl

¹² Che bara yääl, bachagsa' gaii xpejn Israel, bejnrenei xhigab nugu'treni Pabl. Räjpreni lo sa'reni:

—Na'c guidaunu, na'cza guidunnu nis che guigu'tlinu Pabl —räjpreni.

¹³ Si'cti tiuu niguii bia'n diidxga. ¹⁴ Bidzujnrenei lo rebixhojz näjza rebengool, räjpreni lojreni:

—Abia'nnu diidx, xhet guidaudinu, xhetza guidundinu palga dinu guigutxgaa Pabl —räjpreni—. ¹⁵ Naj la'tu näjza guiraa rebengool ni rnibee rexpejn Israel, colguxhaļ diidx lo comandant te guixee jäädnäni Pabl lojtu. Colyejn si'c ni rlanjtu jiejnru diajgtu diidx xcuent Pabl. Che

jiädnä comandant Pabl ree, nuure sugu'tnuni lo nezyuj che gajdni guidzujñ ree —räjp reniguiiga.

¹⁶ Niluxh biejn diajg xi'n bisiajn Pabl cabäzkhiga'tz reniguiiga te ju'treni Pabl, huijni royuro xten resoldaad. Che bidzujñni, biu'ni räjpni lo Pabl rediidx ni biejn diajgni.

¹⁷ Dxejcti gurejdx Pabl te capitán, räjpni lojni:

—Huinálaa bi'nre lo comandant te gäbni te diidx lojni.

¹⁸ Huinäti capitán bi'nga lo comandant, räjpni lo comandant:

—Pabl, nani niäu nen yuro xten resoldaad, gunab loä jiädnälää bi'nre lo guejblu te guiniini te diidx lo guejblu —räjpni.

¹⁹ Dxejc gunaaz comandant ñaa bi'nre, huinänini te laad cadre rut jiejni diajgni xtiidxreni, dxejc räjpni lojni:

—¿Xhini'c rlanjlu guiniilu loä?

²⁰ Dxejc bazejcn diidx, räjpni loj comandant:

—Abia'n te cuaa xpejn Israel diidx siniabreni lo guejblu jiädnä guejblu Pabl ro jusgaad guixee. Sujnsireni si'c ni rlanj jiejnru diajgteni diidx xcuent Pabl. ²¹ Na'c chalilajz guejblu xtiidxreni. Tiu niguii sibäzkhiga'tz cuä' nezyuj te ju'treni Pabl. Abia'nreni diidx direni gau, dizareni yä palga direni jutxgaa Pabl. Naj cabäjztisreni guxhal guejblu diidx sinä guejblu Pabl ro jusgaad.

²² Che biejn diajg comandant diidxga, basaanni sii bi'nga rolizni, räpxgaani lojni:

—Rut lojdipac gäblu guniilu diidxre loä.

Huij Pabl lo Pels ni najc gubernadoor

²³ Dxejcti gurejdx comandant tiop capitán, räjpni lojreni:

—Colgutojp tiop gayuu soldaad, chää guedx Cesarea näjza gayonbitzuu soldaad ni bijb cabaii, näjza tiop gayuu soldaad ni ca' spaad. Rcagaa guxhijñ guiriireni ree.

²⁴ Colquuil tiop cabaii cuib Pabl te xhet gacdi Pabl cheni chanätuni lo gubernador Pels —räjpni.

²⁵ Dxejcti bejn comandant te guijtз chanäreni lo gubernador.

²⁶ Loj guijtзga rnii scree: “Gubernador Pels, nani sacduxh. Narä, Claudio Lisias, ruxhalä xtixtios lo guejblu. ²⁷ Rediidxre rucuaá lo guejblu. Gunaaz rexpejn Israel niguiire, luxh paru dina nidzunga'cä con resoldaad, nugu'trenini. Che gucbeä najcni bejn roman, guläänuni ro'c. ²⁸ Rlazä niacbeä xhi quej rbe'creni, ni'c huanääni lo junt xten rexpejn Israel ni rnibee guidoro. ²⁹ Dxejc gucbeä requej ni rbe'creni najc ganax xcuent leii xtenreni, niluxh xhet bejndini te nungäjl guetni, niclazä nanab jääuni nejn latzguiib. ³⁰ Che baxhalreni diidx loä cabäzxhiga'tz rexpejn Israelni te ju'treni dade're, baxhalga'cäni lo guejblu. Agunibeäza jäädle'c rexpejn Israelre xquejreni lo guejblu. Ni'ctis rniä lo guejblu”, si'c caj lo guijtз ni bejn comandant.

³¹ Che biu' guxhijn, huixii resoldaad Pabl sanärenini guedx Antípatris si'cni gunibee comandant gunreni.

³² Che bara yääl, gubi' resoldaad nani guzaj ni'reni. Resoldaad ni bijb cabaii guzanäj Pabl guedx Cesarea. ³³ Che bidzujn redee Cesarea, badeedreni xquijtз comandant lo gubernador, huinäzarenini Pabl lojni te biembeenini.

³⁴ Che gulujx bilni guijtзga, gunabdiidxni lo Pabl:

—¿Caro siäädlu?

Che gucbeeni siääd Pabl Cilicia, ³⁵ räjpni lo Pabl:

—Guidzujnsi rexpejn Israel ni cadxehnäj luj, sucuadiaggacä xtiidxlu —räjp gubernador.

Gunibeeni ga'p resoldaadni nejn yuro xten Herodes.

24

Gunii Pabl xtiidxni lo Pels

¹ Gudejdti gatii dxej, dxejc bidzujñ Ananías, bixhojz ni sajcru, nájza gatii rebenḡool xten guidoro, nájza te dade' ni laa Tértulo ni gunii xcuentreni. Gusloj cabe'cni xquej Pabl lo gubernadoor. ² Che biädnäreni Pabl, gusloj Tértulo cabe'c xquej Pabl lo gubernadoor. Räjpn̄i lo gubernadoor:

—Xquixtioste guejblu dxiduxh nabannu. Cayacnäduhx guejblu laadxnu con redzunsacduhx ni cayujñ guejblu. ³ Xquixtiosduhx guejblu, gubernadoor Pels, xcuent guiraa redzunsac'c ni rujñ guejblu guira nejz. ⁴ Luxh na'cru gusieednu guejblu, gucuadiaglaa guejblu tiop didx. ⁵ Agucbeenu xho najc niguiire. Benguidxduhxni. Cadrotis rijni rujñni biey lo rexpejñ Israel. Laani rnibee te cuaa ni laa nasareñ, nalajznu rebejñ nani rililajz xtidx Jesucrist ni biädä guedx Nasare't. ⁶ Rlajzlini nuxhiñni xquidoronu, ni'c gunaaznuni. Niennu te junt te la-gajc nuure niennu yälguxhtisni si'cni caj lo xquijtznu. ⁷ Niluxh bidzujñ comandant Lisias nájza resoldaad. Diptis badzucajreni niguiiga ladzñaanu. ⁸ Laani gunibeeni lo guejblu jiädä reni rbe'c xquejni. Naj lagajc guejblu sajc guiniabdiidx lojni te gacbee guejblu guli guiraa requej nani rbe'cnu xcuentni —räjñ Tértulo.

⁹ Dxejcti guiraa rexpejñ Israel ni suga' ro'c räjñ guliica xtidx Tértulo. ¹⁰ Dxejcti bejn gubernadoor seen lo Pabl te guiniini. Baze'c Pabl diidx, räjpn̄i lojni:

—Rbaaliza lazä guze'cä diidx lo guejblu, sa'csi anana agujc xchero lacti huen rujñ guejblu yälguxhtis naciön Israelre —räjñ Pabl—. ¹¹ Gutzbitio'p dxejtis bidzunä guedx Jerusalén te saganä Dios. Najñ rebejñ xhi dxej biu'ä Jerusalén, guyasi guniidxreni diidx. ¹² Nicla tej dina nichagdiä bejñ neñ guidoro. Nicla tej dina niunä biey neñ reguidobäz, nicla ro nezyuj. ¹³ Agule'creni quej xtenä lo guejblu, niluxh nicla tej redzuunga dina niunä. Di gacdi guluipacreni lo guejblu guli najc xtiidxreni.

¹⁴ Rniliäpac lo guejblu: Raṅä Xtios retoxtadgoldoonu. Jesucrist baluui xho gaṅsa'cnu Dios. Rililazä rextiidxni. Xhidalduxh rexpejṅ Israel rniyaj xho basule' Jesucrist gaṅ bejṅ Dios. Ruzobä guiraali releii xten toMoisés. Rililazä guiraa rextidx Dios ni bacuaa reni gunii xtidx Dios. ¹⁵ Rililazä xtidx Dios si'c rililajzza rebejṅre xtidx Dios. Si'c ni najnreni, si'cza nanä sidzujṅ te dxej che guibaṅsac rebengut, rebenguijdx sigajc rebensa'c. ¹⁶ Ni'cni racbeä laaca nabaṅä guiraa dxej, di lastoä guidxejb, nicla nez loj bejṅ niclaza nez loj Dios, sa'csi rut rajcdi guiliäs dixhii xcuentä.

¹⁷ Räjṅ Pabl:

—Agujc xchej yu'ä zijt, lajdx garenca bejṅ, ṅaj gubinää meel ni baxhaṅ reben nejzga te gudedäni lo rebejṅ ni xhet rajpdi. Biädnääza gojn xtenä gudedäni lo Dios. ¹⁸ Ni'c sanää guidoro. Ro'c bidxäjṅ rexpejṅ Israel ni siädä Asia narä. Agucnayaä si'c ni rnibee xleiinu. Xhet benxhidajldi suganää, xhetza bieyjdi cayunä. ¹⁹ ¿Con rebejṅga ṅaj? Te cue'creni quej lo guejblu palga yu' xhini'c rdxechnäjreni narä. ²⁰ O guiniiza redee palga yu' xhini'c et laadi benä che suga'ä nez loj junt xten guiraa rebixhojz ni rnibee näjza rebengool lo guedx Jerusalén —rājṅ Pabl—. ²¹ Tejtis diidx guniä che suga'ä galäiireni, guredxa'a räpä lojreni: sa'csi rililazä sibansac guiraa rebejṅ lo rebengut, ni'c biädnätu narä lo rebejṅre —si'c guniä lojreni.

²² Che biejn diajṅ Pels xtidx Pabl näjza sa'csi najne'ni xcuent diidx nani baluui Jesucrist, basoobni stee dxej guidxagsac sa'reni rājṅni lojreni:

—Che jiiädli comandant Lisias dxejc gunä yälṅuxhtis —rājṅ Pels.

²³ Dxejcti gule Pels te capitán ni rnibee te gayuu resol-daad ga'p Pabl. Niluxh rājṅni lojni gusaanni gun Pabl nani

rlajztisni gunni. Na'cza gudxojnni jiaäd reexamigwni te fiireni lojni.

²⁴ Che gudejd balti dxej, gubi' Pels, biädnäni chäälni Drusila. Drusila najc beṅ Israel. Dxejc gurejdx Pels Pabl te gusule'ru Pabl xtidx Jesucrist. ²⁵ Gunii Pabl xho nanab guibaṅsa'c bejṅ nez loj Dios si'c ni gunibee Dios guibajṅ bejṅ. Nanabza gacbee bejṅ na'c gun bejṅ cos guijdx, sa'csi sidzujṅ dxej gac Dios juejz loj guiraa rebejṅ te fiini xhi bejnreni. Racslesli Pels tant bidxejbni biejn diajgni diidxga. Räjpni lo Pabl:

—Huij naj. Sibedxsacälu che latä stee —räjp Pels.

²⁶ Naa Pels sudeed Pabl meel lojni te guslaanini, ni'c masru guet-guejt gurejdxnini te guninäjnini. ²⁷ Si'c gudejd tiop ijz. Dxejc birii Pels gubernadoor. Dxejcti biu' Porcio Festo, gujcnj gubernadorcoob. Niluxh Pels rlajz chanälajz rexpejṅ Israelni, ni'c basa'nni niäusijc Pabl.

25

Gunii Pabl xtiidxni lo Festo

¹ Che biu' Festo gujcnj gubernadorcoob xten reguejdxga, bia'nni guedx Cesarea choṅ dxej. Dxejc biriini ro'c sääni guedx Jerusalén. ² Che bidzujṅni guejdxga, rebixhojz nani rnibee näjza reniguii ni sajcro lo rexpejṅ Israel biääd lo Festo. Gusloj cabe'creni xquej Pabl lojni. Gunabduxhrene lo Festo ³ sa'csi rlajzrene gunni te huen laareni, guinibeeni jiaädnäreni Pabl guedx Jerusalén. Si'c gunabreni, sa'csi abenxgaareni xhigab cuäzxhiga'tzrene te ju'treni Pabl lo nezyuj.

⁴ Dxejcti räjp Festo lojrene:

—Suniaü Pabl guedx Cesarea. Di gaclaa guibi'ä guedx Cesarea. ⁵ Suchää reniguii ni sajcro lo sa'tu guedx Cesarea, te ro'c cue'creni xquej Pabl loä, don la yu' xhi dzunguijdx bejnne —räjpni.

⁶ Che gudejd si'cti tzuu dxej, gubi' Festo guedx Cesarea. Che bara yääl, gurejni lo yagxhil xten gubernadoor, gubibeeni biääd Pabl lojni. ⁷ Che bidzujñ Pabl lojni, biääd rexpejn Israel nani biääd guedx Jerusalén ro'c. Guzujreni guideb gabi Pabl. Gule'creni xhidalduxh xquej Pabl, luxh di niajcdi nuluiireni guliipac xtiidxreni.

⁸ Dxejcti räjp Pabl lojreni:

—Nicla tej latsiaj dina niunä, dina niunä latsiaj loj leii xtennu, dizana niunä latsiaj lo guidoro ni sojb guedx Jerusalén, dizana niunä latsiaj loj xgubier César.

⁹ Dxejcti Festo, sa'csi rlajzni guiliäsni xpala'nni loj rexpejn Israel, räjpni lo Pabl:

—¿La sisiajlu guedx Jerusalén te cue'c rexpejn Israel xquejlu ro'c nezloä, ä?

¹⁰ Dxejcti räjp Pabl lojni:

—Naj suga'a loj guejblu, ni gule reii César. Guejblu rnibee guiraa reguejdxre. Ree nungäjñ cue'creni xquejä lo guejblu, xhet guedx Jerusaléñdi. Ananchee guejblu xhet latsiajdi benä lo rexpejn Israel. ¹¹ Palga nacä te benguijdx, o palga yu' xhi latsiaj benä te nungäjñ guetä, xho dina xcäbä guetä. Palga xhet latsiajdi benä nani canii rexpejn Israel benä, dxejc rutliidi sajc guteed narä ladznaarení. Suchale'creni xquejä lo César nani najc reii xten reben roman —räjp Pabl.

¹² Che guninäj Festo reguxhtis xten xquidoro rexpejn Israel, räjpni lo Pabl:

—Luj gunablu chäálu loj reii César. Mbaj. Sijlu lo reii César —räjp Festo.

Huixiireni Pabl huinärenini lo reii Agripa

¹³ Che gudejd balti dxej, bidzujn̄ reii Agripa nājza chāalni Berenice guedx Cesarea. Biādhuireni gubernadoor Festo. ¹⁴ Che guyu'reni ro'c xchej, bij Festo diidx lo Agripa xcuent Pabl. Rāj̄p Festo lojni:

—Ree niāusijc te niguii ni laa Pabl ni basa'n Pels. ¹⁵ Che guyu'ä guedx Jerusalén, rebixhojz ni rnibee nājza rebengool xten rexpejn̄ Israel gule'c xquejni loä. Rlajzreni guinibeä guetni. ¹⁶ Rāpā lojreni: “Di leii xten nación̄ roman gusaan guet te bejn̄ palga di bejn̄ jiādxgaa te guiniireni nez lojpacni xhi bejn̄ niguiiga, te guzejcza niguiiga diidx xcuent requej, te guiniini la guliireni.” ¹⁷ Ni'cni che biāäd rexpejn̄ Israelga lo guejdxre, che bara yāäl guregacā lo yagxhil xten gubernadoor. Dxejc gunibeä huixiireni Pabl guzuj nez loä. ¹⁸ Benä xhigab pet yu' xhi cosro bejn̄ni. Luxh che gusloj cabe'creni xquejni, gucbegacā xhet latsiarodi bejn̄ Pabl. ¹⁹ Alga cadiñājrenini xcuent xleiiireni, xcostumbrreni. Guniizareni xcuent te niguii ni laa Jesucrist. Agujtni, niluxh canii Pabl gubansacni lo rebengut. ²⁰ Guxii nanä xcuent sa' diidxre, ni'cni gunabdidxä lo Pabl top sicāj̄bni chanāáni guedx Jerusalén te ro'c cue'c rexpejn̄ Israel xquejni. ²¹ Dxejc che gunii Pabl lojpac̄ reii César chale'c rexpejn̄ Israel xquejni, ni'c gunibeä jiāusijcni laḷ ni gac guxhalāni lo César —rāj̄p Festo.

²² Dxejcti rāj̄p Agripa lo Festo:

—Narä rlazāza jiejn̄ diagä xtidx niguiiga —rāj̄p Agripa. Dxejcti rāj̄p Festo lojni:

—Guixee gucuardiajglu xtiidxni —rāj̄pni.

²³ Che bara yāäl, biāäd Agripa nājza Berenice, luxh sucheduxhreni. Nājza recapitán ni sajcro nājza rebejn̄ ni sajcro lo guejdxga biu'reni nen̄ yuro xten Festo. Dxejc gunibee Festo biāäd Pabl. ²⁴ Dxejcti rāj̄p Festo lo guiraa reni re' nen̄ yuro:

—Reii Agripa näjza guiraa rebejn ni tre' ree, colcua-diajg. Colhuii lo niguiire. Reni rnibee xpejn Israel guedx Jerusalén näjza guejdxre agule'c xquejni loä, can-abduxhrene guetni. ²⁵ Niluxh narä rchaloä xhet bejndini te nungäjł guinibeä guetni. Luxh lagajc laani gunabni chääni te gac César juejz lojni, ni'c runä xhigab guxhaläni lojni. ²⁶ Naj dina ganä xhini'c gucuaä lo guijtz te guxhaläni lo César ni rnibee narä. Ni'c biädnää niguiire nez lo guiraatu, ganid nez loj guejblu, reii Agripa, filaa guejblu te gaxäjsi che aguiniini xtiidxni lo guiraanu, sidxälä xhi diidx gucuaä lo guijtz ni chää lo César. ²⁷ Narä runä xhigab di nungäjł guxhalä niguiire ni niäu latzguiib lo César palga di gacdi gusule'ä xhi quej xcuentni cabe'c rexpejn Israel loä.

26

Gunii Pabl rextiidxni lo reii Agripa

¹ Dxejcti räjp Agripa lo Pabl:

—Gunilaa xtiidxlu loonu.

Dxejcti guläs Pabl naani, gusloj cagusule'ni diidx lo-jreni. Räjpn:

² —Reii Agripa, rbalazduxhä sa'csi sajc gusule'ä diidx lo guejblu, sa'csi naj suze'cä diidx xcuent guiraa requej ni gule'c rexpejn Israel. ³ Sa'csi guejblu nanduxh xcuent guiraa releii xten rexpejn Israel. Najza guejblu xhicient rdxagdijł sa'reni. Ni'c rniabduxhä na'c jieed guejblu gucuaadiaglaa guejblu guiraa rextidxä.

⁴ Räjpa Pabl:

—Guiraa rexpejn Israel nanchee xho nacä che gucäli biuux guedx Jerusalén. Galooli najc guedx Jerusalén ladxä. ⁵ Galooliza numbeereni narä, malaii guicäjpreni gucä te farisee nani bazobduxhru xleiniu si'cni rililajznu. ⁶ Naj suga'a ree, rlanjreni jiäuä sa'csi rililazä diidx

nani bia'n Dios con retoxtadgoldoonu. ⁷ Guitzubitiop cuaa rexpejn Israel huililajz siliäs Dios guiraa rebengut te guibañsacreni. Ni'cni bazuxhijbreni lo Dios dxejyää. Naj rniliä lo guejblu rei Agripa, sa'csi rililazä siliäs Dios guiraa rebengut te guibañsacreni, ni'cni rlajzreni gusäuren narä. ⁸ Palga abejn Dios xhigab guiliäsni guiraa rebengut te guibañsacreni, ¿xhicuent di lajztu chalii xtidx Dios?

⁹ Räjpa Pabl:

—Narä benäza xhigab galoo nanabpac guidxe'chä loj rexpejn Jesucrist ni siäd Nazare't, ni'c batedäreni trabajwduxh basäuäreni neñ latzguiib. ¹⁰ Guiraa recosre benäza guedx Jerusalén. Baniidx rebixhojz ni rnibee guijt loä te basäuä rexpejn Jesucrist neñ latzguiib. Che biäuren neñ latzguiib, narä gule'cä xquejreni te gujtreni. ¹¹ Balti huält basacsiduxhäreni lagajc neñ reguidobäz te niniyajreni Jesucrist. Luxh basacsiduxhäreni, hua'a guideb nez reguedxijz te ro'c huisacsíä rexpejn Jesucrist.

(Hch. 9:1-19; 22:6-16)

¹² Räjpa Pabl:

—Ni'c sa'a nez guedx Damasco, ca'a guijt ni baniidx rebixhojz ni rnibee. ¹³ Rniliä lo guejblu, rei, si'cti läidxej, bahuiä te bajl ni siäd xhaguibaali. Rsanijruni loj gubijdx. Basanijni guideb gabi cadre suga'a näjza reni sanää. ¹⁴ Che biabrloonu lo yuj, biejn diagä xse' te ni canii loä con didx hebreo: “Saulo, Saulo, ¿xhicuent rusacsílu narä näjza rexpənä? Che rusacsílu narä, lagajc luj rdejdlu trabajw, si'c te gon ni rucuaní yejc garu'ch.” ¹⁵ Dxejcti räpä lojni: “¿Chu luj Dad?” Dxejc najni loä: “Narä nacä Jesucrist nani cagusacsíduxhlu. ¹⁶ Huistie, gusulii. Narä baluiloä lojlu sa'csi rlazä gaclu te xpenä. Aguleälu te gusule'lu lo rebejn guiraa ni bahuiilu nadxej, näjza guiraa recos

ni churu guluiä lojlu. ¹⁷ Naj suxhaĵälu loj rexpejn Israel näjza lo rebenzijt nani di gac xpejn Israel. Che gusacsi rexpejn Israel näjza rebenzijt luj, sacnäduxhälu, te di ju'treni luj. ¹⁸ Gacnäá lastooreni te che jiejn diajgreni xtidxä, chalilajzrenini, diru xcäriejnreni gac nayääl, sianij xcäriejnreni. Dxejc dirureni gusoob xtidx Beñdxab ni rnibee rebeñdxab, sa'csi susoobreni xtidx Dios. Che chalilajzreni rextidxä, sudzucaj Dios xtojĵreni. Dxejcti suchaag Diosreni loj renani anajc beñnaya sa'csi basoobreni xtidx Dios, huililajzreni xtidxä.”

¹⁹ Räjpa Pabl:

—Ni'cni rniliä lo guejblu, reii Agripa, cayunä si'cni naj Jesucrist loä gunä che baluilojni loä. ²⁰ Gunixgää xtiidxni lo reben Damasco. Röpä lojreni: “Colgusiechĵajz, colgusoob xtidx Dios. Colyujn dzunsa'c te gacbee rebejn abasiechĵajztu, arusoobtu xtidx Dios.” Si'cza guniä lo reben Jerusalén, näjza lo rebejn ni yu' reguedx Judea, näjza lo rebenzijt ni di gac xpejn Israel. ²¹ Sa'csi benä si'c, gunaaz rexpejn Israel narä neñ guidoro, rlajzreni nugu'treni narä. ²² Naj racnäj Dios narä, naj sanuutis cagusule'ä rediidxga lo guiraatis bejn. Loj rebejn ni xhet rajpdi sigajc loj rebejn ni rapduxh. Rusule'ätis nani caj lo guijtz nani bacuaa toMoisés näjza guiraa reniguii nani gunii xtidx Dios. Laareni galooli guniireni xcuent xhini'c gac naj. ²³ Najreni sidejd Crist trabajwduxh, sugu'trenini. Niluxh sa'csi ganiddoo laani guibansacni lo rebengut, ganiddooza laani suluiini loj rexpejn Israel näjza loj guiraa rebenzijt guliipac xtidx Dios, sibansac bejn lo rebengut, si'c ni guniini galooli.

Di Agripa nililajz xtidx Jesucrist

²⁴ Laĵ ni canii Pabl rediidxga lojreni, dip gunii Festo, räjpmi lo Pabl:

—Pabl, yejclu cayajc. Pet sa'csi nanduxhlu guiijt ni'c cayajc yejclu.

²⁵Dxejcti räjp Pabl lojni:

—Rniliä lo guejblu dad gubernador Festo, xhet rajcdi yecä. Ganax didxlii caniä. ²⁶Ree suga' rei Agripa. Laani nancheeni guiraa rediidxre, ni'c guyasi caniä rediidxre lojni, dizana guidxebä sa'csi anajnni gulii guiraa ni gujc, sa'csi xhet xhiga'tzdi gujcreni. ²⁷Guejblu rei Agripa, ¿la rililajz guejblu xtidx reniguii nani bacuaa xtidx Dios, ä? Nancheä rililajz guejblu diidxga —räjp Pabl.

²⁸Dxejcti räjp Agripa lo Pabl:

—Tuche'nsi riäädx gunlu gan chalilazä xtidx Jesucrist te gacä xpen Dios.

²⁹Räjp Pabl lojni:

—Xhet najcdi palga guxii o xhidajl cayäädx, narä canabä guniidx Dios chalilajz guejblu xtiidxni si'c rililazä xtiidxni, nägajcza guiraa reni cacuadiajg xtidxä te gactu si'c nacä, niluxh xhet näjdi resa' cadenre —räjp Pabl.

³⁰Dxejcti huisu Agripa, Festo, Berenice, näjza rebejn ni sobganäjreni. ³¹Che gubigreni stelaad, räjpreni lo sa'reni:

—Niguiire xhet bejndini te guetni, xhetza bejndini te jiäuni.

³²Dxejcti räjp Agripa lo Festo:

—Paru dini niniab chääni lo César, sajc nuslaanuni.

27

Birii Pabl sää nez guedx Roma

¹Basoobtireni dxej ni niu'nu nejn barcw te chonnu Italia. Dxejc bateedreni Pabl näjza sgaii bejn nani niäuzä lo capitán ni laa Julio. Rnibee Julio te gayuu soldaad, najcreni te cuaa ni laa Augusto. ²Näjza te dade' ni laa Aristarco guzaj, siäädni guedx Tesalónica xten Macedonia. Biu'nu nejn barcw ro' guedx Cesarea. Barcwga

siääd guedx Adramitio. Biriitinu, najc xhigab teednu nez reguejdx nani yu' ro' nisdoo lo reyuj xten Asia. ³ Che bara yääl guläjz barcw ro' guedx Sidón. Huenduxh gujc Julio con Pabl, basaanni bihuiu Pabl reexamigwni ni yu' guejdxga te bahuiireni Pabl, badeedreni xhi rquiinni. ⁴ Che säasac barcw lo nisdoo, bideednu stelaad Chipre, yuj ni tre' lo nisdoo, sa'csi säáb te beduxh, ni'c naga' Chipre xladbäjgwnu, te guxiiru rda' bej loonu. ⁵ Che sonnu neñ barcw, bideednu xnisdoo reguedx Cilicia näjza xnisdoo reguedx Panfilia, te bidzunu ro' guedx Mira xten Licia. ⁶ Ro'c bidxäjł capitán xten resoldaad stee barcw ni siääd guedx Alejandría. Agojl chää barcwga Italia. Bateedtini guiraanu lo barcwga. ⁷ Balti dxej chäigaj sonnu lo nisdoo. Trabajwduxh bidzunu lo nisdoo ro' guedx Gnido, sa'csi entis cabi' beduxh nez cadre sonnu. Ni'c trabajwduxh bideednu xladbäjgw yuj Creta ni tre' lo nisdoo xladbeenu. Gudejdnu guedx Salmón. ⁸ Dxejcti chäiduxh sonnu neñ barcw lo nisdoo nez cuä' yu Creta; si'ctis gujc bidzunu te lajt ro' nisdoo ni laa Buenos Puertos cadre guxii säáb bej. Gajxh ro'c tre' guedx Lasea. ⁹ Agujc balti dxej cayaclaanu, luxh agudejdza dxej ni rucua'n rexpejñ Israel, guxii riäädx chaa ijz. Rebäire di bejñ chää neñ barcw sa'csi yuduxh riesgw lo nisdoo, ni'c balijdx Pabl rebejñ, ¹⁰ räjpni lojreni:

—Rexamigwä, runxgaä bis guejbtu, palga chonnu neñ barcw chanuunu xnejznu, sajc te liädxduxh. Sinitloj cargw, sibijxh barcw, luxh silo' xhidajł bejñ, —räjpni.

¹¹ Niluxh di capitán xten resoldaad niu xtidx Pabl. Biuruni xtidx nani rusaj barcw näjza xtidx baxhuaan xten barcw. ¹² Luxh sa'csi lajtga dini gajc huen tedreni rebäii nałduxh, bejnreni xhigab hueenru guiriinu ro'c te chonnu guedx Fenice ni tre'za lo yu Creta, sa'csi di bej guibiduxh ro'c. Hueenru ro'c guilääznu ted rebäinajł, räjpreni.

¹³ Ni'c che gusloj cabi' te bebäz nez lad sur, naareni

pet xhet najcdi guiriinu lo nisdoo con barcw. Dxejc baslaareni barcw, sontinu ro' nisdoo gajxh cuä' Creta. ¹⁴ Niluxh di niacלאa gusloj te nisguipeduxh birii nez redajn xten Creta. ¹⁵ Gunaaz bejga barcw, diru gacdi gusajrenini. Basa'ntireni sanä bejga barcw cadrotis rלאjzni. ¹⁶ Siädgobiuj barcw te canuu. Che bidzunu stelaad te yuje' ni tre' lo nisdoo ni laa Clauda, guxiiru cabi' beduxhga. Dxejcli bejnreni gaan guläsreni canuu neñ barcw. ¹⁷ Che basälnu canuu neñ barcw, cua'reni gaii duro te baliibreni barcwro, bateedreni gaii duu xque' barcw te na'c guibiłni. Cadxejbreni te di chachu' barcw lo yujxh ni laa Sirte ni yu' neñ nisdoo. Ni'c guläjtreni ladro ni rniaz bej te rusajni barcw, gudixhreni lajdga neñ barcw. Sanäti beduxhga barcw cadrotis rלאjzni. ¹⁸ Che bara yääl caguscuä' beduxh barcw lo nisdoo. Sas basälreni che'n cargw lo nisdoo te bicharu barcw. ¹⁹ Ni riojñ dxej, lagajc laareni basälreni lo nisdoo guiraa xtrast barcw. ²⁰ Che agujc balti dxej niäu lo gubijdx, diza rebale' nien xhaguibaa sa'csi lałtis cayajb nisguipeduxhga, biennu xhigab guiraanu sejtñu. ²¹ Xchero rut rלאjzdi gau. Dxejc gusuj Pabl galäii rebejñ räjpni lojreni:

—Rexamigwä, paru nucuadiajg guejbtu xtidxä, na'c niriitu xyuj Creta, di liäädxre niajc, dizanu nidejd trabajwduxhre. ²² Niluxh colcuedcxi lastootu. Niclatej bejñ ni siääd lo barcw di guet. Barcwtis sinitloj. ²³ Nacä te xpejñ Dios, runä xhitis ni rnibeeni gunä. Nayääl biädsuj te xangl Dios cuä'ä, ²⁴ najni loä: “Na'c guidxejblu Pabl. Nanabpac chäälü lo reii César. ;Bahuilaa! Abasalajz Dioslu reni siädnälu; nicla tej reni yu' neñ barcwre di guet”, najni loä. ²⁵ Ni'cni caniä lo guejbtu, na'c guidxejbtu. Narä rililazä xtidx Dios. Rililazä sisiojb xtidx Dios si'c ni naj xangl Dios loä. ²⁶ Niluxh yu' cadre chalaj barcw lo yujxh neñ nisdoo gajxh lo te yuje' ni tre' neñ nisdoo —räjp Pabl.

²⁷ Si'cti tiop xman balanaa beduxhga barcw nezre, nezrec lo nisdoo ni laa Adria. Pet garol yääl ni bejn reniguii ni ruzaj barcw xhigab abidzujñ barcw gajxh lo yuj, ²⁸ ni'c bastejbreni te guiib lo duu xhajñ nisdoo, te barexhreni ro'c, dxejc gucbeereni najc nisdoo jiät si'cti galbitzubixho'p metr. Che guzaj barcw stelabäze', bastebsacreni guiib con duu xajñ nisdoo, dxejc gucbeereni ro'c najc nisdoo jiät si'cti galbigajdz metr. ²⁹ Dxejc bidxejbreni te di chalaj barcw yejc reguij. Bacuaatireni tajp guibro si'c guench ni naliib te caden te ru'reni neñ yujxh te ruscuääzreni barcw, te jia'nni tejsi lajt. Dxejc rlajzreni malaii jianijga lo guedxliuj. ³⁰ Dxejcti gulät remos canuu lo nisdoo cayjnsireni si'cni chastejbreni stee guench guiib lo nisdoo, niluxh rlajzreni guxunreni guidon la sajc guidzujñreni ro' nisdoo. ³¹ Dxejcti räjp Pabl lo capitán näjza lo resoldaad:

—Palga di redee jia'n neñ barcw, di gacdi guslaatu xcälñabajntu —räjpni.

³² Dxejcti batiugya' resoldaad duu ni naaz canuu te bitejbni lo nisdoo, sanäti nisdoo canuuga. ³³ Che gusloj cayanij, gunibee Pabl, räjpni lojreni:

—Nadxej rajc tiop xman gajdtu gues, gajdzatu gau. ³⁴ Naj coltajw te gac guixoobtu lo nisdoo. Na'c guntu xhigab guettu, nicla tej xquidxejcti di nitloj.

³⁵ Che gulujx gunii Pabl si'c, cua'ni yätxtiil, badeedni xquixtios lo Dios nez loj guiraareni. Dxejc gula'nini, gusloj cayajwnini. ³⁶ Dxejc bibaa-lajzreni, näjza laareni gusloj cayajwreni. ³⁷ Nuunu najcnu tiop gayuu gayonbitzubixho'p bejn ni yu' neñ barcwga. ³⁸ Che agujc gudajwreni, basälreni triuu lo nisdoo te bicharu barcw.

³⁹ Che bianisac, direni niembee yujga, niluxh bahuiireni cadre rdzujñ te gueubaz ro' nisdoo cadre yu' xhiroob yujxh ro' nisdoo. Rlajzreni nusiureni barcw ro'c.

⁴⁰ Dxejcti baslaareni guidap guench guiib ni naaz barcw, bia'nreni guideb caden nen nisdoo, baxheczareni yajg ni ruzaj barcw, gulaszareni ladro nez delant barcw te balanaa bej barcw. Badzuréreni barcw sääreni nez ro' nisdoo. ⁴¹ Sas biu'reni te lajt cadro rdxagsa' tiop cuaa nis. Ro'c huilaj yejc barcw nen yujxh nen nisdoo, digacdiru guiniibni. Dxejcti gusloj cabijl dejtz barcw sa'csi sanuutis caguijn nisdoo detz barcw. ⁴² Dxejcti rlazj resoldaad nugu't repres te di guixoobreni lo nis guxunreni. ⁴³ Niluxh di rlazj capitán xten resoldaad guet Pabl, ni'c dini nusaan nugu't resoldaad repres. Gunibee capitán ganiddoo renani rajc rxoob lo nis guitiäjs lo nisdoo te guidzujnreni lo yujxh. ⁴⁴ Dxejcti birinajl rebejn ni digacdi guixoob lo nis, naazreni barajd o te la' yajg ni gula' detz barcw. Si'c gujc bidzujn guiragajc rebejn lo yujxh ro' nisdoo. Nadaanreni bidzujnreni lo yujxhga.

28

Bidzujn Pabl lo yuj ni laa Malta ni re' lo nisdoo

¹ Che bidzujn nu lo yuj ni tre' lo nisdoo, biembeenu yujga najc ni laa Malta. ² Gucnäj rebejn ro'c nuure, gule'creni guiboo bahuiireni nuure sa'csi cayacnalduhx, cayajbza nisguij. ³ Ca' Pabl te däaz yajg, sale'cnini lo guiboo, chela biriyäl te bäl nialajz nen yajgga. Saa gudauya'ni naa Pabl. ⁴ Che bahuii reben Malta li najl bäl nialajzga cayauya' naa Pabl, gusloj cayäjbreni lo sa'reni:

—Pet rugu'tni bejn ni'c mase bejn ni gaan lo nisdoo siguijxni xtojlni, sejt ni naj.

⁵ Gubijb Pabl naani dxejcti bitejb bälga lo guiboo. Xhet gujcdi naa Pabl. ⁶ Dxejc reben ro'c cabäz fiireni la sisiäguij naa Pabl o laa sejt ni. Xchero bidxelojreni. Che bahuiireni xhet gujcdini, gusloj bejnreni ste'ca xhigab, räjpreni lo sa'reni:

—Pet dios najcni.

⁷ Gajxh ro'c naga' xyuj te dade' ni laa Publio ni najc xcubernadoor Malta. Biojia'nnu rolijzni choṅ dxej. Huenduxh gujc dade'ga, baniidxni guiraa ni biquiinnu. ⁸ Naga' xtad Publio cayacxhuuni, yu'ni xliaa, cayajczani yobrejn. Huihuii Pabl ni. Guredx-gunab Pabl lo Dios, dxejc batzuub Pabl ṅaani yejcn i, basiacgajcnini. ⁹ Che gucbee rebenguejdxga abasiajcn i beṅ racxhuuga, bidzunnäjreni beṅ racxhuu lo Pabl, basiajc Pabl guiraareni. ¹⁰ Ni'c banidx-xliaareni xhidalduxh xhicos, luxh che biriinu ro'c, baniidxreni guiralii recos ni biquiinnu neṅ barcw.

Bidzujṅ Pabl guedx Roma

¹¹ Agujc choṅ bäii yu'nu ro'c che biu'nu neṅ te barcw ni siäd Alejandría. Lagajc ro'c bateed barcwga rebäinajl che rsiäb beduxh. Yejc barcwga caj tiop figuur xten tiop biuux ni laa Cástor näjza Pólux, rexingancua'ch dios ni laa Zeus. ¹² Biriinu Malta sonnu neṅ barcw nez guedx Siracusa. Ro'c bia'nnu choṅ dxej. ¹³ Dxejcti biusacnu neṅ barcw, sonnu lo nisdoo cheni bidzunṅlinu guejdx ni laa Regio. Che bara yääl, gubi' te bej birii lad sur. Biusacnu neṅ barcw. Bara yääl bidzunṅnu guedx Puteoli. ¹⁴ Ro'c bidxaagnu gaii xpejṅ Jesucrist. Najreni loonu:

—Coljiannäj nuunu —najreni.

Bia'nnu ro'c gajdz dxej. Dxejc biriinu guejdxga, ni'nu sonnu nez guedx Roma. ¹⁵ Che gucbee rexpejṅ Jesucrist ni yu' guedx Roma siopsaanu nez Roma, biädreni guedx Foro de Apio näjza stee guejdx ni laa Tres Tabernas, ro'c bidxaagreni nuure. Che bahuii Pabl lojreni, guzutijp lastooni, badeedni xquixtios lo Dios. ¹⁶ Che biu'nu guedx Roma, bateed capitán repres ladzṅaa comandant, niluxh basaanni cualaa Pabl te yu' cadre cuääzni. Tejtis soldaad biannäj Pabl.

Baluu Pabl xtidx Dios lo reben Roma

¹⁷ Che gudejd choñ dxej, gurejdx Pabl reni rnibee lo rexpejn̄ Israel. Che bidxaag sa'reni cadro yu' Pabl, räjpni lojreni:

—Guejbtu reexamigwä, resa'ä, xhetliidi nani xhet laadi benä lo rexpejn̄ Israel, dizana nibälazä xleii toMoisés. Niluxh basäureni narä neñ latzguiib guedx Jerusalén, dxejcti bateedreni narä ladzñaa reroman. ¹⁸ Che biejn diajgreni xtidxä, rlajz reguxhtis roman nuslaa narä sa'csi xhet benädi te nugu'treni narä. ¹⁹ Niluxh naaddi rexpejn̄ Israel guslaareni narä, gunabätis lojpac reii César jiädle'creni quej ni cabe'creni xcuentä. Niluxh narä xhet xquejdi rexpejn̄ Israel cue'cä. ²⁰ Ni'cni guredxä la'tu te fiä lojtu, te guininää la'tu, sa'csi rililazä lagajc si'c rililajz xpejn̄ Israel sibansac rebengut, ni'c nalibä cadenre.

²¹ Dxejcti räjpreni lojni:

—Nicla tej guijtzc gajd reguxhtis xten reguedx Judea guxhal̄ loonu xcuentlu, gajdza rexpejn̄nu ni bidzujñ ree jiädsa'n diidx xhet laadi bejnlu. ²² Rlajznu jiejn diajgnu xtiidxlu, don xhi naalu, sa'csi racbeenu xhidajl lajt rniya-jreni redidxcoob xten Jesucrist —räjpreni.

²³ Guletireni te dxej guidxagsa'reni. Che bidzujñ dxejga, bidxagsa' xhidalduxh bejn̄ neñ yu' cadro rbäjz Pabl. Guideb dxej basule' Pabl xtidx Dios lojreni. Basule'ni xho rnibee Dios lojreni. Con rediidx ni caj lo xleii toMoisés näjza diidx ni bacuaa reniguii nani gunii xtidx Dios basule'ni Jesús najc Crist nani galooli cabäjz reben̄ Israel jiäd. ²⁴ Yu' reni huililajz xtidx Pabl, yu'za reni di nililajz xtiidxni. ²⁵ Sa'csi di niajcdi niujnreni tejsi xhigab gusloj siireni. Ganiddoo räjp Pabl lojreni:

—Guliica naj toIsaías che badeed Sprit Dxañ xten Dios rediidxre guniini, räjpni lo rextadgoldoonu:

²⁶ Huij, gunii lo rebejn̄re, scree gojz lojreni:

Siejn diajgtu xtidxä, niluxh ditu gacbeeni.

Suhuiitu nani runä luxh ditu gumbee xhini'c ruhuiitu.

²⁷ Agucnajd lastoo rebejnre sa'csi di rlajzreni chalilajzreni xtidxä.

Direni cuadiajg xtidxä sa'csi di rlajzreni jiejn diajgreni diidx ni guliipac.

Rusäuzareni balojreni te di fiireni, te di lajzreni chalii.

Ni'cni direni gusiechlajzreni te gusaan gunreni dojl te gudzucaj Dios xtojlreni.

²⁸ Räj p Pabl lojreni:

—Colgacbee. Najli sisiule' xtidx Dios lo rebenzijt ni di gac xpejn Israel te gusiejch lajzreni, te gudzucaj Dios xtojlreni. Rniliäpac lojtu, sililajzreni rextidx Dios.

²⁹ Che gulujx gunii Pabl rediidxga lojreni, ensilaareni gusloj cadxagdijl sa'reni laj ni sääreni.

³⁰ Tiop ijz guläjz Pabl guejdxga nen yu' ni cualaani. Biuni guiralii rebejn ni biääd rolizni. ³¹ Lo guiraa rebejn ga basule'ni xho rnibee Dios lojreni. Bijzani diidx xcuent redzuun nani bejn Jesucrist. Di lastooni nidxejb, rutza badxojn di guniini.

Xtidxcoob Dios ni biändä dad Jesucrist New Testament in Zapotec, Mitla (MX:zaw:Zapotec, Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30
